

**SEVENTH LEGISLATIVE ASSEMBLY OF MIZORAM
(FOURTH SESSION)**

LIST OF BUSINESS

FOR TENTH SITTING ON MONDAY, THE 24th NOVEMBER, 2014
(Time 10:30 AM to 1:00 PM and 2:00 PM to 4:00 PM)

QUESTIONS

1. **Questions** entered in separate list to be asked and oral answers given.

PRESENTATION OF REPORTS

2. **Pu K. SANGTHUAMA** to present to the House the First Report of Public Accounts Committee (2014-2016) on the Report of the Comptroller and Auditor General of India on State Finances for the year 2010-2011 & 2011-2012 (Excess Expenditure).
3. **Pu LALROBIAKA** to present to the House the First Report of Subject Committee-III (2014-2015) relating to Public Health Engineering Department (Renewal and Augmentation of Greater Saiha Water Supply Scheme and Greater Lawngtlai Water Supply Scheme).

FINANCIAL BUSINESS
DISCUSSION AND VOTING ON DEMANDS

4. **Pu R. ROMAWIA**, Minister to submit to the Vote of the House various Demands under his charge.
5. **Pu JOHN ROTLUANGLIANA**, Minister to submit to the Vote of the House various Demands under his charge.

NGURTHANZUALA
Secretary

....

** Please see Bulletin Part-II Sl. No. 63 dated 19th November, 2014 for Demands to be moved by Ministers.

DEPUTY SPEAKER : Inhmangaih tawna ngawt lo chu tuma engmah ba suh u; mahni mihring pui hmangaihtu chuan dan chu a zawh famkim tawh si a. Hmangaihna nain vengte a tikhawlo ngai lova; chuvangin hmangaihna hi dan zawh famkimna a ni. (Rom 13:8-10).

Zawhna leh chhanna hun kan hmang ang a, Starred Question 144-na zawt turin Tuikum bialtu MLA zahawm tak Er.Lalrinawma ilo sawm ang.

Er. LALRINAWMA : Pu Speaker, ka lawm e. Health & Family Welfare Department changtu minister zahawm tak hnena ka Starred Question 144-na chu – Nausente hnena Department-in vaccine a pek thin hi nausente tan huat/ngeih loh theih a ni em? tih ka zawt e.

DEPUTY SPEAKER : Chhang turin a changtu Minister zahawm tak Pu Lal Thanzara ilo sawm ang.

Pu LAL THANZARA, MINISTER : Pu Speaker, Tuikum bialtu MLA zahawm tak Er.Lalrinawma zawhna, nausente hnena department-in vaccine a pek thin hi nausente tan huat/ngeih loh theih a ni em tih chhanna chu – Nausente hnena Health & Family Welfare department-in vaccine a pek thin te hi Cold Chain (Refrigerator) a temperature dik taka vawn that a, a manufacture- tute ziah date of expiry a la pelh lo te, vaccine bur a VVM (vaccine vail monitor) mark a la that a, a pek dan tur dik taka pek a nih chuan naupangte tan huat/ngeih loh tura ngaih a ni lo.

DEPUTY SPEAKER : Awle, zawhbelhna, a zawhna neitu Er.Lalrinawma.

Er. LALRINAWMA : Pu Dy.Speaker, ka lawm e. Kan minister zahawm tak chhan atana ka zawhbelhna chu, hei kan hriat angin tunlai hian nausen damlo an tam a, Vaccine lak atanga damlo boral ta mai te anga ngaih an awm a. Tunah hian mi tam tak nu leh pa tam takin vaccine te hi an hlau ti ila, kan sawi sualin ka ring lova, pek dawn loh chuan ngaihthat thlak bawk siloh, pek dawn chuanin rilru nuam bawk silovin kan awm mek a ni a. Tunah hian ka bial chhung ngeiah te pawh hetiang case, vaccine avangin a thi kan ti lova, Vaccine lak zan atanga an damloh avanga thi case 2 kan nei nghe nghe a ni, kan bial chhungah. Chutiangte chu kan dinhmun a nih avangin vawiinah Health minister zahawm tak hian heng thilte hi chhui chianga department-ah inquiry committee kan ti dawn nge ni, khatiang dina he damdawi chungchang leh a dawngtu naupangte an dinhmun ang zela pek anih theihna tur atan hma min laksak thei angem tih hi kan zawhbelh a ni e.

DEPUTY SPEAKER : Zawhbelhna dang a awm em? An chhan tawh hnua zawhbelh kha kan remti dawnlo a ni. Aw, Dr.Ngurdingliana

Dr. NGURDINGLIANA : Pu Dy.Speaker, ka lawm e. Tun hnaiah hei ka bialah pawh nausen thi tam tak an awm a, Civil Hospital-ah kan kal phei chuan septisemia an ti mai a, damlo tam tak an awm a, khaw hrang hrangah pawh a nih ka ring a. Hei hi kan Health minister-in tuna a hmalakna meknaah infant mortality rate chungchangah te a fakawm rual rualin khalai kha min lo monitor-pui se tih kha ka'n ngen a ni e.

Speech not corrected.

DEPUTY SPEAKER : Zawhbelhna Dr. K. Beichhua.

Dr. K. BEICHHUA : Pu Dy.Speaker, kan Health minister khan cold chain a that chuan cold chain-ah khan a innghat viau vin ka hria a. Heng damdawi kan hmante hi eng company te nge an nih? Tin, cold chain hi a company atanga Mizoram thleng hian maintain tha taka rawn thlen a ni em? tih ka zawt e.

DEPUTY SPEAKER : Awle, chhang turin minister zahawm tak Pu Lal Thanzara.

Pu LAL THANZARA, MINISTER : Pu Dy.Speaker, Er. Lalrinawma MLA zahawm tak zawhbelhna chhanna chu, tunhnai October – November thla a vaccine lak avanga thi a puh naupang 6–Aizawl West-ah naupang 1, Aizawl East-ah 2, Serchhip-ah 1, Kolasib-ah 1, Lunglei-ah 1 te hi vaccine vang liau liau a thi an ni tih prove a ni lova. Tunah hian investigation a kal mek a. Mizoram pumah hian nu leh naupang 8000 bawr vel hi thla tin vaccine pek an ni a. Chung zinga 6 thi report pawh chu district hrang hrang atanga dawn a ni a. Vaccine that loh vang ni sela chuan hei aia tam hi report awm ngei tura ngaih a ni. Heng zinga naupang 1 pheih hi chu hospital a record a a lan dan chuan, lung lam thatlohna vanga boral ta nia hriat a ni. Tin, vaccine lak hrim hrim hian khawsik te, injection na lai a sen leh vung deuh te, naute tap leh chiau hiar deuh te chu awm ngei tura ngaih a ni a. Pu Dy.Speaker, hengte hi vaccine huat vang ni lovin, side effect ve hrim hrim a ni. Naupang chu nachhawkna paracetamol pek a, tui in tam tir a, hahtam taka awmtir a tawh mai a. Khawsik sang lutuk leh rei tak chhung tap nasa lutuk an awm chuan doctor rawn vat tur a ni. Pu Dy.Speaker, hetiang thil thleng avang hian engmah hlauh tur a awm lova, a rawn ngen ang khan department a thawktute'n district tin atanga report an dawn ang ang chu an verify-a, result hmuh ang ang chu headquarter-ah an thekhawm a, tichuan, central lamah hetiang ang theh thlak zel ngai chu theh thlak a ni a. A hranpaa Inquiry Commission chu din ngai lo turah kan ngai a ni.

Tin, Dr.Ngurdngliana MLA zahawm takin naupang damlo tam a tih kha a hranpain keima hnenah chuan report ka la dawng lova. Tin, helam kawngah hian chutianga harsatna lian te a awm a nih chuan Pu Dy.Speaker, chak taka hmalak a ni ang tih ka hrilh duh a.

Tin, member zahawm tak Dr.K.Beichhua zawhna kha eng company nge a nih tih kan sawi thei mai lova, nakinah kan la hrilh Chiang thei ang a. Tin, an damdawi rawn thlen chhoh dan hi chu him tawka ngaih a ni a. Tunhma zawng pawhin khatianga kalpui kha a ni a.

Tunhnaiah vanduai thlak taka heng vaccine lak laia naupang thi an awm nual te hi damdawi that loh vang chu niin kan hre lo a ni.

DEPUTY SPEAKER : Awle, Starred Question 145-na zawt turin Aizawl west-II bialtu zahawm tak Pu Lalruatkima ilo sawm ang.

Pu LALRUATKIMA : Pu Dy.Speaker, ka lawm e. Ka Starred Question No.145-na Health & Family Welfare Department minister zahawm tak chhan atan –

- (a) National Urban Health Mission (NUHM)-ah consultant turin qualification enge neih ngai?
- (b) NUHM consultant hi tunhnaiah lak thar a ni em?
- (c) Tu nge lak a nih? tih ka zawt e.

DEPUTY SPEAKER : Awle, chhang turin minister zahawm tak Pu Lal Thanzara ilo sawm ang.

Pu LAL THANZARA, MINISTER : Pu Dy.Speaker, West-II bialtu MLA zahawm tak Pu Lalruatkima zawhna –

- a) National Urban Health Mission (NUHM)-ah consultant turin qualification enge neih ngai tih chhanna chu – Post graduation thiamna nei a ni tur a ni tih a ni a.
- (b) NUHM consultant hi tunhnaiah lak thar a ni em tih zawhna chhanna chu – NUHM consultant hi tunhnaiah pakhat lak thar a ni (July 2014 khan)
- (c) tunge lak a nih tih chhanna chu – Lalmangaihzuali Ralte, M.Sc.(Zoology) d/o R.Lianhnuna, College veng, Kolasib tih a ni.

DEPUTY SPEAKER : Zawhbelhna a awm em? Aw, Pu Lalruatkima.

Pu LALRUATKIMA : Pu Dy.Speaker, ka sawibelh lawk duh chu (DY.SPEAKER : Sawibelh lovin, zawhbelh tur) aw...he hna dil tur hian MBA 8(pariat) leh Doctor 6(paruk) in an dil an ti a. Ani chauh hi master degree zoology a ni a an ti a, zoology hi ramsa chanchin zirtute an ni a. Helaiah hian Aizawl khawpui hriselna enkawl turin engatinge Doctor (MBBS) leh MBA mithiam tak tak an awm laiin zoology, ramsa chanchin zirni lak a nih tih ka zawt a. Tin, a dawt lehah chuan NHM-ah hian MD hi a

hranin kan nei tawh em? Tin, Principal Director hna hi a hautak si a, tunah hian Principal Director hian Mission Director hi a kawp tel bawk niin a lang a, enge a chhan tih ka zawt bawk a. Tin, Pu Deputy Speaker, a dang lehah chuan Mission Director hi state dangin an nei ve lo a, engatinge Mizoramah kan neih kher hi a tul em ni tih a ni a. Tin, Health Services hi Director nghet tun thlengin kan la neilo niin a lang a, hei hi qualified an awm lo nge, enge a chhan tih kha ka zawh belh a ni.

DEPUTY SPEAKER : Zawhbelhna kha a tam riau maia, a dang a awm em zawhbelhna. Awm lo maw? Chhang turin Minister zahawm tak Pu Lalthanzara ilo sawm ang.

Pu LAL THANZARA, MINISTER : Pu Deputy Speaker, MLA zahawm tak Pu Lalruatkima zawhbelhna kha, hemi hna la tur hian Board member fel tak ruat a ni a, chu miten an rawn thlan chu lak a ni.

Pu LALRUATKIMA : Pu Deputy Speaker, interview lai khan hotu sang lam atangin Kolasib ami, Lalhmangaihzuai kha la turin message-in rawn pe an awm a, khalaiah khan lak a nih phah ta a, an rilru a na khawp mai a, chuvangchuan khalai kha chu a diklo a ni. Induhsakna hleihluak tak a awmin ka hria.

Pu LAL THANZARA, MINISTER : Chutiang a awm a nih chuan Pu Deputy Speaker, kan lo chhui zui dawn nia. Tin, National Health Mission-ah hian ram dangah pawh Joint Mission Director ang te hi dah ve tho a ni a. Tin, remchan zawkna avangin wawiinah hian Principal Director leh Mission Director hi kawp tir rih a ni.

DEPUTY SPEAKER : Awle, House Leader-in alo sawi ang.

Pu LAL THANHAWLA, CHIEF MINISTER : Pu Dy.Speaker, khatianga hotu sang zawk atanga hemi hi lak tur titu kha member zahawmtak hian min hrilh sela kan thawhho chung zawng chu wawi khat mah ti leh ngai tawh lo turin ka lo hrilh anga. MPSC member te hi kan dah an ni a, mahse kan dah hnu atang hi chuan tuman biak kan rem ti lo, chutiangchu kan inkaihhruai dan a nilo. Chuvangin tun hma ang mai mai kha

kan kalphung a ni lo a, Public Service Commission member-te hi Minister-ten kan biak an thiang lo, kan inrawlhna tur a nilo. Chutiang chiaah chuan khatiang interview board-ah an awm a nih chuan khatianga inrawlh te kha ka hre duh khawp mai.

DEPUTY SPEAKER : A lawmawm e. Tunah i hrilh nghal dawn em ni? Hrilh nghal dawn loh chuan zawhna dang kha chu kan khar tawh a. I hrilh nghal theih chuan.

Pu LALRUATKIMA : Pu Deputy Speaker, hemi ni hian interview Board hnenah sms in hrilh a ni a, a hrilhtu chu a mawhphurtu a changtu a niin a lang a, chu chu ka sawi theih tawh a ni a. Kan House Leader zahawm tak khan MPSC lak ni khan a sawi a, MPSC lak kha a ni lo a, hei hi chu Board member siam ang khan lak a ni. (...Interruption ...)

DEPUTY SPEAKER : Ngawi rawh aw, kha chu pawn lamah inhrilh ula a tha ang.

Pu K. SANGTHUAMA : Pu Dy Speaker, helaia sawi vak pawh kha a tha em ni, khang kha chu engpawhnise, chingfel ngai a awm leh nakinah chingfel mai sela.

DEPUTY SPEAKER : Nia, kan lo chhui ang a ti tawh a, kha chu tawh rawh se. Starred question No. 146-na, zawt turin Saiha bialtu member zahawmtak, Dr.K Beichhua ilo sawm ang.

Dr. K. BEICHHUA : Pu Dy.Speaker, ka lawm e. UD & PA Minister zahawmtak hnena ka zawhna chu –

- a) SIPMIU in thla 6 chhung atan solid waste resource management pilot project a kalpui mek a, zawh hnuah hian engtia chhunzawm tur nge ni ang?
- b) Aizawl khawpui tana solid waste management kalpui mekah ADB atanga sum lo kal engzatnge hman ni tawh?
- c) Enge a hmanna te ?
- d) He hna hi consultancy firm rawih an ni em?

e) Rawih an nih chuan eng consultancy firm nge, tih kha ka zawhna a ni e.

DEPUTY SPEAKER : A chhang turin a changtu Minister zahawmtak Pu Zodintluanga ilo sawma ang.

Pu ZODINTLUANGA, MINISTER : Pu Dy.Speaker, kan member zahawm tak Dr K. Beichhua Starred question No. 146-na chhana chu –

- a) Solid Waste Resource Management Pilot Project, thla 6 chhunga kan kalpui a zawh hnu hian veng 5 ah project kalpui a ni a, Aizawl Municipal Council hnuai Local Council 82 ah neih vek tum a ni a, chumi atan chuan DPR te pawh kan siama, 14th Nov khan vaibelchhe 33 an rawn sanction tawh nghe nghe a ni.
- b) Pilot Project kalpui mekah hian ` 37,41,907 hmanral tawh a ni.
- c) Hetiang hian kawng hrang hrangah hman a ni :-
 - 1) Public Awareness/Consultation leh Poster buatsaihna.
 - 2) Bawhlhlahw bawm (Bins) / Garbage bag sem a ni. Heng hi hemi kan area 5, Pilot Project Laipuitlang Local Council te, Kanan Local Council te, Chawnpui Local Council te, Nursery Veng leh College veng Local-ah te hian in tinah garbage bin 2 leh khami a paihna tur, a tawih thei leh tawih theilo dah hranna tur kha sem a ni. Heng kan han tih nachhan kha chu, tunah hian Aizawl khawpui bawhlhlahw paihna tur Solid Waste Management hi ADB atangin hmanni kar hmasa mai khan an hotunu alo kala, tun atanga hun reiloteah hian min rawn sanction kan beisei a. Mipuite awareness pek tana bawhlhlahw a tawih thei te, tawih theilo te thliar hranna atana sem atan a ni a.
 - 3) Pilot area a thawktute hlahw/lawman a ni a, hei hi task force kan ti a. Khami Local Council Area a zirin 4 te 5 te volunteers kan la a, khang khan, an paihdan ang te,a thalaite leh thalo laite an inhrilh a, tunah hian thil thar a nih avangin, khatiang atan khan kan ruai a.
 - 4) Bawhlhlahw phurtu motor hman belhna kan ti a, hei hi,heng Local Council-ah te hian motor luh theih lohnaah, motor pakhat an hmanna tur hi SIPMIU atangin kan tum belh sak bawk a ni.
 - 5) Bawhlhlahw tawih te hi sawngbawl nan Vermin composting kan ti a, hei hi nichina kan sawi tak, a tawih thei ho, bag hrana dah a kha, Lengpui Vermiso

Society tihah khuan tunah khuan a pilot project a nihna angin kan zuk dahthlak sak vang vang a. Anni chuan heng atangte hian an bawlhhlawh an siama, sorkar anga kan hriat danah chuan an leithate hi 1Kg hi `14 in an hralh a , eizawna tha tak an siam mek a ni tih te kan hria a ni.

6) Bawlhhlawh tawih thei lo sawngbawlna hmun, Resource Centre, Tuirial ami buatsaihna atan te hman a ni. Heng hi Tuirialah khuan a tawih theilo ho dah khu a

7) thliar hranna hmun siam tum a ni a, chutah chuan thirchhia te, khatiang lo thliar hran a, khung thirchhia te khu ISPAT- te emaw, khawi emaw hman tangkai lehna tur atana tih a ni.

d) He hna atan hian Consultancy firm rawih a nilo.

e) Consultancy firm rawih an nilo, tih a ni e, Pu Deputy Speaker.

Speech not corrected.

DEPUTY SPEAKER : Zawhbelhna, Pu K. Lalrinthanga.

Pu K. LALRINTHANGA : Pu Speaker, kan Minister zahawmtak hmalakna hian Chawnpui peng tunah khuan siam that mek a ni a. Khulai khu a buaithlak hle thin a, a chep a, in turn te a harsa thin a, khulai kawng khu engang takin nge siam tum a nih tih kha hriat a chakawm, min han hrih thei se ka va duh em.

Dr. K. BEICHHUA : Pu Deputy Speaker, Consultancy firm rawih loh kha engatinge kan rawih loh, keimahni in management theih mai em ni ang tih kha ka zawhna a ni a. Tin, tawih theih leh tawih theih lohah khan a tawih thei kha engtia sawngbawl nge kan tum, tawih thei lo engtia sawngbawl nge ka tum, tih ka zawt e.

Pu LALRUATKIMA : Pu Deputy Speaker, ka lawm e, kan ngaihthlak tawh ang khan SIPMIU hmalaknaah khan Kanan veng pawh kan tel a, a tha viau

chuan ka hria a. Amarawhchu tawih thei leh thei lo thliar kha a buaithlak khawp mai rin ai takin. Dust-bin pahnih min pe a, a awl viau lo va, tih tur a ni a kan ti mai tur a ni a. Ka'n zawhbelh duh chu Serlui bialtu zahawm tak khan a rawn sawi tawh a, Vaivakawn Junction laih hniam hna thawh mek a ni a, ka lo hre ve lo va, chanchinbu atangin ka lo hre ve a, a lawmawm ka ti khawp mai a. Khulaiah khuan engzahnge sanction a nih a khawi atanga pek tur nge tih ka'n zawhbelh duh a ni.

Pu ZODINTLUANGA, MINISTER : Pu Deputy Speaker, a hma khan ka chhang tawhin ka hria a, a tawih thei kha chu Aizawl W-II bialtuin a rawn sawi ang khan thil thar a ni a, a tawih thei leh thei lo pawh kha mipuite nen kan la zir chian a ngai dawn a, a tawih thei lo zawng kha chu motor-in Vermo Composed Society an tih Lengpuiah khuan kan thawn thla char char hrih a, chung chuan nichina ka sawi tawh ang khan an lei tha siamchhuah khu Kg. 1-ah ` 14 velin an hralh mek a ni. Tin a tawih thei lo kha chu ka'n sawi nawn leh anga. Tuirial Damping ground-ah khuan resources centre kan tih hmang tangkai khan miten eizawnnan an hman theihna tur kha a hranpain thir an pack anga, chung thir chhiate chu ISPAT a theih theihna a hmang tangkai tumna a ni tih kha ka'n sawi nawn leh a ni a.

Vaivakawn chungchang kha Aizawl W-II bialtu khan alo hre ve miah lo mai a, ani a la kal ngaina miah lo Thorang kawng chhiat zia te a sawi thei mai a, tin, Session hmasa thla ruk kal taa PWD contractor an pek leh pek loh zawng zawng pawh hre thei khawp, kan bial kawng chhia kha kan hrih lo, a hre em em mai a ni, vawkpui a kal thei lo tih kha a lo hria a. Pu Deputy Speaker, ka'n sawi duh chu Contractor te, thlaruk kal ta ami te vawiina kan zawhna zawng zawng a hria a, bialah hian din leh a tum ta lo em ni aw ka ti a ni. Nihnih zan hnih kan lai tawh a, kal pawh hi a rawn kal lova min tawiawm turah ka ngai a.

Speech not corrected.

Pu K. SANGTHUAMA : Kan Bial thil pui tham deuh a awm a nih chuan inhrih a intawiawm a tha a ni. Hmanah kan Health Minister zahawm tak

khan nikum Mas leh kumthar inkar khan bial fang tur khan min sawm a lawmawm ka ti a, kan harsatnate kan inhriatpui tlan kha a tha khawp mai a, a fel pawh ka ti a, a hnenah hian lawmthu sawi tur tam tak ka nei a ni. Chuvangin hetiang angah hi chuan opposition kan ni emaw ni lo emaw kan inrawn deuh hi chu a tha khawpin ka hria.

Pu ZODINTLUANGA, MINISTER : Pu Deputy Speaker, kan hrilh lo tih pawh kan hre lova, anin kan hrilh lo tih a lo hria a, ni hnih lai zankhua thak thakin kan thawk tawh a. Veng chung mipuite khaw 12 lai mai Local Council te, YMA te chungah hian lawmthu sawi sorkar ang hian kan ba nasa a, kawng tha tur leh hmasawna tur atana kan harsa a nih pawhin hmasawna tur a ni a, chuvangin kan tuar tur a ni tiin kan meeting-naah te pawh kan sawi a. Pu Deputy Speaker, an rawn sawi chhuah takah chuan Department panga vel thawk ho an ni a, a bik takin power atangin Engineer-in-Chief atanga an thawhpuite PHE atang te, D & PA te, BSNL te leh Local Council leh YMA te a tir atangin theih tawp chhuahin chumi Department khawih chu a ni e ti lovin an tih tur an rawn ti mawlh mawlh maia, kan tanrualnate hi kan hmasawna tur atana hna kan thawhah hian kan official-te leh engineer-te a taka thawktute chungah lawmthu ka'n sawi duh a. Tin mipui hmasawna tur atana harsatna kan siam sak te pawh min lo hrethiam hram hram turin ka rawn ngen duh a ni.

Pu Deputy Speaker, Pu K.Lalrinthanga rawn zawhna kha chu vawiin tlai hian kan zawh ka ring a, chumi kan zawh hunah chuan, hna kan hmanhmawh theih lohna chhan chu seventhday tlangah khuan tanky lian deuh mai kan siama, chung chuan Vaivakawn te, Kannan te khu a chawm vek maia, veng tam tak a chawm a, tui pipe line tuna kan hman khu Vaivakawn kan laih khuan pipe 100 meter hman a ni a, chungchu a hlui tawh a, tuna 100 metres khu darkar 24 chhung tui a luang a, tanky lian khat tur chuan darkar 48 a ngai a ni. Chumi avang chuan mipuiten kan tihtawp chuan an harsa dawn si a, pipe tichhe lo khuan pipe line khu vawiin tlai atangin PHE in an phum anga, chung zawng zawng kan zawh hnuah kan titawp anga, kan zawm dawn chauhva. Urban Development hnuai tho a ni a, nichina kan sawi ang khan PHE tanky lian seventhday tlang ami

vawiina darkar 48 khat tura duh hi tunah tender te kan chhuah tawh a, secretariat lam atangin pipe lian te lain SIPMIU kal tlangin kan zawm thla dawn a, a thawktu tur leh Department te pawhin survey an tifel vek tawh a ni. Hemi kan zawh hunah chuan Vaivakawn tanky khu dar kar li chhungin a khat thei tawh dawn a, a khah chuan khawthlang mipui zawng zawngte harsatna kan sukiang thei tawh dawn a ni. Ka lawm e.

Speech not corrected.

DEPUTY SPEAKER : Sanction amount leh Agency kha a inpersan deuh a, i chhan theih loh pawhin a awm thova. Bawlhhlawh sawngbawlna atanga lokal kha a ni a.

Pu ZODINTLUANGA, MINISTER : Pu Deputy Speaker, tunah ka nei mai lo a ni e.

DEPUTY SPEAKER : Aw, a awm e. Starred Question 147-na zawt turin Saiha bialtu zahawmtak Dr. K. Beichhua ilo ko ang.

Dr. K. BEICHHUA : Pu Dy. Speaker, ka lawm e. Kan Minister zahawmtak, Health & Family Welfare Department changtu hnena ka zawhna chu – Civil Hospital Aizawl upgrade nan pawisa cheng engzatnge Central Sorkar atangin State hian a dawn tawh tih a ni e.

DEPUTY SPEAKER : A chhang turin a changtu Minister zahawmtak Pu Lal Thanzara ilo sawm ang.

Pu LAL THANZARA, MINISTER : Pu Dy Speaker, Saiha bialtu zahawm tak Dr. K.Beichhua zawhna Civil Hospital Aizawl upgrade nan pawisa cheng engzatnge central sorkar atangin state hian a dawn tawh tih chhanna chu - Civil Hospital Aizawl upgrade nan pawisa state-in a dawn zat chu ` 1500 lakh a ni e.

DEPUTY SPEAKER : Zawhbelhna a awm em? Pu R.L.Pianmawia.

Pu R. L. PIANMAWIA : Pu Deputy Speaker, ka zawhbelhna chu Civil Hospital Aizawl upgrade na turah hian Casualty saw upgrade ve tur a ni em tih ka zawt e.

Dr. K. BEICHHUA : Pu Deputy Speaker, 1500 lakh lai kan hmu a, a lawmawm viau a. A pakhatna-ah chuan hmalak tan a ni tawh em? A pahnihna-ah chuan engtia hmalak tum nge a nih tih kha ni se. Tin, pathumna-ah chuan suggestion leh zawhna ang deuhin tun kan dinhmunah hian Casualty-ah State pumpuia Hospital lianberah examination table pathum chauh kan nei a, chet ngaihna a vang tawh khawpin ka hria a. Chuvang chuan, tuna Nurse Hostel kan neih khi building anga sak a, pathology department khi casualty-ah a hman theih nghal mai ang em? Chu chu emergency deuhhleka hmalakna atan kan Minister zahawmtak hianin chutiang chuan hma a la thei angem tih kha zawhna ka siam a ni.

DEPUTY SPEAKER : Zawhbelhna, Er. Lalrinawma.

Er. LALRINAWMA : Pu Deputy Speaker, ka lawm e. Ka zawhbelhna ni pah fawmin Referral Hospital-ah sawn kan insawn pheih dawn niin a lang a. Tunah sawn TB Hospital hran kan nei lova, MDR ho dahna a awm a. TB ho leh Medicine ho saw Nurse pakhat sawn a ven pawlh a. Lehlamah damlote lo niin, mihring an lo chak lova. TB Room atanga rawn kal a, Medicine Room-a rawn kal tlang leh kha risk a sang deuh lo maw tih mi rilru-ah a awm deuh a. Hei hi ruahmanna tharte a awm thei em tih ka'n zawhbelh e.

DEPUTY SPEAKER : Dr. Ngurdingliana i sawm leh ang.

Dr. NGURDINGLIANA : Pu Dy. Speaker, kan hria a Damdawi inah kan kal ngun a loh theih lohna avangin. ICU saw tlema isolate deuhna hmunah dah theih ni se chu a lawmawm khawp ang a. Tunah sawn Male Medical Ward nen a inhnaih a, saw saw ngaihtuah thei se chu a lawmawm ngawt ang.

Speech not corrected

DEPUTY SPEAKER : A chhang turin a changtu Minister zahawmtak Pu Lal Thanzara ilo sawm ang.

Pu LAL THANZARA, MINISTER : Pu Deputy Speaker, a zawhna neitu Dr. K. Beichhua rawtna te kha thil tha tak a ni a, kan lo bawhzui ang a, thil tih theih chi a ni em tih te. Tin, Aizawl Civil Hospital Compound-a kan hmalakna chu tunhma-a nau nei ho awmna thin Private Ward bul ami khi a building kha kan dismantle tawh a. Khilaiah khian vaibelchhe 5 vel sengin chhawng li nga velin building kan sa thar dawn a. Chutah chuan upa ho, tar ho bik pualin khum 10 awm theihna te kan siam ang a. Tin, chumi piah lampangah chuan Private Ward pawh 10 chuang ruahmanna siam a ni a.

Pu R.L. Pianmawia MLA zahawm tak in Casualty khi sak that a ni ve dawn em a tih kha, tun maiah chuan khi mi khi sak that tumna kan nei hranpa lova. Pu Dy. Speaker, amaherawhchu, kan pawisa neih ang hian Trauma Centre leh Emergency-a thawk thin Doctor-te leh Nurse-te awmna tur quarter sak tum mek a ni bawk a ni.

Tin, ICU hi isolate deuha dah atan a itawm khawp a. Mahse, a khawl bun dan zawng zawng te khi a buaithlak khawp mai a, duh anga han laksawn mai theih a ni lova. Engpawhnisela, khilai khi chu a remchang lo a ni tih chu kan hria a, khawl lo bun tawh khi awlsam taka sawn mai theih a ni lova. Kan han insiksawi rem hunah chuan khi pawh khi la ngaihtuah tur a ni ang a.

Tin, Er. Lalrinawma, MLA zahawm tak zawhna, Falkawn Referral Hospital-a TB leh damlo dang inawmpawlh a tih kha, Department-in hei hi a hria a. Falkawn Hospital a chhak lampang zawkah khian ruahmanna siam turin tunah hian hma lak mek a ni.

DEPUTY SPEAKER : Starred Question 148-na zawt turin South Tuipui Bialtu zahawm tak Pu John Siamkunga ilo sawm ang.

Pu JOHN SIAMKUNGA : Pu Deputy Speaker, Health & Family Welfare Department changtu Minister zahawm tak chhan atan heng zawhnate hi ka zawt e : -

- a) Hnahthial khua Sub-District Hospital sak mek hi Phase I sak zawh tawh a ni a, Phase II hi engtikah nge sak chhunzawm theih a nih ang?
- b) Hnahthiala Ayush Damdawi In sak tum kha hmalakna-in engnge a thlen tawh?

DEPUTY SPEAKER : A chhang turin a changtu Minister zahawm tak Pu Lal Thanzara ilo sawm ang.

Pu LAL THANZARA, MINISTER : Pu Deputy Speaker, South Tuipui bialtu MLA zahawm tak Pu John Siamkunga zawhna, Hnahthial khua Sub-District Hospital sak mek hi Phase I sak zawh tawh a ni a, Phase II hi engtikah nge sak chhunzawm theih a nih ang tih chhanna chu, Hnahthial khua-a Sub-District Hospital sak mek, Phase II hi sak chhunzawm theih hun tur hriat a la ni lo. A chhan chu kan Minister hmasa thahnemngaihna-a hemi hi sum pawhkhawm-a sak a ni a. Tunah hian sum pawhkhawm tur a awm remchan rih mai loh avangin chhunzawm theih a ni rih lova. Central sorkar-ah Forward Linkage Scheme hnuaiah hnathawh tur dil mek a ni.

Tin, a zawhna pahnhna chhanna, Hnahthiala Ayush Damdawi In sak tum kha hmalakna-in engnge a thlen tawh tih chhanna chu, Hnahthiala Ayush Damdawi In sakna tur project hi central sorkar-ah thehluh tawh a ni a, approval nghah mek a la ni.

DEPUTY SPEAKER : Zawhbelhna a awm em? Zawhna neitu Pu John Siamkunga ilo ko ang.

Pu JOHN SIAMKUNGA: Pu Deputy Speaker, Hnahthial Sub-District Hospital khi NRHM hnuaiah khan State Level Committee, kan Chief Minister zahawmtak hmalaknain sak tura tih kha a ni a. Kan hun hmasa-ah khan kan sa chho ta kha a ni a. Phase I kan sak hian Phase II nen hian a inmanbet tuak mai a. Phase I ah khian Phase II sakna sum tam tak hman tawh a ni a. A chhan chu a in chung te khi Phase II a bet daih a ni a. A building-te a chhiat tawh avangin luah an duh si a. Kan hun hmasa-ah khan sak tir chhunzawm an ni a. Tichuan nuai 40 vel lai hi Phase II ami tur hi an hmang puk tawh

nghe nghe a ni. Chu chu kan lo kal tawh dan a ni a. A theih anga ranga min tihsak turin ka'n ngen nawn leh a.

Tin, ka zawhna pahnihna chu kan sorkar chak tak hian Cherhlun-ah khian PHC Damdawi In min sak sak a. A sak zawhna a rei deuh tawh a, tunah hian luah a la ni lova. Khitia luah loha a awm reng chuan a chhiat mai te hi kan hlau deuh a. Engtikah nge khi khi hman theiha min hawnsak theih dawn tih ka'n zawt a.

Tin, chutiang bawkin kan sorkar hmasa-ah khan Thingsai PHC hi sak sak kan ni bawk a, hei pawh hi zawhna a rei tawh a, khitia a awm reng chuan a tha lo thei dawnin a lang a. Hengte hi engtikah nge hman theiha min hawnsak theih dawn tih ka rawn zawt leh a ni.

DEPUTY SPEAKER : Zawhbelhna a awm em ? Pu Joseph Lalhimpuia sawm hmasa ang.

Pu JOSEPH LALHIMPUIA : Pu Deputy Speaker, Industry Department Programme kan nei a, tlemin ka rawn tlai deuh a, min hriatthiamna ka rawn dil a. Ka zawhbelhna chu, Zobawka PHC dah tura ruahmansak kha kan Chief Minister leh kan Health Minister-in theih tawpin min bawhzuipui tih kan hria a, kan lawm hle a. Engnge ni tunah kan dinhmun, kan thlen chinte min hrih theih chuan tih kha ka zawhna a ni e.

DEPUTY SPEAKER : Pu H. Zothangliana.

Pu H. ZOTHANGLIANA : Pu Deputy Speaker ka lawm e. Term hmasa lamah khan thingtlang hmun hrang hrangah, Zoram dung leh vangah Health Sub-Centre te, Clinic Centre te kan Sorkar hian a sa teuh mai a. Chung chu ka hriatsual loh chuan la hawn loh a ni deuh vek a. Hun hmasa lam atang khan ruahmannate kalpui a ni a. Kan Health Worker awmsa te atang hian reasonalization hmangin hawn theih dan kan ngaihtuah mek tih kha a ni a. Kha kha engtianga chhonzawm nge a nih? Hawn a ni hnai thei dawn hlawm em ? tih kha ka'n zawt a ni e. Ka lawm e.

DEPUTY SPEAKER : Chhang turin a changtu Minister zahawm tak Pu Lal Thanzara.

Pu LAL THANZARA, MINISTER : Pu Deputy Speaker, zawhna neitu Pu John Siamkunga zawhbelhna kha ka sawi tak ang khan Hnahthial Sub-District Hospital sak nan hian a hranpain pawisa a rawn kal lova. Kan Minister zahawmtakin hmangchang hre taka an pawh khawm vel atanga bul tan a ni a. Chuvangchuan, chumi an pawhkhawm chu an zawh hnuah chuan sak chhunzawm lehna tur kha kan la nei leh rih lova. Tunah hian sak chhunzawm leh a nih theihna turin hma lak mek a ni.

Tin, Cherhlun khua Primary Health Centre building leh Thingsai khua Primary Health Centre building sak tharte hi a satu chu Mizoram PWD te an ni a. Anni hian Health Department-ah an la handover loh avangin kan la hawng thei rih lo a ni.

Tin, member zahawm tak Pu Joseph Lalhimpuia zawhna, Zobawk PHC chungchang kha tunah hian ka chhang mai thei lova, nakinah amah ka la hriattir dawn nia.

Member zahawm tak Pu Zothangliana'n Health Sub-Centre leh Clinic Centre te min sak sak teuh tawh a, hawn a la ni lova a tih kha kan hria a. Tunah hian heng kan sak tharte enkawl tur hian tun hnaiah khan Health Worker 50 kan la a. Hengte hmang hian tun atanga reiloteah hawn tum mek a ni.

DEPUTY SPEAKER : Starred Question 149-na zawt turin Aizawl West-II bialtu zahawm tak Pu Lalruatkima ilo sawm ang.

Pu LALRUATKIMA : Pu Deputy Speaker, ka lawm e. Kan Starred Question 149-na Social Welfare Department changtu minister zahawm tak chhan atan ka zawt e.

DEPUTY SPEAKER : Chhang turin Pu P.C. Lalthanliana.

Pu P.C. LALTHANLIANA, MINISTER : Pu Deputy Speaker, West-II bialtu zahawm tak zawhna chhanna pakhatna chu, ‘Ni e’, tih a ni a. b) a nih chuan mi engzatin nge hamthatna hmu tawh tih chhanna chu, ‘mi 45’ tih a ni a. c) Rualbanlote tan hian sorkar hna engzat nge awm thei ang tih chhanna chu - i) Locomotor Disability-ah 177, ii) Hearing impaired - 286, iii) Visually impaired – 415, a vaiin – 878 tih hi ka chhanna a ni e. Ka lawm e.

DEPUTY SPEAKER : Zawhbelhna a awm em? Pu Lalruatkima

Pu LALRUATKIMA : Pu Deputy Speaker, ka lawm e. Hei PWD Act hnuaihan hian 3% reservation kan nei ti khan kan ngaihlaha, a lawmawm khawp mai a. Chutihlai chuan PWD Commissioner and Staff Recruitment Rules siam a ni tawh em? A la nih loh chuan engtikah nge peih a nih ang tih ka zawhbelh a ni e.

DEPUTY SPEAKER : Zawhbelhna dang a la awm em? Pu Vanlalzawma

Pu VANLALZAWMA : Pu Deputy Speaker, ka zawhbelhna chu tunah kan ngaihthlak tawh ang khan (PWD) Person With Disability Act hmangin 3% reservation kha a awm thei a. Department hrang hrang hian hei hi an tikhat tha taw em? Hei hi an titha taw em tih check zuina hi a awm em? tih hi ka zawhbelhna a ni.

DEPUTY SPEAKER : A dang a la awm em? Awm tawhlo maw? Chhang turin Pu P.C. Lalthanliana.

Pu P.C. LALTHANLIANA, MINISTER : Pu Deputy Speaker, a zawhna neitu zawhbelhna PWD Commissioner & Staff lakna atan R.R. siam a ni em tih a ni a. Pu Deputy Speaker, kum 1995-ah hian State Commissioner, PWD lakna turah hian R.R. hranpa hi siam a ni lem lo va. Section 60-na, 62-na leh 65-na

Clause-I ah hian a lak dan tur tlangpui a ziaik mai a. Chutiang chuan state sorkar-in Commissioner hi a la mai a. Tichuan, June 1, 2012-ah khan chak zawka hma lak a nih theih nan a tul tur zual pui Commissioner Office atan hian lak a ni leh a, tah hian language interpreter phei chu qualified an awm loh avangin kan la thei lo va. Hetah hian R.R. hranpa te a awm lo va, training chawp turte lak mai tur em ni tih te pawh ngaihtuahna a awm a ni. Chutiang chu kan kal dan a ni.

Tin, member zahawm tak Pu Zawma zawhbelhna kha Department hrang hrangah heng hi tha taka zawm a ni em tih te, engzat nge post ruak an neih a, black-lock vacancy kan tih ang chite zawtin department 69-in chhanna an pe tawh a. Tin, rualbanlote tan job identified hi 2007-a lo tih tawh a ni. Hengte pawh hi revise a hun tawh lawm ni tiin Commissioner, person with disability kan neih hnu hian DP&AR lamah te pawh rawtna thlenin rualbanlote tana hamthatna tha zawk neih theihna turin Commissioner Office kan neih hnu hian chak taka hmalak a ni. An hmalakna tlangpui leh report te pawh danin a tih angin Assembly House-ah te pawh kan pharh a. Chutiang chu vawiina kan dinhmun tlangpui a ni.

DEPUTY SPEAKER : Starred Question 150-na zawt turin Aizawl West-II bialtu member zahawm tak Pu Lalruatkima sawm ila.

Pu LALRUATKIMA : Pu Deputy Speaker, ka lawm e. Ka Starred Question No. 150-na Urban Development & Poverty Alleviation Department changtu minister zahawm tak chhan atan :-

- a) RAY hnuaiah Pilot Project khawiah nge a awm ?
- b) Project atan hian Sanction Amount engzat nge ? Engtikah nge ruahman a nih ?
- c) 1st Installment pek a ni tawh em ? A nih chuan engzat nge ? Engtikah nge pek a nih ?
- d) Hna hi eng chen nge thawh (Physical Achievement) a nih tawh tih ka zawt e.

DEPUTY SPEAKER : Chhang turin a changtu Minister zahawm tak, Pu Zodintluanga sawm ila

Pu ZODINTLUANGA, MINISTER : Pu Deputy Speaker, kan Member zahawm tak Pu Lalruatkima Starred Question 150-na chhanna :-

- (a) RAY hnuaiia Pilot Project chu Zuangtui, Aizawl-ah a awm a. Tin, Pu Deputy Speaker, ka'n sawibelh lawk duh a awm a helaiah hian, hemi Pilot Project kan tih hnuah hian kan scheme te Central Sorkar-in tha a ti a. Lunglei, Champhai, Mamit, Kolasib, Serchhip, Saiha leh Lawngtlai-ah hemi RAY Project pumpui hi kal phalna min pe tawh a department-in, DPR leh survey te an nei mek a ni tih kha ka rawn sawi tel duh a ni.
- (b) RAY hnuaiia Pilot Project atan hian cheng 1120.01 lakhs sanction a ni a, a project hi kum 2011 a ruahman a ni.
- (c) 1st Installment pek a ni tawh a, 1st Installment atan hian ni 19.2.2012 khan Rs 316.34 lakhs release a ni.
- (d) RAY Pilot Project Zuangtui ami hi a tira an Local Council ten ram min lo pek kha physical a thawh kan han tum khan Department dang PWD te kha lo rin luh a nih avang khan a ramah sawn eng emaw chen kan han buai a, chumi sutkian nan chuan split kan han dil a, sawlai UD&PA ram, thlanmual tur atana an tih Falkland ram saw. Chumi kan tih chhung chuan Central sorkarah hmunkhat ami ni si hmunhniha tih ngai ta permission kan dil chhung kha duh aain hun a duh rei deuh a. Amaherawhchu Pu Dy. Speaker, i bial chhung a ni a tunah a ram te pawh tihfelin Central Sorkar pawn hmunhniha a rawn tih kha min phalsak tawh a, wawiinah hian a dawngtu tur te, insak tanpuina dawngtu turte ho kha kan Deputy Speaker zahawm tak hian wawiinah a sem dawn a ni tih kha he House zahawm tak hi ka rawn hrilh a ni e.

DEPUTY SPEAKER : A lawmawm hle mai, a fiah khawp mai a. Zawhbelhna a awm dawn em ni?

Pu LALRUATKIMA : Pu Deputy Speaker, i Bial chhung a ni bawk a, zawt luai luai ila pathum aia tam kha i phal ka ring hial a. Kan Speaker pawh khan a phal zau viau kha maw. Hei kan chhanna atang khan implementation kha tih tan tum a nih thu kan hria a. Pu Deputy Speaker 1st Installment an pekna kha 2012 a ni tawh a, a rei khawp mai a, churang chuan hna tan thuai kha a ngai a. Engvangin nge hna kha tan lawk loh a nih chhan kha fiah leh zual in min chhang thei ang em?

DEPUTY SPEAKER : A ram kha a sawi ngei mai a, Minister-in a chhan duh a awm em?

Pu ZODINTLUANGA, MINISTER : A ngai bawk sawi nawn leh ila vawiin chu Pu Deputy Speaker. Thil hi kan lo inhrilh lo thin a, a chiang deuh tawh ang e. Sawlai ram saw Local Council-ten Department hnenah hetiang a harsa tak tak te chenna tur atan free land a awm an ti a. An free land an tih zat angah khan Project kan siam a, a planning engkim a kawng awmna tur te, Community Hall khatiang ang a ken tel ho zawng zawng kha. Sanction kan han hmu a hna kan va thawh dawn khan a ram free land a ni anrawn tih kha PWD sawlaia an store division ram tam tak kha an lo kawk tel ve si a, khatah khan a Project pumpui kha a leng dawn si lova, chuvang chuan ram dang kan ngaihtuah a, Falkland ramah sawn Department ram tho a awm a, chumi chu Central Sorkarah phalna helai hmunhniha split tur, Pilot Project a nih avang khan hmun khata Project a ni a, hmunkhata leng ta silo kha Central Sorkarah phalna lak phawt loh chuan hna kan khawih ngam lo a. Chutiang anga Project te phalna kan hmuh hnuah, Central Sorkarin hmun hnihah in ti thei e min rawn tih hnuah hian Geology leh Mineral Resource Department te ruaiin Geological investigation te engkim kan tifel a, Shade Outlaid Plan te, Physical survey te leh jungle clearance te pawh khang ang kha a tlaina chhan chu a ni e Pu Deputy Speaker.

Speech not corrected.

DEPUTY SPEAKER : Zawhbelhna hun kha kan lo hawng rei lo deuh a, heta lo phar kha ka hmu lova, Pu Chalrosanga ko leh lawk mai ang.

Pu CHALROSANGA RALTE : Pu Deputy Speaker, Minister zahawm tak zawhbelhna ka neih chu, Lunglei khawchhungah sawn RAY ang te hi kalpui ve theih dan a awm em? tih kha ka rawn zawhna a ni e.

DEPUTY SPEAKER : A chhang thei em Minister zahawm takin.

Pu ZODINTLUANGA, MINISTER : Pu Deputy Speaker, kan Pilot Project saw he House zahawm taka ka'n sawi duh chu, kan Central Urban Development Department mit a tlung em em a, sawmi Pilot Project kan tih atang sawn a Project pumpui tawh tur Pilot Project nilo hei hi Aizawl-ah te, Lunglei-ah te, Champhai-ah te, Mamit-ah te, Kolasib, Serchhip, Saiha leh Lawngtlai-ah kalpui tum a ni a. Tunah hian khatiang ang a dawng theitu tur survey te pawh NGO te nen tangkawpin heng khawpuiah te hian survey kan ti mek a, tute nge dawng thei tur chumi chu kan final hunah a DPR te kan siam chho ang a, hma kan la mek a ni tih kha ka chhanna a ni e.

Speech not corrected.

DEPUTY SPEAKER : Awle, Starred Question no. 151-na zawt turin Tuikum bialtu zahawm tak Er. Lalrinawma ilo sawm ang.

Er. LALRINAWMA : Pu Dy. Speaker, ka lawm e. Home Department Minister hnena ka zawhna, ka starred question no.151-na chu- I.R Battalion-te enkawlna atan hian Mizoram Sorkar hian tun kum 6 kalta chhung khan sum engzatnge a hmuh? tih ka zawt e.

DEPUTY SPEAKER : A chhang turin Home Minister zahawm tak Pu R. Lalzirliana ilo sawm ang.

Pu R. LALZIRLIANA, MINISTER : Pu Deputy Speaker, Er. Lalrinawma member zahawm tak zawhna chhanna chu- tun kum 6 kalta chhunga I.R. Battalion-te enkawlna atana Mizoram Sorkar-in Central Sorkar atanga a sum hmuh zat chu Rs 31.8750 Crore a ni e.

DEPUTY SPEAKER : Zawhbelhna a awm em, Er. Lalrinawma.

Er. LALRINAWMA : Pu Deputy Speaker, ka'n zawhbelh duh chu hei I.R lak thuah hian thu inchuh lian deuh mai kan nei a. Mipui rilruah I. R te hi tul mang loa lak a ngaihtheih rum rum khawp rilru a piang thei bawk a. I.R te

tan pawh tul mang loa thawka inngaihna a awm thei bawk a. I.R te hi kan ram tan hman tangkaina kan nei vak lo nge force lampangte hi kan indaih viau em tun dinhmunah tih kha min han hrilhfhiah thei se a lawmawm ngawt ang tih ka rawn zawt belh a ni e.

DEPUTY SPEAKER : Zawhbelhna dang a awm em? A awm lo maw, a chhang turin Minister zahawm tak ilo sawm ang.

Pu R. LALZIRLIANA, MINISTER : Pu Deputy Speaker, 3rd I.R Battalion hi total raising cost chu a tir atana han dinna mai tur chu crore 17 a ni a, heta tang hian 75% crore 12.75 hi Central Sorkar atanga re-imburse leh theih turin lehkha dah a ni a. Hemi atanga 1st leh 2nd Installment crore 6.3750 hi kum 2007-2008 khan tihfel a ni a, a la bang chu 3rd leh 4th ah kum 2008-2009 khan hmuhbelh leh a ni a, tichuan crore 12 hi Central Sorkar atangin hmuh kim tawh a ni a, chiang deuh hlekin hei hi sawi a ngaiin ka hria a. 4th leh 5th I.R Battalion hi 3rd I.R Battalion ruahman ang tho hian 4th leh 5th I.R Battalion tan kum 6 kalta chhung khan crore 12 ve ve Mizoram Sorkarin a dawng leh bawk a, a din atang khan. Avaiin kum 6 kalta chhunga kan sawi chu crore 31.8750 hi a ni a. Tichuan 1st leh 2nd I.R hi term hmasa lam daih Congress hun chhunga din kha a ni a. Central Sorkar atangin kum 6 chhung khan cheng khat mah hmuh a ni tawh lova, tichuan Mizoram Sorkar atangin 1st I.R. Battalion tan hian crore 119.36830 Mizoram Sorkar sum hman a ni a. Tin, 2nd I.R. Battalion atan hian Central atangin kan sawi ang khan hmuh a awm tawh lova, tichuan kum 6 chhung atan khan crore 128.451 hman a ni a. 3rd I.R Battalion atan hian kum 6 chhung khan Central atangin crore 6.37500 hmuh a ni a. Tichuan Mizoram Sorkar atangin kan sum sen ve he Battalion tan hian crore 131.48720 a ni a. Tin, 4th I.R. Battalion hmanhmawh taka inthlan dawna Sorkar hmasa, MNF Sorkarin a lak atang khan kum ruk chhunga Central sorkar atanga pawisa kan dawn chu crore 12.75,000 a ni a, Mizoram sorkarina kan lo tum ve taka chu crore 96.11,068 a ni a. Tin, 5th IR Battalian atang hian Central sokarin kum ruk chhung khan crore 16.75,000 min pe a. Tichuan, Mizoram sorkarina ama pawisa a lo tum ve chu crore 90.2,004 a ni a. A vai hian Central sorkar atangin kum ruk chhunga kan hmuh chu crore 31.87,500 a ni a. Mizoram sorkarin

kan lo tum ve, keimahni pawisa kan lo hman chu he Battalion tan hian, battalion 5 tan hian, crore 5,65,3,780 a ni a.

Tin, IR Battalion hi an pawimawh nameuh mai a, kan ram hi national border te kan ngah a, chutianga tan chuan an pawimawh a. Amaherawhchu, hetiang anga a recurring expenditure ngaihtuah lem lova lak a lo nih avang hian Mizoram pawisa hi nasa takin, hei, kan han hmuh atang khan sen belh a ngai ta a ni. Tunah hian battalion hnih kha inthlan dawn khan rang taka lak ni lem lo, ngaihtuah chianga lak ni lem lo ta selang chuan kan awm thei tho mai a. Tunah pawh hian Police Department-ah hian post 1500 vel ruak a awm a ni. Chuti chung chuan Mizoram sorkar hi a kal tho a ni tih kha ka'n sawi duh a ni.

DEPUTY SPEAKER : Kan Question Hour a tawp a, zawhna dang kan la hman tawh lovang a. Thupuan tur a awm a, Member absent, Pu Lalrinliana Sailo, pawimawhah Delhi lamah a kal a; tin, Pu S. Laldingliana, treatment lain Mumbai lamah a kal a, heng ho hi chawlh phalsak an ni.

Tunah chuan presentation of Reports-ah kan kal ang a. A hmasain Pu K. Sangthuama, Member zahawm takin 'The First Report of Public Accounts Committee (2014-2016) on the Report of the Comptroller and Auditor General of India on State Finances for the year 2010-2011 & 2011-2012 (Excess Expenditure)' tih hi House-ah rawn present sela.

Pu K. SANGTHUAMA : Pu Deputy Speaker, kan thian dangte pawh khan Report pek pah hian thu kam hnih khat an sawi theuh a, tlem han sawi ve theih min phalsak turin ka ngen a che.

Public Accounts Committee hi C&AG Report atanga sorkar Department hrang hrangte sum hman dan House aiawha exam-tute kan ni a, kan Member-te chu, Pu R.L.Pianmawia, Pu Lalrobiaka, Pu S.Laldingliana, Pu Lalthanliana, Pu Lalruatkima leh Pu Chalrosanga Ralte te nen kan vaiin mi pasarih kan awm a. Sorkar Department sum hman dan C&AG-in fel lo nia a hriat Report hmanga a tarlan tawh chuan PAC-in kan drop hma loh chuan an Para-te a nung reng tawh si a, chuvangin Committee pawh hi kan thu zing viau thin a, tun financial year thla sarh chhung hian vawi 20 chuang kan thu

khawm tawh a ni. Committee-in kan hmuh dan atangin Report-te pein Recommendation kan siam thin a, chu chu sorkar Department lam ten an la rawn bawhzui tur a ni a.

Tuna kan Report pek tur hi kum 2010-2011 leh 2011-2012 Financial Year chhunga Department thenkhatin an annual budget-in a phak baka sum an lo hman (Excess Expenditure) chungchang a ni a, hengte hi PAC-ten regularise kan phalsak hnuu Finance Department lamin India Constitution Article 205 tlawh chhana House-a an rawn move a la ngai dawn a ni. Chuti a nih loh chuan dan dik lova pawisa hman a ni reng mai dawn a ni.

Pu Deputy Speaker, he mi chungchanga han sawi tel ka duh chu Department tam tak hian an budget zir chiang hmasa lem lovin sum an hmang mai mai tih hi a hriat a, kawng thenkhatah chuan lohtheihlohna chin chu a awm ve mai thei e, amaherawhchu budget-in a daih bak sum hman a tula an lo hmang a nih pawhin dan ang thlapin an hmanna voucher nen Supplementary Demand hmangin House pawmpuina an la thin tur a ni a. Chutiang a nih loh chuan C&AG hian an rawn thur chhuak nalh nalh mai thin a ni. Chuvangin PAC-in a regularized leh mai thin a lawm ti ang hrim hian Department Head thenkhat hi chu an fimkhur lovin financial procedure hi an zawm tha lo fo thin a, hei hi a pawl khawp mai. Tun hnuah chuan PAC hian chhan tha tawh a awm a nih loh chuan hetiang budget pawn lama sum hman lo regularize leh ngawt hi kan bat a ni lo tih hi Department zawng zawng hian lo hria se ka duh a, kan in regularize-sak zel ang tih hi ka sawi thei lo a ni. Tin hetiang sum hman dan fel fai lo hi a tam lutuk a, PAC pawh hian kan exam seng lo mai ang tih pawh hlauhawm tak a ni. Mahni bial pawh fang mumal hman mang lovin regular taka chawlhkar tin kan Committee chung pawh hian tunah Financial year 2011-2012 velah kan la tang leih leih chauh a ni a, ngaihsam taka lo drop zung zung kha a remchang bawh si lo. Chuvangin Department tin hi dik taka sum hmanga C&AG Audit Report-a lang tur awm lo tur hian fimkhur rawh se, tih hi ka duh dan a ni.

Pu Deputy Speaker, i phalna leh remtihhain 'First Report of Public Accounts Committee on the Report of Comptroller & Auditor General of India on State

Finances for the Year 2010 - 2011 & 2011-2012' hi he House zahawm takah hian ka rawn present e. Ka lawm e.

DEPUTY SPEAKER : A copy kha han sem ni sela.

Tunah chuan Pu Lalrobiaka Member zahawm takin the 'First Report of Subject Committee-III (2014-2015) relating to Public Health Engineering Department (Renewal and Augmentation of Greater Saiha Water Supply Scheme and Greater Lawngtlai Water Supply Scheme)' hi House-ah rawn present sela.

Pu LALROBIAKA : Pu Deputy Speaker, hun min pek avangin ka lawm e. Subject Committee-III hi din a nih atangin vawi 8 sitting neih a ni tawh a, nasa takin Assembly-in a ngaihtuah piah lamah hma an la a ni. Tichuan Subject Committee-III hian ama chanpual department hrang hrangte thlir a an chanvo theuhte a ngaihtuah hnu-ah PHE Department hnuai Renewal and Augmentation of Greater Saiha Water Supply Scheme leh Greater Lawngtlai Water Supply Scheme te hi zirchian tha a ti a,uluk taka zirchian a nih hnuah report hi rawn siam a ni. Hemi chungchangah hian Pu Deputy Speaker, member-te an hah em em a, vawi 8 sitting neih piah lamah hian a hmunah te kalin, kan member-te Pu J.H. Rothuama, Pu S.Laldinglana, Pu John Siamakunga, Dr. K.Beichhua leh Er.Lalrinawma ten nasa takin hna an thawk a ni tih ka'n sawi duh a ni. He Scheme pahnih te zirchian a nih hian thil tam tak rawn langchhuak a awm a. Pakhatnaah chuan, an contract agreement chhe lutuk leh mumallo lutuk hi a ni. Tuna a lan dan chuan sorkarin pawisa a chawi sa ang a ni a. Lawngtlai project tan a 45% above a contract pekna Law and Judicial Department vet tir a nih laia Saiha project tana contract 75% above a pekna vet tir an nilo ringawt pawh hian ngaihtuahna a tithui hle a ni.

Pahnihna, Contract Agreement-ah hian Contractor interest, safeguard na tur provision tam tak a awm laia sorkar lam interest atana provision a awm si lo te hi Committee chuan tha lo a ti hle a ni. Project hrang hrang Mizoram hian kan nei tawh a, chung kan project-ah chuan kan official-ten kan agreement hi kan chhui chianglo niin a lang a. He project pahnih ringawtah pawh hian contractor te hlawkna tur tam tak a awm

lain sorkar-in hlohtheihna point tam tak kan nei ve leh a ni. He report atang hian department-te inchhuichiang sela kan duh takzet a ni.

Pathumna heng project chungchanga information-ah pawh thil thuhmun ni si information inang lo tam tak a awm a, entirnan project date of completion hi Saiha atan February, 2015 tih a ni a. Contract Agreement nen pawh a inmil a, spot visit-naah chuan March, 2015 a ni leh daih a ni. Lawngtlai atan hian 31st December, 2015 tih a ni a. Contract Agreement ang chuan September, 2014 tih a ni a. Spot visit naah chuan March, 2015 tih a ni. Hemi chungchanga Starred Question 14.11.20014-a Minister zahawm takin a chhannaah khan Saiha hi March, 2015-ah commission tum a nih thu leh Lawngtlai hi May 2015-ah commission a nih thu kan hre bawh a. A eng ber hi nge pawm tur hriat thiam a har hle a ni. A hawn hun tur ang chi te, a hnathawh hun tur ang chi te department Subject Committee a ni emaw House-ah pawh khawi ber hi nge pawm tur tih hriat a harsa hle a, hengte hi kan inchhut chian loh chuan thil fel lo tak leh thil tha lo tak, he ram leh he hnam tana sum tam tak hloh theihna a hun ringawtah pawh hian a ni tih hi House ka'n hrilh duh a ni.

Palina, heng project thawh tura 45% emaw lai departmental work a thawh tur a nih lain department lam hmalakna leh contract work supervision awm mumallo te hian ngaihtuahna a tibuai hle. Department-in information a pek atangte, spot visit Committee in a neih atangte leh department hotute nen discussion neih atangte a Committee-in observation a siamte hi uluk taka zir chian a, recommendation a siamte tihhlawhtlin ngei ni se tih hi Committee duh dan a ni a. Mipuiin nghakhlel taka an lo thlir leh sorkarin sum tam tak a senna project te hi zuzi lo leh tikhawtlai lo va thawh zawh ni thin se tih hi Committee duh dan a ni.

Pu Deputy Speaker, nichina ka sawi ang khan kan agreement te reng reng hi mumal taka kalpui leh zirchian a awm lo niin a lang a, bias deuh hleka agreement te pawh hi sign niin a lang a ni. Point by point, word by word a han examine khan tam tak, a hun thu hlaah te, material te, an tih tur an tih loh avanga penalty pek tur te pawh pek awm chuang lo vin, a nih ang ang khan an ti chho mawp mawp mai ni te pawhin a lang a. Heng hi fimkhur zawka kan kalpui tawh hi committee chuan a duh hle a ni.

Pu Deputy Speaker, i phalna leh he House zahawm tak remtihhain 'First Report of Subject Committee-III (2014-2015) relating to Public Health Engineering Department (Renewal and Augmentation of Greater Saiha Water Supply Scheme and Greater Lawngtlai Water Supply Scheme) of Seventh Legislative Assembly' chu he House zahawm takah hian ka rawn present e.

DEPUTY SPEAKER : A copy kha sem ni sela. Tunah chuan Financial Business-ah kan kal tawh ang a. Discussion and voting on Demand, vawiih hian Minister pahnihte demand kan la ang a, Pu R.Romawia leh Pu John Rotluangliana te chan a ni a. Kan tih thin dan angin an pahnihin la kawp leh mai ila tha kan ti em? Tha kan ti maw? Awle, Pu R. Romawia, Minister zahawm takin a demand te :-

Demand No 6, Land Revenue & Settlement Department	-	cheng nuai 1999.25
Demand No. 12, Parliamentary Affairs Department	-	cheng nuai 53.43
Demand No. 21, Higher & Technical Education	-	cheng nuai 17542.65
Demand No. 23 Art & Culture	-	cheng nuai 1606.50

Avaiin cheng nuai 21201.83 te hi House-ah rawn move sela, ilo sawm ang.

Pu R. ROMAWIA, MINISTER : Hon'ble Speaker, Sir, on the recommendation of the Governor of Mizoram and with your permission Sir, I move the demand Nos. 6,12,21 and 23 for ` 21201.83 lakh only for meeting expenses during 2014-15 in respect of the following Departments :-

Demand No. 6, Land Revenue & Settlement Department	-	` 1999.25 lakh
Demand No. 12, Parliamentary Affairs Department	-	` 53.43 lakh
Demand No. 21, Higher & Technical Education	-	` 17542.65 lakh
Demand No. 23, Art & Culture	-	` 1606.50 lakh
Total	-	` 21201.83 lakh

Thank you

DEPUTY SPEAKER : Tunah chuan Pu John Rotluangliana, Minister zahawm takin a demand no. 17-na, Food, Civil Supplies and Consumer Affairs-ah cheng nuai 26536.49, demand no. 42-na Transport-ah cheng nuai 4475.56, demand no. 43-na Tourism-ah cheng nuai 1538.54. a vaiin cheng nuai 32550.59 te hi House-ah rawn move sela.

Pu JOHN ROTLUANGLIANA, MINISTER : Mr. Deputy Speaker Sir, on the recommendation of the Governor of Mizoram and with your permission Sir, I move the Demand nos. 17, 36 and 43 rupees three hundred twenty five crore fifty lakh only (` 32550.59) for meeting expenses during 2014-15 in respect of the following Departments

:-

Demand No. 17-Food and Civil Supplies & Consumer Affairs ` 26536.49, lakh Demand No. 36-Transport ` 4447.6. Demand No. 43Tourism ` 1538.54.lakh Total ` 32550.59 lakh only. Thank you.

DEPUTY SPEAKER : Tunah Minister zahawm takte pahnihin an Demand House-ah an rawn move ta a, kan sawiho dawn ang a, Member tinte minute 10 inpe leh mai ang aw, tha kan ti maw? Tunge sawi hmasa ang le, Pu Lalthanliana.

Pu LALTHANLIANA : Pu Deputy Speaker, sawi tur nei tlem deuh hian han sawi hmasa ila, a tha ang e. Tlemte sawi ka duh a, Demand No. 21na Higher and Technical Education Department-ten tah hianin kum hmasa lampanga an sum neih ngai mang lohna Grant-in-aid general non-salary-ah hian cheng nuai 7069 a lo lang a. A hma kum 2 belh khawm kha nuai sawm pali singkhat sangruk chauh a ni a, hei hi work program lampang a kan hmuh a tang chuan, tin budget buah pawh hian CSS thar deuh hlek ni turah ka ngai a hei hi thil lawmawm tak niin ka hria a. Sum an dawng thar a ni a sum kan harsat kumah tiang ang CSS an dawng ni a ka hriat hian a lawmawm ka ti a vanneih thlak ka ti a. Hengte hi eng atan nge hman a nih le tih kha ka ngaihtuahnaah a awm deuh a, helaiiah hian work programme kan en chuan a ziaak thla duah mai a hmanna tur hi. Helaiiah hianin pheik 29-na work programme kan en chuan Construction of Annexe building at Lunglei Govt. College leh Construction of main building Block-I for Zirtiri Residential Science College tih kha a ni a.

Hei bakah hian hmanna tur dang te a awm em aw tih kha ka ngaihtuahnaah a awm a, ka zawt duh nghal a. Tin scholarship hi kum hmasa lampang ai khan a lang tlem ta riau mai a nuai 747 chauh a ni a 2012-13 ah khan nuai 5170.26 a ni a 2013-14 ah nuai 6552.39 a ni a tun kumah hian nuai 747 chauh a rawn lang a, scholarship hi pek zel tur ni awm tak ni si hi budget-ah hian a rawn reflect ta miah lo mai a. Hei hi sum dawn tawh la dah hman loh nge ni a, a rawn kal lo hrim hrim nge ni a, rawn la thleng lo la hman lo tih te kha ka ngaihtuahnaah a awm deuh hlek a., kha kha ka'n sawi lang a.

Tin Demand no. 17 leh 43 na Food, Civil Supplies & Consumer Affairs leh Tourism te hi work program-ah hian defaulter tih a ni a, hei hi program siam loh sum hi a awm ve tho si a ka hrethiam lova, hei hi ka'n zawt duh deuh bawk a. Hei thla 8 kan hmangzo tawh a thla 4 dang kan la bak a, defaulter tih kha a ni a hmuhtur dang a awm miahlo mai a, hei hi enge a chhan ni ang aw ka ti a. Tin department dang ang lo takin salaries leh supplies & materials tih bakah chuan in other charges-ah hian Food, Civil Supplies & Consumer Affairs-ah hian sum a tam khawp mai a, henghi engah nge an hman thin le tih kha ka'n zawt duh deuh a. Tangkai taka hman tura dah chu a ni a, mahse ka'n zawt duh deuh hlek a. Kum dang ai chuan a tlem deuh hlek a, tun kuma dah hi nuai 2050.17 chauh dah a ni a kum dang aiin nuai 2496.70 in a tlem a, chuti chung pawh chuan department dang anga over charges a an rawn dah thin ai khan a rawn lian ta lur mai a. Hei hi eng atan nge aw an hman thin ? tih kha ka hre chak deuh hlek a. Tin major work-ah hian nuai 1500 a rawn awm ta lawih mai a kum dang a tlem thin teh lul nen kha kha CSS ni turah kan ngai a, kha kha eng atan nge hman tur tih kha ka'n zawt duh deuh bawk a.

Tourism-ah pawh hian major work-ah khan nuai 1000 a awm a mahse defaulter kha a ni a, work program te kan hmu tlat lo hi enge a chhan ni ang aw tih kha ka ngaihtuah deuh a, kha kha ka rilruah a awm deuh a, ka'n sawi lang ve a ni e. Ka lawm e.

DEPUTY SPEAKER : Tu in nge sawi leh ang? sawi duh kan awm lem lo em ni? a nih chuan Minister te pass kan dil tir mai dawn em ni ang. Pu K. Sangthuama.

Pu K. SANGTHUAMA : Pu Deputy Speaker engati nge sawi chak viau awm hlawm kan ni a, a hnu hnung lam kan chuh ang a kan ti leh vak dawn nge? tih hi ka hre lo a, sawi thuai thuai ila sawi zo mai ila chawhnu lam te pawh chawlh mai theih zawk a ni a. Sawi tur chu a tam a, mahse kan sawi seng lo anga.

Pu Deputy Speaker Demand No. 6-na, Land Revenue and Settlement kha han sawi ka duh chu, tunlai hian thingtlang lamah chhiah khawn mek a ni a, kan hriat danin chhiah khawn hi a hma ai khan a tam riau mai an ti a, hei hi hmannah pawh ka sawi tawh a Pu Deputy Speaker, ` 400 kan chawinaah te ` 1000 chuang te khawn a ni a an ti a. Chhiah hi chawi tur kan ti a, a dik chiah mai a, reasonable deuh hleka kan kal loh hi chuan thingtlang lama retheih dan hi kan rethei khawp mai a, khawpui lam hi chu lo sang deuh pawh chu ni sela, a ziaawm turah ngai ila. LSC ah te thingtlang a rethei lam thlenga to viau hi chuan sawiselna te a tam, harsatna te an lo tawk thin a, hei hi enchian atan a tha khawp mai a, kan Minister zahawm tak khan nakinah min la hrilhfiyah turah ngai ila enchian that zelah a that ka ring bawk a.

Tin, LSC chungchangah hian tunah hian LSC hi khar a ni em ? LSC han buaipui hian a harsa angreng viau mai a, Land Revenue lampang hian LSC hi khar a ni em ? engnge harsatna awm tih te chiang taka han hrilhfiyah theih ni se a that ka ring a, kha kha tawk mai se Demand No. 6-naah chuan.

Demand No. 21-na, Higher & Technical Education-ah hian building tam tak sak a ni a, kan hria a, NEC atangtein pawisa tam tak hmuh a ni a kan hria a. Chutihlaih chuan building thenkhat work progress tha vaklo te a awm a, tam takah chuan work progress te pawh a tha a. Ka bial Luangmual-a Law College khu an progress a tha vaklo niin sawi a awm a, a construction hrim hrim pawh a tha vaklo niin sawi a awm a, tha taka enzui ni se kan zirna sangte kan buatsaih hi a tul a. Ramhlun North College te pawh tha takin an sa a, a lawmawm viauin ka hria a, West College te pawh an sa chho zelin ka hria a. Law Collge ber hi a building sak duhthusam a nilo deuh hlekin an hria a, chak zawka sa thei turin kan Minister pawhin lo enpui ta se, Department lamah leh Contractor lamah te pawh tih kha ka'n sawi duh a.

Demand No. 23-na Art & Culture ah hian sawi tur tam tak phei chu a awm a, mahse thil pakhat chauh han sawi ta ila. Vanapa Hall hi Art & Culture enkawl a ni a, kan ramin kan chhawr em em a, Aizawl mai pawh ni lovin. A building te a lian tawk lova, kum 30 chuang kalta a sak kha a ni a, a building te hi sakthat dan a awm lawm ni? NEC lam atang ten project te siam a, tha deuh hleka vaibelchhe 40/50 vel senga tha deuh taka Car parking te pawh kawng anah siam a, a chung Hall atan tih a Bhavan chhak lam nen te pawh lei khawmin Hall lian tak te hi a sak theih lawm ni, mi 2000/3000 leng te pawhin khatiang tur khan kan en chang hian kan zeldin ve mai mai a. Hengte hi sorkarin ngaihven ta sela a tha awm mange aw, ka ti a. Tunah hi chuan a zim tawh si a, kan leng tlem bawk si a. Tin, a building hrim hrim kum 30 chuang lai a lo nih ve tawh avangin duhthu pawh a sam tawh lova, hengte hi hmalak theihna chi ni sela a tha awm mange aw ka ti a ni.

Tin, Art & Culture hrim hrim hi kan hnam tan hian a pawimawh em em mai a, chuvangin an department-te pawh hi tihlen theih deuh dan a awm em tih te pawh hi enzui chhoh zel ni sela. Tunhma atangin department lian lutuklo a ni a, mahse kan hnam tana pawimawh em em a ni si a, chungte pawh chu kan minister zahawm tak hi ka'n chah duh bawk a ni.

Demand No. 17-na Food, Civil Supplies & Consumer Affairs-ah hian hei, buhfai chungchang hi chanchinbuah pawh kan hmu tam em em mai a, mimir concern a ni a, tuktina ei kan nih avangin mipuite pawh hi thlabar lova kan siam hi a pawimawh a Buhfai-ah te hian. Sorkar harsatna pawh ka hria a, a dik a, kawngte a lo that loh chang a lo awm a, tunah phei chuan kan hriat theuh angin rail kawng tihlen te a lo ni a, hengah hian harsatna tam tak lo thleng thei a ni a, kan zavaia kan tantlan hi a ngai takmeuh a. Kumin kumtir lam te, nikum lamah te pawh kan harsaa kan hria a, Buhfai sem hi thingtlang lam chu an chang tam deuh tur pawh a ni a, khawpui chu tlem chuan kan ziaawm a. Amaherawhchu, tun thal chhung leh kumin kum kalta khan kan harsat dan hrereng chungin Buhfai kha khawpuiah chuan kg 1 ten puitlingah kan chang thin a, mahse na takin kan sawisel

lem lova, kan harsatnate kan hria a, hengah hian kan minister pawh a fakawm khawpin ka hria a, theihtawp chhuahin a bei tang tang a, a beihna zarah buhfai pawh harsatna nei rih lovin thla thum ei lai te kan han chhekkhawla a lawmawm ka ti a. Thahnemngai taka bei zel turin ka'n fuih ve sauh sauh duh a. Amaherawhchu, a sem hi Aizawl hi tunhma atangin a tlangpuiin thlakhatah vawi 2 hi inpek thin a ni a, chutah chuan kg 2 tal te hi chu inpek theih ni se a tha hlein ka hria a, chu chu rilruah lo neih ta se ka duh a.

Tin, Chini leh K. Oil hi chu kan harsa reng a, a harsa tih pawh kan hre chung chungin chini hi thingtlang lama mirethei chuan an ei ve phak chauh a ni a, a man sang kan tih te, pek loh mai tih te pawh hi a awm rual rualin khawpuiah chuan kan lei a, tin, chini lova thingpui in te kan tam a, a ziaawma. Thingtlangah chuan chini loa awm thei lova awm ve si, a leina harsa tak annih avangin hengte hi ngaihtuah chhunzawm theih a ni angem aw, tun aia zing deuha ngaihtuah theihna hi kan sorkar hian a dap thei angem tih te ngaihtuahna lo hmang ta bawk sela.

Tin, K. Oil te pawh hi duh angin kan dawng tam tawkw lova, tin, Gas chungchangah te duhthusam lo lai a awm thin avangin K.Oil ring tam tak an awm a, hengah pawh hian ngaihtuahna lo hmang ta se a that ka ring a. Tin, Gas hi tunlai tak chuan kan ziaawm viau a, a lawmawm khawpin ka hria a, kan minister-in theihtawp a chhuah a. Gas te pawh hi harsat lai chu a awmlo thei lova, chuti chungin theihtawp kan chhuah hi chuan a ziaawm deuh thin ni pawhin a lang a. Ka bial lamah khuan tlemin tunlai hian Gas lamah harsatna kan nei deuhvin ka hria a, agent te pawh an inang vek lo thei a, an hmuhdan pawh a inang vek lo thei a, Gas chungchangah hian kan harsatna hi ziaawm chho zel turin theihtawp chhuaha tan lak hi a ngai lehzual dawn niin a lang a. Tunah phei chuan Gas lak dan turah hian thuthar a lo chhuak lehngal a, a man pangngai subsidy lova pek tawh tur tih te a lo awm a. Tin, bank atanga rulh leh tur tihte a awm a, a harsa viau mai dawn a.

Tin, BPL chungchang hi, BPL hi a tlem zawnga, kalzel tur kan nih laiin kan tam zawk zel mai a, hmanlai atangin tunlai thlengin, hei hi a tha lo viauin ka hria a. Kan ramin hma a sawn chho zel a, tin ei leh bar kawngah hma kan lo sawn chhoh zel avangin BPL hi tlem hret hret tur hi kan tlem thei lo a ni a. Pu Dy. Speaker, tawitein an sawithat duh loh kha ka'n zo leh mai dawnin a lang a.

Transport hi kamhnih khat leka han sawi leh ka duh a. Taxi permit hmanna kan ngaihtlak tawh ang khan reitak lo nei tawh te khatiang ang kha renew leh theih tawh loh ang hrim kha chu ti mai ila, a chhe thlakna kha chu a tha lo khawpin ka hria a. Taxi hi mi eizawna a ni a, hemi ka lak ve lai pawh khan ka rilrua lo awm ber thin chu Taxi pakhat kan pek hian chhungkaw pahnih eizawna kan siam a ni a, Driver leh a neitu tih kha ngaihdan lian tak ka nei thin a. Chuvangin hei hi ngaihtuah nawn leh se a tha awmin ka hria a, a chhe han thlak tur tih ngawt te pawh kha a tha ber dawn em ni ka ti a. Bus te pawh permit an nei a, chutiang zawngin kan kalpui si lova, tin, Maxi cap te pawh kan kalpui awmin ka hre si lova, chungte pawh chu hetiang permit nei hi an ni a, chu chu rilruah lo nei se a tha awm mange aw, ka ti a.

Tin, Tourism Privatise hi a tha khawp mai a, chuvangin hei hi tluang taka a kal theih chuan kan insensona tam tak pawh hi a phuhruk theiin a rinawm. Awle, Pu Deputy Speaker, ka lawm e.

DEPUTY SPEAKER : Tunge sawi leh ang? Pu P.C. Zoramsangliana.

Pu P.C. ZORAM SANGLIANA : Pu Deputy Speaker, tawi te te sawi ka duh a. Demand No. 6-na Land Revenue & Settlement chungchangah hian thingtlang ami tak tak Survey leh peg te pawh khen vek tawh, vawiin thlenga la tihfel loh awm, Minister zahawm tak hnenah leh Department hotute hnenah pawh kan bial Kolasib ami thehluh tawh te kha khawngaih takin mipui miretheite harsatna hriaa min tihfel sak turin ka ngen duh a. Chu te mai chu ka duhtawk ang a.

Demand No. 21-na, Higher & Technical Education chungchangah hian ka hmaa member zahawm takin a sawi ang khan building engemawzat sak a ni a. Ka bialah pheih chuan kan hotuten an duhsak a, College zirtirtu Association te building an sak tir a, khumi tak mai khu min enngun sak turin ka duh a. Estimate angin an zo dawn lo hian mipui vantlangin an ring a, Concrete hna hrethiam lo keini ang chuan kan hrethiam vak lo va. Bial han kal nikhua leh biala mi chinchang hria te ti ti han ngaihthlak reng reng hian an zo lo dawn nasa a, thu neitu an tam lutuk a, chuvang chu em ni an ti a. Hemi tak hi chu min vil ngun sela, a tira an sawi hmang kha chuan a Estimate chhung bakah chhawng khat dang kan sak belh thei ang, tih hial kha a ni a, chumi hria chuan kan sum leh pai dinhmunte ngaihtuahin kan hotute khan duhsak takin College Zirtirtu Association te an han sak tir kha a ni a. An hlawhchham ang tih ka hlau khawp mai a. Hmun dang dangah pawh a hlauhthawnawmin ka hria a chu chu ka sawiduh a.

Demand No. 23-na hi kan hotute kum 5 lai min lo enkawl tir tawh Art & Culture Department hi a ni a, he Department kaltlanga Mizo thangtharte rilrua Pi /Pu te sulhnu leh kan culture leh kan tradition te humhalh duhna lo lian ta em em mai leh Cultural Revolution hial lo thleng hi lawmawm ka ti takzet zet a. Mizo thalaiten khawvel hriatah kan hnam lam mawi tak Cheraw hmanga world record an siam rualin, ka sawi fo thin angin, Mizo hmeichhiaten colour combination an lo thiam zia hi khawvel hriatah he Department te reuh te kaltlangin an pho chhuak a, chu chu phat rual a ni lo. Hmun tinrengah, India in 19th Commonwealth Games New Delhi-a thlen pawh khan, India contingents te hmahruaitu khan, Mizo nula incheia incheiin Vakiria khim, kawrchei ha, puanchei bihin hma a rawn hruai khan, kei, a hmuna lo en ve ka nih avangin ka insum zo lo a, “Haleluiah, Praise the Lord” ka lo ti hial a ni. Chutiang chuan kan hnam zia rang he department te reuh te hian a pholang nasa khawp mai a.

Amaherawhchu, kumin Budget hi kan en a, mitthlaa kan thlir hian hman theih tur hi chu nuai 50,65,000.00 chiah niin ka hria, ka chhut thiam ve danin, dik ni maw? Chumi a lo nih chuan nuai sawmli leh pasarih kan hmang tawh an ti lehngal a, nuai thum leh singruk leh sangnga hi an la neih a ni a.

Tin, Rural Library, hun hmasa lamah sawmsarih chuenglai kan lo sak tawh te, chumi a Mizoram sorkarin a zuk tumna tur nuai sawm takngial pawh awmlo a kan Minister an thu hi chu ka khawngaih khawp mai. Kan hotuten ngaihtuhsak a Rural Library min pe theitu Raja Ram Mohan Roy Library Foundation te hian hetiang nuai sawm te kan zuk thawh ve hian nuai sawmkua lai min lo belh ve thei a, chutiang a nih avangin kum nga kalta lawka Zoram hmun hrang hrang hmun sawmsarih vela Library, Aizawl khawpui chhung pawh huamin Art & Culture Department te hian an sak theih phahna kha a ni a. Chuvangin helai hi ngaihtuah chian a pawimawh a, kan hnam history ziak leh lehkha ziak thiamte tana malsawmna awm thin ang te kha a awm ta lo va. Tin, chutih rual chuan nuai 350 heritage conservation atana 13th Finance Commission-in an dah te lah hi thil danga pawhpen chi a ni hauh lo mai a. Chung atan chuan Pi/Pu te sulhnu i ti mai ang, thil chi hrang hrang humhalhnan leh chei that nana dah bik kha a ni a.

Kan hre theuh ang a, vanduaithlak takin kumin thal lai khan Mizoten kan ngaihhlut tak mai kan Zawlbuk te leh kan Lal in Falkawna he Department-in a lo sak kha an kangral vek mai kha a ni a. Heng sak chhunzawm lehna tur atan hian hengah hian an dah ngei ka'n ring ringawt a. Pu Chairman, Art & Culture bikah hi chuan tlemin kan hotute hian duhsakna revised estimates-ah kan pek hram loh chuan kan thlaiten 2015 Chapchar Kut hmanna tur pawisa pawh an nei lo. Mizo Kut ropui ber Chapchar Kut hmanna tur pawh pawisa kan neih loh chuan engtin nge ni ang le? Chuvang chuan, Thalfavang Kut te leh thil dang dang Mimkut te pawh hman an chak tawh tehlul nen hetiang an neilo hi pawika ti hle a, chuvang chuan revised estimates-ah tal hei hi rawn telh se ka'n duh a ni.

Tin, Demand No. 17-na Food, Civil Supplies & Consumer Affairs Department-ah hian a bik takin Minister ka congratulate duh a ni. A hmalakna hi a lawmawm ka ti a, a hmalakna ka hriat hi a dikin ka ring a. Reilote thut atangin department staff-ten Buhfai quintal khat leh chini Kg 10 thla tin a department a thawk tinreng ten an lo neih thin zawng zawng huaisen taka an titawp ngam ringawt pawh hian, Mizoramah hian buhfai leh chini pawh hi a tihtam phah a. Rawtna dang awmah chanchinbu-ah te pawh kan lo hmuh thin, VIP hrang

hrangte leh quota nei ten kan quota hi surrender a, mipuite tan ti a surrender-na tura ngaihtuahna a awm kan lo hriatte pawh hi vawiinah hian tan rup mai sela. Zokhua leh miretheite an van lawm dawn em ve aw!! Department-ah bul a tan tawh a, chutah keini MLA te ngei, lo dawng mek thin atangte pawh hian han tan ila. Mipui hmaa kal tur te hian bul kan tan ngam phawt chuan he Mizo nun hi nun zahawmah min siam ang tih ka ring a. Damlohna avangin India ram hmun hrang hrang Damdawiin-ah te ka awm thin a, February thla tir atanga April thla chanve chhung Kolkata Medica Hospital-a ka awm te khan, helaia Ration leh Barabazar a buhfai tlawmte tea kan lo lei thin ang lei tur hian khulai Mukundapur, Kolkata, Medica Superspecialty Hospital velah khu chuan kg-ah ` 35 tih te lo chuan lei tur a awm lo va, Ration Card an nei em tih kan in luah thenawmte kan han zawh te hian an hre mang reng reng lo a ni. Chutiang chu kan nih avangin helaiah mipuite harsatna hriaa tunah pawh Mega block awm hial chung mahin thla thum tla buhfai han chhek khawl te hi lawmawm ka ti takzet a, amah Minister mai bakah Department officer tinreng te inpekna hi House-ah hian fak phuin ka hria a, chuvang chuan ka'n fak duh a ni.

Transport Department-ah hian ka'n sawi duh mai mai chu, lehkha ziate en uluk a ngaih zia hi he Department atang hian ka hre chhuak a. Union Minister in Bus te chi 25 min pek tum khan 1st Installment-ah a rawn thleng a, chumi lehkha kan lo en uluk lo khan 13 kha kan order chauh mai a, 25 kha kan order vek anga 2nd & 3rd Installment-a lei zawh tur kha a ni a, chumi zawhah a dang kan han order tur kha 25 nos kan order loh vang khan a dang kha kan chai chhuak hlei thei lo a ni a. Tun hnuah hian an chai chhuak ta em ka hre lova. Chutiang chuan lehkha en uluk te hi a pawimawhzia ka ngaihtuah chhuak a. Chungte avang chuan Mizoram hian Bus 13 lai a chan ta ringawtin ka hria a. A pawiin a uiawm hle a ni. Mahni ngeiin kan tihsual pawh ni mahse, khatiang kha awm tawh lo se.

He Department hi Christmas a lo ni dawn a, hmanna zawhna kan Minister-in a chhan ang khan, khawtin hmun tin ami hian Transport Department bawh hi a ni an rawn belh leh dawn ni. Chutiang hunah chuan theihpatawpa an harsatna te, an Bus neih tlem ziate, leh kum 15 a upa tawh te kha a ni a, mahni bial mipuite phur atan hian a itawm vak lo a nia. Dik takin kan han inhnawh vak zel mai bawh si a,

kawtchhuahah an lo chan belh a, khatiang reng reng kha a ni a. Chuvang chuan an dinhmun hi kan hriatpui a ngai hlein ka hria a.

Pu VANLALZAWMA, CHAIRMAN : Lo ngawi lawk teh tikhan minute 8 i hmang tawh a ka thut hnuah a hmaa i lo hman kha chu senior member nih manah kan chhiar tel lo anga, minute 2 ah zawh i tum dawn nia.

Pu P.C. ZORAM SANGLIANA : Demand No. 43-na Tourism Department pawh hi an kal dan phung hi thlak danglam a niin ka hria a, chumi tak chu ka lawmna a ni tel a. In sak vak vak hmun hrang hrangah, mikhual thla khatah vawikhat pawh thleng tur awm mumal lohna tur ka sawi سوالin ka ring lo, Tourist In sak vak vak ai chuan, neih sa tuna awm ang ang te pawh, Privatise an han tum a, mimal eizawna, In lo sak tawh hmang khan an siam dawn a ni a, hengte hi ngaihtuahna fing a va ni em ve aw ka ti a ni.

Tin, chutih rual chuan vawiina awm ang ang Department-in a enkawl tura receptionist te leh staff te hian politeness i ti mai ang, an uar deuh zual hi thain ka ring. Krismas kan thleng tep dawn tawh bawka. Hmanni chu Touridge Lodge Chaltlang ami khi hman ve duhna avangin ka han leng a. Chuta Reception lo awm hnenah chuan ngenna ka siam mai mai a. Hei Krismas te a hnai tawh si a, mikhual chhuak tur leh lo lut tur te hi “Wishing You a Happy Christmas” tiin lo welcome-in lo thlah liam ni ula, Mizote sakhua (kristianna) tihlanna a ni bawka dawn si a. Khawchhak rama kan zin tumin Kristian ram ni miah si lovin Thlawhna leh Hotel atanga kan lut kan chhuak tur hi Krismas hlim taka hmang tur leh Kumthar lawm tak leh hrisel taka hmang turin min wish thin hi lawmawm ka ti khawp mai a. Kan Mizoram-a kan Tourism Department te hi kan hnam lanna an ni em em mai a. Mikhual ni se tunah report kan ngaithlak thin atangin ram dang mi, India mi chauh ni lo pawh an lo lut hnem ta hle a. Chumi avang chuan Pu Chairman, hemi hian tan la lehzual se, a dang tam takah pawh tan an lak te hmuh theihin a lo lang tawh a. Chuvang chuan vawiina kan senior Minister-te pahnih Demand hi lawm taka pass pui tlak a ni a, ka han support a ni e, ka lawm e.

Pu VANLALZAWMA, CHAIRMAN : Tunge han sawi leh ang le, aw le, Pu Ngurdingliana ilo sawm ang.

Dr. NGURDINGLIANA : Pu Chairman ka lawm e. Demand No. 6, Land Revenue & Settlement-ah hian sawi tur thui lutuk chu ka nei lova, amaherawhchu, ka'n zawh duh chu kan Minsiter zahawm tak hian Land Ceiling kha a ngaipawimawh thin viau a. Public Meeting-ah pawh a sawi thin a, hei hi nakinah a wind-up hunah engtingge hmalak a tum tih te min han hrilh sela.

Tin, tunlaia chhiah khawnah hian a bituk hi a inang lo em em a, ka bialah pawh Aizawla ` 200/- a an lak kha ` 500/- a lak te pawh a awm a, hei hi uniformity a awm lo deuh em ni? tih kha ka rawn zawt bawk a. Tin, Aizawl huam chhungah periodic patta tam tak a la awm a, kei pawhin ka nei nghe nghe a, hei hi LSC ah convert theih dan te a awm ve tawh em tih te ka rawn zawt a. A tlangpui chuan Land Revenue-ah chuan zawhna tam tak ka nei lova.

Demand No. 21-na Higher & Technical Education-ah khan Major Works-ah khan cheng nuai 900 dah a ni a. Hei hi Major Works kha eng ang nge a cover tih kha min han hrilh thei se ka duh a.

Tin, hei Mizoramah College hrang hrang kan han nei a, Principal appointment-ah hian kan thiante leh Lecturer-te ka han rawn hian Principal atan hi chuan Ph.D ngei ni se tih hi Rules-ah hian awm thei se tih hi a ni a. Chu pawh chu min lo hriatpui se. Tunah hian kan hriat tur chu kan vannei a, kan hotute hmalaknaah Mizoram University leh kan College te hi a quality hi a sang lutuk, Symposium Seminar eng eng emawa ka kal hian ka hre nghal mai. Naupang zirlai an inter act question an han siam reng reng hian State dang pawh kan tluk tawh a ni. Chumi tithang zel tur quality education, Education Form Commission kan din rah chhuah niin ka hria a. Chuvangin kan tu leh kan fate pawh hi phaia dah vak vak hi a tul vak tawh lo a ni. Hma kan sawn a ni. Chumi tithang zel tur chuan Principal te eng eng emaw Rules and Recruitment-a kan Minister hian min ngaihtuah sak se tih kha ka duh a.

Tin, Art & Culture chungchangah khan kan Minister zahawm tak term hmasa a Pu Zoram Sangliana khan hma min lak that sak a, Heritage Conservation chungchangah pawh Tourist Lodge hi a ni deuh vek mai tawh a, ka bialah pawh hmun

li hmun ngaah min siam sak a, zin veivak te pawhin an han tlawh a, thla te an han la a a. Pi pu sulhnu hlutna te a sang zuala, a lawmawm a, hei hi chhonzawm zel ni se a tam thei ang berah tih kha ka'n ngen a.

Tin, Library chungchangah khan Art & Culture-ina Library Zo khaw lama min din sak hi a tangkai lutuk ringawt, ka Bial chhunga khaw pakhatah Politics thil deuhah kan zin a. Thu ka sawi hma khan tlangval pakhat hian ka pu "Hmanniah khilai Art & Culture Library a ka han chhiar USA President inthlan dan ka chhiar a, ka hrethiam si lova min han hrilhfiah teh" a ti a. A ril ka ti lutuk a, ka lawm lutuk a, kha Library a a han kal a, a han chhiar atang khan USA Presidential Election kha min rawn zawt daih mai a ni. Kha kha hmasawanna Zokhaw lamah mentality a an hmasawanna kha a tisang a, chuvangin hemi Library chungchangah pawh sum leh pai dah hnem ula, Zoram khawtinah a tam thei ang ber din tur khan kan duh pui che u a, ka'n ngen bawk che u a ni.

Food, Civil Supplies & Consumer Affairs-ah hian ka'n sawiduh chu, kan Minister leh Secretary, Director leh Staff zawng zawngte, tin, term hmasa Pu Rohluna kaihhruaina kal dik kha ala kal dik zel a. Tunah chuan bill pangngai takin lak a ni tawh a. Ei leh inah kan hnianghnar a, gas-ah te pawh. Keini te pawhin Ration pangngai pawh lak ngai lo khawpin kan hnianghnar a ni, a lawmawm a. In hma thlirna te, in hmangchang hriatna te lawmawm ka ti takzet a. Tang zel ula, tuna mega-block kan neih boruakah pawh in mawng pawh in hung hman mang lo, khawi khawiah emaw in zin zoram mipui kan riltam ang tih hlauin. Hengah te hian in thahnemngaihnaah lawmthu ka sawiduh bawk a.

Transport leh Tourism hi ka'n chawhpawlh ang a. Transport-ah tunah hian hma thar in la dawn a ni awm a, Maxi Cab stand pawh in sawn dawn a ni awm a. Hengte pawh Counter system te leh ticket booking chungchangah te fel fai takin ruahmanna in siam niin ka hria a, a lawmawm a, kha kha kalpui ula. A bik takin Transport pawh hi hmanna School Education subject kan sawi laia downsizing kan tih ang deuh hian Transport pawh hi kal thiam ila. Corporation system a mimal, public (mipui) hnena dah

thiam hi a tha khawpin ka hria a, tunah pawh hma in la niin ka hria a, a lawmawm a. Tourism chungchangah hi chuan kei chu lawmthu sawi nasa ber tur niin ka hria a.

Khi kan Bialah Privatization kal zelah Khanpui pawh kan tel ve a. Tin, chumi piah lamah Vanzau-ah In ropui deuh kan siam, tunah hian kan Tourism Minister zahawm tak hian Tuirini lei atang khian khualzin mite hip thei turin Footpath min siamsak dawn a. Khitah Khawruhlian tlangdung Khanpui te a rawn vet ang a, Chalfilhtlangah a rawn chho ang a, Chalfilhtlang atangin Tualbungah Footpath bawk a chhuk leh ang a. Tualbungah khualzin mite riahna tur chuan Dilkhanah chhukin, chutiang tur chuan ruahmanna min siamsak a, a lawmawm ka ti em em a. Tourism Minister ni tur hi chuan hmathlir nei bakah tlema mit lerh deuh hi alo ngai niin ka hria a. Kan Minister hi chutiang zawng chuan hmachhawp hi a thiam khawp a, a lawmawm a. Chuvangin a hmalakna zawng zawngah ka lawm a ni. Kha kha vawiina Demand-ah chuan ka sawi tawh ni mai rawh se, ka lawm e.

*Speech not corrected.

Pu VANLALZAWMA (CHAIRMAN) : A lawmawm e, Pu Vena hi nichin pawh khan a phar tawhin ka hria a, pe phawt mai ang helaiah Pu Dailova a awm nachungin.

Pu R. VANLALVENA : Pu Chairman, ka lawm e. Vawiinah kan hriat theuh leh sawifo thin angin kan budget hi chu kan duhthusam a ni lo tlang a ni tih kan hre tlang viau a. A chhan pawh kan sawi fo tawh a, keini lamin duh ang tawka ti thei kan nih loh zia kan sawi tawh a. Khalam kha chu han sawi thui lutuk tur awmin ka hre lo va. Amaherawhchu, kan Minister zahawm tak takte Department enkawl leh helaia an hmalakna lo lang hrang hrangte sawi zau ka'n duh zawk mah mah a, khalam kha tul zawka ka hriat avangin. Tin, kan PAC Chairman zahawm takin report a rawn pek khan ka rilru a khawih khawp mai a. Kum hmalam kal tawha an hmalaknate a Report a, an thawk rim hle a ni tih a lang a. Mahni bial pawh en hman mang lovin vawi tam tak Committee an nei a. CAG Report atanga lo lang te enzuiin recommend te an han siam a, a ngaihnam kan ti dawn nge, a ngaihnam loh lam kan ti zawk mah mah dawn ka hrethiam chiah lo va. Amaherawhchu, kan hmasawn zelna tur atan chuan a pawimawh khawpin ka hria a. A report kan han ngaihthlak khan kan budget te kan hmang mai mai

deuh a, Department thenkhat an fimkhur tawk loh zia te an hmu a, an rawn tarlang a ni. Pu Deputy Speaker, PAC report kan ngaihthlak atang khan hmasawn tul zia te, fimkhur a ngaih zia te, Department tam takin fimkhur vak lo va pawisa an lo hman mai mai thin, CAG Report-in a rawn tarlan leh thin thu, hrehawm a tih thu leh hetiang ringawt hi chuan kan inziak ral mai mai lovang tih a hlauhawm tawh a ni tih thu te, fimkhur a ngaih thu leh thahnem a ngaih thu a rawn tarlang a. Kha khan thui tak kan kal zelna turah min kaihruai se thain ka hria a, fimkhurna thar kan neihna tur niin ka hria a ni.

Tun tum kan Budget hi India ram pumin budget a rawn her danglam CSS Plan Fund a a rawn her luh tak te nen pawh hian hei hi a kal kawp thei em aw ka ti a. Hemi kan budget rawn inher danglam hi tun kum atan chuan kan sorkar hian a tuar deuh a nih pawhin kum lo kal leh zel turah hi chuan kan fimkhur phah te ka beisei a. Kan thatpui mah zawk awm mang e aw ka ti a, keini state mai ni lovin India ram pumpui hian kan thatpui awm mang e ka ti. Chulai chu thuhma angin ka'n sawi duh a, Pu Deputy Speaker.

Demand No.6-na Land Revenue & Settlement-ah hian tlem kan Minister zahawm tak te hmalakna, thahnem ngaihna hi fak tlak tam tak awmin ka hria a. Fakna leh hmalakna kan duhthusam a nihna te sawi vakna hun a awm lo va, minute 10 chhung chauh a ni a, Department a tam bawk si a. Tax lak tur hrang hrang han en hian lawmawm hlein ka hria a. A bik takin thingtlang lam harsa zawk te hnen atanga tax lak tam aiin kan mi hausa zawkte hnena chhiah lak tam dan tur kha kan Rules-ah hian hmuh tur a awm nualin ka hria a. Helam hi kan state own tax revenue tihtamna tur atan pawh hian tul khawpin ka hria. Entirnan, kan mihausaten huan ram enkawl loh ram zau tak tak an nei a. Chumi laka chhiah an lak dan tur kan hmu thei a. Entirnan, ram enkawl loh ram zau tak an neihah chhiah an han lak dawnin emaw, House site-ah te an han plan dawnin, LSC-ah te an han siam dawn khan an ram hmun 100 a thena hmun 40 te, hmun 100 a thena hmun 30 te sorkar ramah an chhunluh a ngaih thu te kan hmu. Tin, chhiah an pek loha an enkawl loh a, an dah mai mai chuan kum 3 hnuah chuan a let 7 in chhiah a pung ang tih te. Kum 7 an neih mai mai chuan a let 15 in a pung ang a, kum 9 an neih pheih chuan a let 25 velin a pung ang a, kum 10 hnuah pheih chuan cancel theih a ni tih te kan hmu a, khalai te kha a tha khawpin ka hria a. Amaherawhchu, miin a ram a enkawl erawh chuan emaw

a enkawl thu Revenue Department-ah te a rawn report chuan, a rawn claim chuan khatiang kha chu la sawi zui theih a ni dawn a. Khatiang ram zau tak nei enkawl si lo ten chhiah tam tak tak an chawi ai kha chuan an ram kha mipui tan an surrender duh maiin a rinawm a. Heng ruahmanna an han siam te hi a tha khawpin ka hria a. Theihtawpa chaka kan kalpui pawh tulin ka hria a ni.

Tin, hming thlak dawnin kum 10 tal LSC a nei tur a ni tih kha chu a ennawn leh theih em aw ka ti a. Miin ram a neih tawh chuan kum 10 a ral hmaa hmingthlak loh lai kha chu a ta a nih tawh chuan kum 2 kum 3 vel te chu ni se a ziaawm viauin ka hria a, kum 10 lai erawh kha chu a tam mah mah em aw ka ti a, khelai te kha chu ennawn atan a tha zawk em tih ngaihtuahna chu ka nei a. Tin, an Department hian an la mamawh em em an rules-ah pawh kan hmuh theih, mahse an la hlawhtlin theih chiah loh lai chu Revenue Tribunal an mamawhin ka hria a ni. Kan hria a, ram inchuh, inkhin hi a tam em em mai a. Court hmaa an kal chuan a hre chianglo zawktuten emaw Ukil hrang hrang an han rawih khan thutluk lohna lam tura thutluk mai palh hi a hlauhawm deuhin ka hria. Chuvangin, anmahni department hian anmahni a sawifel mai theih dan tur kha awm thei ta se, a bul te atanga hma lo la a, lo enkawltu an nih avangin finance lam hi an mu tan niin ka hria a, tanpui theih ni se a tha awm mang e aw, ka ti a. Khalai kha kan minister zahawm tak hmalakna hrang hrang han sawi zau pahin rawtna ka'n siam duh a ni.

Tin, a dawt lehah chuan Higher Education Department chungchang kha nichin khan kan minister zahawm tak tak ten an sawi tawh a. Higher department-ah hian Aizawl bikah College kan indaih lo khawp mai a. Aizawl College-a College kal deuh vek hi kan tum mai si a, thingtlang lam hmun harsa deuh zawk atang pawhin Aizawla College tha zawk na na na chu luh nan kan duh a, Aizawl hi thuam chak deuh, tihchangtlun deuh mai hi tul khawpin ka hria.

Republic-ah khuan, T.Romana College a awm a, tunah khuan building an sa mek a, a tawt em em mai a, a building tuna sak mek pawh khu sa zo se tihngaihna a awm chuang lova, a ram khuan a daih thlawt lova, school naupang an ngah si a, an leng lo nasa em em a, a thlangah khuan AH & Vety Department hian ram zau angreng tak mai

an nei a. Kan House Leader zahawm tak hnenah pawh hian dilna te kan thehltut tawh a, khu khu Higher ho leh AH & Vety Department hian a ram hi inthleng thei sela tha tak ve ve hian a function theiin ka hria a. A thlang lawka AH & Vety Department khu T. Romana College din nan hmang thei ta ila, AH & Vety hian T.Romana College building sak mek, concrete tha tak mai khu han luah chho thei se chuan hlim leh lawm takin kan awm ve ve awm mang e aw, ka ti a. Kan Minister zahawm tak lah chu a ngawi tlat mai si a, min tihsak thei em ang chu maw. Kha kha min hriat zui sak turin leh an hmalak zelna kha tihhlawhtlin theih a ni ang chu maw tiin he House zahawm takah hian ka'n sawilang duh a.

A dawt lehah chuan Food, Civil Supply & Consumer Affairs hi a lawmawm khawp mai a, kan minister zahawm tak thahnemngaihna leh a tanna, rilru a pe em em a ni tih ram pum hian kan hria a, hma pawh kan sawn khawpin ka hria. Kan thar chhuah ni miah lo gas te hnianghnar taka neih kan han tum tlat zel a, kan tih awm tak pawh a ni tho va, chung hniang hnar taka kan neih theihna tur chuan kan minister hian theihtawp a chhuah a ni tih kan hria a, a fakawm takzet zet a ni. Nichina kan member zahawm takin a sawi ang keimahni helaia thu hovin VIP quota kan neih te pawh hi nei lo mai ila, mi harsa zawk hian heng hi nei se tih a duhthu te pawh chanchinbuah kan hmu a, hetiang, a hmalakna leh ngaihtuahna a hmang hi a fakawm hle a ni.

Tin, amah bawh hian a sawi fo thin Mizoram population ai hian Ration Card-a mihring inziaklut hi nuai khat bawr velin englai pawhin an tam reng a ni tih a sawi hi chanchinbuah kan hmu thin a ni. Hengte pawh siam rem tumin theihtawpin tunah hma an la a, a lawmawm khawpin ka hria. Mihausa zawk leh awm thei zawk ten keimahni chanvo, anmahni chanvo sat thla a, mirethei zawk te tana pe tur zawnga hma an la te hi a fakawmin ka hria a.

Chutih lai chuan Pu Deputy Speaker, kan Taxi permit pek dan system hi chu tlem sawi ngai awmin ka hria a, siamthat hlek theih a ni em tih ka ngaihtuahnaah a awma. Taxi permit kan pek dawn hian sorkar hnathawk tan dil theih a ni lo tih fiah takin a chuang kulh mai a. A tih dan tur hrang hrang an siam 11-naah hian 'in chhungkaw member-ah sorkar hnathawk an awm em?' tih hi a awm a, a chhannaah hian awm/awmlo

tih a awm a, tin 3-naah hian engvang mahin he provisional permit hi renew theih a ni lo, permit dam hun chhung ngeiin motor an lei tur a ni tih te, 4-naah chuan he permit hi zawrh, inhmanhawh tir, hming thlak khap tlat a ni tih te kha a awm a ni.

Election dawn emaw, Election hma hrim hrim pawhin taxi driver ho hi ka kawm nasa khawp mai a, tun hnuah pawh ka kawm tam tho va, hemi ka kawmte hi mahni motor khalh lo, mi motor khalha nitina inhlawhte an ni. An hlawh hi a hniam khawp mai a, chhungkua an chawm a, in luah man te an lo chawi bawh a, mi motor khalhtuten an harsatna hi he House-a sawi vek remlo khawp hialin an harsa a ni. Chumi a nih avang chuan heng mi motor khalha inhlawhte hnenah hian taxi permit te hi pek theih zawk dan a awm lawm ni ? Heng harsatna namen lo, sawi pawh hrehawm zawk khawpa harsa ho hnenah te hian taxi permit hi pek theih ni ta se. Vawiina kan dan neih lai mekah sorkar hnathawk tan a dil theih loh tih ang deuh hian hengho chhawmdawlina tur leh kan society pawhin a thatpui theihna tur zawk kawng hial hi a awm hian ka hria a, hetiang zawng te pawh hian hma hi a lak theih lawm ni tih kha ka rilruah a awm tel a, khatiang zawng te khan hma la ta ila a chi zawk ang a tih ka ngaihtuahnaah a awm a ni.

Pu Deputy Speaker, sawi vakna hun a awm lo va, hun a tlem em em a, a tawp berah chuan Tourist Department in an Tourist Lodge privatize an han tum te hi a fakawmin ka hria a. Dik tak chuan kan hria a, thingtlangah te, hmun hrang hrangah Tourist Lodge kan han nei a, a nghaktute hlawh hi a la chhuak meuh lo, chutiang a nih chuan kan rethei zel dawn tihna tluk a lo ni a, privatize an tum hi a lawmawm khawpin ka hria. Sawi tur tam tak ka la nei a, amaherawhchu hun a tlem si a, a khaikhawmnan erawh chuan kan minister zahawm tak tak te demand hi pass theih ni se tih ka han rawt a ni e, ka lawm e.

Pu JOHN SIAMKUNGA : Pu Deputy Speaker, ka lawm e. Vawiinah Demand kan sawiho laiah hian Land Revenue & Settlement Demand No 6 hi tawite sawi ka duh a. LSC siam man a sang tih leh a harsa tih te kan hre thin a, rules te ngun deuha kan chhiar leh kan bih chuan ram chu sorkar ta a ni a, a neitu chu sorkar a ni. Mimal hnenah kumkhuaa a hlan tawh dawn avangin LSC man hi chu tlemin lo tam ve pawh ni se a awm

tawhin ka hria a. A chhan chu, kha ram kha LSC a an han siam tawh khan sorkar ta a ni tawh lova, mimal khan a thlah te thlah leh chhawng thlenga a hlan tawh tur a ni.

Tunhma khan zahnih khat te, za pawh tling manglo ten LSC kan lo siamtir thin a, ram kha sorkarin mimal hnena hun awm chhung zawng a transfer tawh dawn avangin vawiina ‘siam a harsa kan tih leh a sang lutuk mang e’, kan tih hi chu a ni thei lovin a langin ka hria a. A chhan chu, tuten emaw an LSC an rawn phel ta a, an LSC an phelah khan tunhma ang kha chuan cheng tlemte sorkarin a buaipui nan a tum tir a, an va hawng phei a, reiloteah nuai 40/50 in an va hralh leh si a ni. Sorkar ram khawilai ami emaw an han dil a, an han LSC a, a hnu lawkah a nuai sawm tel takmeuhin an hralh leh si a, chuvangin LSC siam man to ta a kan ngai hi a to ta ni lovin a nih tur phung dik takin a kal ni zawkin a lang. Chuvangin hei hi tih awm tak a niin a khirh tur a ni. LSC hi a neitu khan a damchhung mai nilo, a thlah chhawngte thlenga inrochun thlak zel tur a nih avangin tihsual palh hi a hlauhawm em em a, chuvangin a khirh pawh hi a khirh tur a ni a, a san pawh hi a sang deuh tur a ni tih hi ka ngaihdan a ni. Tin, tunah chuan vawiinah land record te an computerized vek tawh a, khawilai lai emaw LSC inpek thuah tih te kha hei hian a tibo tawh turah ka ngai a. Chu chu ka rawn support a ni.

Tin, Higher & Education-ah hian tlemte sawi duh ka nei a. Librarian nghet neilo College hi 11 lai Mizoramah hian an la awm a, neilo kan tam viau a ni. Chuvangin, helamah hian sorkarin hma an la thin a, department ang pawhin. Amaherawhchu, kan dinhmun te a khirh avangin librarian lak theih kan la nei lo a. Heti chung hian sorkarin a bei zel a, keini pawh kan bialah Hnahtial College-ah pawh hian kan nei lova, lak theih hunah chuan kan minister zahawm tak hian min hre reng turah ka ngai a.

Tin, lecturer indaihlohna a nasa em em a, College hrang hrangah kan indaihlo nasa a ni. Tehkhin nan subject 1 kha Core subject atan an lo la duh a nih phei chuan mi 2/3 lek pawh ni se, a zirtirtu kha 3 emaw tal an awm a lo ngai thin a. Chuvangin, sorkarin mi tlemteah khan sum a invest hnem em em mai a ni. Chumi a nih avang chuan sorkar hian rilru dang pu thei ta sela, college hrang hrang, a bikin khawpui chhung tih loh, thingtlang lamah hi chuan an hmingthat ve dat theihna turin department 2/3 lek hawng ta sela, chu chu zirtirtuten, lecturer ten hneh deuhin enkawl ta sela,

chutiang chuan College hrang hrangte hi han tilui se chuan lecturer chuang kha an tam viau ang a. Asst.Professor an ni emaw, Associate emaw, Professor pangngai pawh chuang an tam viau ang. Khang kha an mamawhna lam zawkah khan kan thawn kual theiin a rinawm a. Hei hi ngaihtuah theih dan awm ta sela chuan, tehkhinnan, khawilai College emaw chu Geography-ah te an lo tha viau thei ta a. Geography i zir dawn a nih chuan chumi College chu pan mai rawh tih te. Tehkhinnan, History i la dawn a nih chuan chumi College chu pan mai rawh tih khan tih theih ni ta se chuan quality education a awm ang a. Khalai College pawh kha khalamah khan an lo hmingthat phah bawh ang a. Chutiang chuan tih theih ni se, kan lecturer te indaihlohna, zirtirtu indaihlohna hi thui tak a sukiang thei ang a, tha deuh taka kalpui chung siin tih te hi ka ngaihtuah bawh a.

Tin, Art & Culture Demand 23-na hi vaibelchhe 16 vel tun budget- ah khan a lo lang a. Anni hi ram zia rang leh hnam nun pholangtute an ni a. An pawimawh takzet a, an hun kal tawhah an pawimawh zia te kan hria a. Tin, lehkhabu pawh an lo pe hnem hle a. Lehkhabu hi 14031 an lo pe chhuak tawh a, nuai 12 zet sengin khatiang khan library hmun hrang hranga mite lehkhabu tha tak takin an lo equip nasa em em a ni, tihte kha a lo lang a. Tin, lehkhabu ziaktu, lehkhabu tha tak tak ziaktute he department hian incentives te pein a lo encourage nasa thin hle a ni tih a hriat theih bawh a. Chu chuan ram ro lehkhabu tha a lo siamchhuak thin.

Tin, Food, Civil Supplies & Consumer Affairs, Demand No.17-ah hian han sawi duh ka nei a. Nikum khan FCI godown atangin quintal nuai 16 zet kan lo lei a, open market leh mimal atanga kan lei hi quintal sing 9 zet a lo ni bawh a. A vai hian quintal nuai 17 chuang kan lei a ni. Khatih lai khan mimal tinin han insem ta ila, quintal 2 dawnin kan insem thei vek a. Chutih laiin agriculture lamah te thar chhuah a lo tam ve tawh a. Buh thar tam kum te kan puang a, metric ton sing 5, sing 6 te kan tharchhuak bawh si a. Chuvangin, kan mamawh aia tam hi kan lei lo maw aw ka ti, sum tam tak liam chung si khan. Chuvangin, vawiinah hian kan minister zahawm takin heng kan buhfai lei ang atanga ngaihtuahna sengin awmze awma kalpui a tum te, ration card te pawh a mamawh lote chuan rawn surrender thei se, mamawh te chauhvin nei se, a colour te pawh tihdanglam zawk ni se, identity proof-na atan a tangkai dawn tho avangin nei ve tho se ti ang zawnga hma an la te leh sorkar hnathawk lian te leh mihausaten ram hmangaih vanga

‘aaa...keizawng mi rethei quota ang chi chu ka ti ve lo mai ang e’, ti zawnga an rawn ti thei a nih chuan ti a hma an la te hi a ropui a, ram hmangaihtute chuan an ti thei turah ngai ila. Kum 1-a quintal nuai 17 lai lei ngai tawh lo a kan awm theih thuai a nghahhlelh awm hlein ka hria. Hei buhfai kan lei hi a lo tam em a, a mipui mil pheih chuan a tam mah mah zawkin a lang a ni.

Tin, godown hi tihtawp tumna a awm tih te tlangthang neuh neuhte a awm a. Khami anih avang khan sawi duh ka nei a, ka bial atangin Tarpheo atangte hian an rawn phone thin a. ‘Ka pu, kan godown tihtawp an tum em ni? an rawn ti thin a. ‘Tihtawp an tum lovang, ni 14.11.-a Assembly question a chhannaah kan minister zahawm takin chutianga godown tihtawp tumna emaw khawdanga sawnchhuah tumna a awm lo tiin a chhang alawm’, ka lo ti thin a. Amaherawhchu, an han zawt zau va, a hnathawktena awm ru deuh aniang an lo tih thin avangin an buai angreng hle a. Tin, Tarpheo khi han sawichian ka duh chu Hnahthial atangin km.28 a ni a. Khilai bial velah khian Aithur te, Khawhri te an awm a. Tin, S Chawngtui khi khilai atang khian km.16 ala ni a, khimi khaw 4 khian Tarpheo godown khi an ring thei a ni. Chumi a nih avang chuan khilai khi tihbo a nih dawn pawhin chawm a ngah avangin tihbo loh ni se tih ka han sawi tel duh a. Tin, Cherhlun te, Thingsai godown te an chhe tawh a, sak that an ngai tawh hle a ni tih ka’n sawi pah duh a.

Tin, VIP quota chungchangah khan (DEPUY SPEAKER : tih tawp tum tawh rawh aw) kan Chief Minister zahawm tak hmalaknain gas kha VIP quota zawng zawng kan pah a ni. Mipuiin an lo la hre lo viau hi a paw ka ti a. Kan Chief Minister zahawm takin miretheite hi kan VIP te in ni tiin kan quota zawng zawng VIP quota kha min laksak ta vek a, mipui kan pe a ni. Chu chu mipui hian kan hriat ve pawh a tha. Kan chungah thil tha duhtute leh min hmangaihtute hi helaiah ka vei zawng tih velah ni lo loa inkah ang chi kha a ni lo. Kan Chief Minister zahawm takin miretheite a hmangaih avanga kan ta tur, kan quota ve kan chan hi a ropui a ni. Chuvangin, tunah pawh buhfaita pawh kan quota kan chan dawn a nih chuan a hmangaihtute hi hre ve tawh se tih kha kan sawi duh a.

Tin, Transport hi tawite Pu Deputy Speaker, kan sawi leh lawk duh a. Department hian bus service lai hi 30 an nei a. JNNURM atangin 17 an lei thar a, a vaiin 47 an ni a. Tunah hian kan minister zahawm tak hi ngen duh ka nei a, kum dangah khan Krismas dawn hnaihte hian bus kha rei vak lo min service sak thin a. Khing Cherhlun, Thingsai, S Vanlaiphai-ah te, kumin hian min tihsak thei leh dawn lawm ni tih kha ka sawi tel duh a ni e. Sawi tur ka la ngah, mahse, ka duhtawk mai ang e, Pu Deputy Speaker, ka lawm e.

DEPUTY SPEAKER : Pu Hmingdailova kha a phar a, ilo ko ang.

Pu HMINGDAILOVA KHIANGTE : Pu Deputy Speaker, ka lawm e. Ka daihloh hret chuan min pek belh ve tho turah ngai ila. Pu Deputy Speaker, kan minister zahawm tak takte demand zawng zawng ka khawih kim kher lo ang a, ngaih pawimawh leh tui zawngte ka rawn select mai ang a.

A hmasa berin Demand No.21-na Higher & Technical Education- ah hian tunhnai lawka technical entrance selection system a category te fel tawk loa lang kan Chief Minister zahawm tak leh a changtu minister zahawmtakten fel tak leh huaisen taka remhre taka an siamrem hi tha ka ti a, fak tlak niin ka hria tih ka'n sawi duh a. Tin, College thenkhat leh Higher Secondary School ten subject bik lecturer zirtirtu kan nei lo tih leh transfer avanga buaina chi hrang hrang lo awm thin hi a to bul hriat a tul hlein ka hria a. A hre ber tur chu ka nilo na chungin rin pakhat ka nei a, ngaihdan ka'n sawi teh ang. Pu Deputy Speaker, Higher Secondary administration enkawltute hi College lecturer te an ni zel a. Chutiang bawkin High School administration enkawltute hi zirtirtute pawh chhuah an ni zel, an profession dik tak lo zawkah, administration zawkah kan hmang a, hei hi a fuh lo a ni mai lo maw, Pu Deputy Speaker. A tak leh mawl takin suggestion han siam ila, teaching lamah kan indaih lo tho si a, anni hi teaching lamah awm reng sela, kan sorkar chak tak hian Education Service siam thar sela, chungte chuan heng Higher & Education leh School Education lam hi enkawl tawh zawk se a tha thei mai lo maw tih Pu Deputy Speaker, ka'n rawt a ni.

Tin, Demand – 23-na Art & Culture. A hmaa kan senior member- ten an rawn sawi tawh ang khan, Department lian tak chu ni lo mahse hei hian kan hnamzia a pho chhuak tan mek a: tin, kan tui tual tual a, kan phur tual tual bawk hi a lawmawm hlein ka hria a. Hun hmasa a Christian nihna nena inrem lo kan tih deuh lai te pawh kha tunah chuan paih zelin, siamrem zelin, kan hnam nunzia kan pho chhuak thei ta hi a lawmawm hlein ka hria. Tun hnai lawk khan Synod Zaipawl kha Wales ramah an kal a, thla hnih zet a ni tawh ang, an kal hma khan cultural dance leh hlate an zir nasa khawp mai a, Wales rama an zuk kal pawh khan Wales miten an lo appreciate khawp mai a. Tin, khulaia khawvel hmun hran hran atanga lo pung khawm te nen pawh competition-ah khawvelah palina lai an zuk ni nghe nghe a, T.V ah khan kei pawhin an zai leh lam lai ka hmu a, an thiam hlein ka hria. Chu lo lehah chuan kumtir lam khan Varanasi khawpui-ah, Varanasi mission-in biak in te sak a rem lo a, multipurpose building an ti a, chu chu ropui takin an sa a, kan House Leader, kan Chief Minister zahawm tak hi khuallian a ni nghe nghe a, an hawnaah chuan. Chutah chuan Lily Veng Gospel Drama & Cultural Team te sawmin an kal a, chutah chuan ringthar te leh ringlo mite pawhin an lo ngaisang a, chuvangin kan cultural department atang hian, ram thim ram roah Pathian thu hrilh hi a lo remchang hle awm mang e tih te pawh a ngaihtuah theih a ni. Tun thleng hian an la rawn sawm deuh reng nghe nghe a, sum te a ngai a, engtik nge an kal leh dawn erawh chu kan sawi thei lo, Pu Deputy Speaker.

Tourism hi tlem han sawi leh ka duh deuh a, Pu Deputy Speaker. Kan minister zahawm tak hian kan hriat tawh ang khan Mizorama Tourist Lodge 15 zet chu A privatise dawn mek a, a remhriat thlak hlein ka hria a, lawmawm ka ti. Chutihlai chuan mahni bial lam tlem han sawi ila, Kawnpui khuaah khuan han thlenna leh ei leh in han lamna tur hi, (kan IB khuan a zir ngang silo a,) Kawnpui-a ka riak tur hi Thingdawl-ah ka chhuk thla ziah a, Thingdawl atangin han chhoh hran te a ngai leh thin a. Chutihlaichuan Thingdawla Highway Restaurant-ah khuan 2008 atanga cottage 2 an sak hi vawiin thlengin an la hawng thei lo a, hei hi kan minister zahawm tak hian private an pek hma hian siamthat chi a nih ka ring a, ka'n request deuh a ni. Pu Deputy Speaker, Vawiin thleng khuan luah theih loh in an la hawng thei tlat lo, keiniin a chhan kan hre pha silo.

Tin, lawmthu sawi ka duh bawk a, khatianga harsa taka khulai biala kan awm lai khan tuna kan minister zahawm tak hian remhre takin ro a rel a, Tourist Lodge sak dan tur min rel sak a, a sak dan tur te pawh kan tifel vek tawh a, sak thuai thuai a chakawm khawp mai a ni tih kha lawmthu sawi pahin ka'n sawi a ni.

Tin, chulo lelah chuan Land Revenue & Settlement hi ka sawi duh dan hi a dang deuh dawn a, Pu Deputy Speaker, tu huat thu kan sawi em lo ang chu maw. 1991 khan 2nd MAP Lungleiah ka va command ve a, ka va thlen chuan kan battalion compound chhungah khan LSC 112 hi a lo awm hem mai a ni, an lo pe hrim hrim kha a mak khawp mai. Mahse, 'in duh leh min khing ula court-ah, kan sawi fel chuang lo ang, min ngam pawh ka ring lo, kan LSC hi nangni aiin a senior zawk", ka ti a. Vawiinah hian Police Hqrs hi an ngam ta lo niin ka hria a.

DEPUTY SPEAKER : Ngawirawh aw lawk, kan hun a tawp a, mahse a thil sawi kha a laklawh em mai a, sawi phal sak lawk mai ang aw..

Pu HMINGDAILOVA, KHIANGTE : Awle ka lawm e, Pu Deputy Speaker. Vawiin thleng hian ka hriat dan chuan Police Hqrs kha an champion ta niin ka hria. Tin, mahni case-ah lo lut ila, kan Minister, a changtu Pu R. Romawia hriat atan a tha awm mang e aw ka ti a. Leiba aiah miin inhmun min pe ve ngawt mai a. Ka zu enfel dawn emaw ni ka tih lai chuan LSC pathum a lo inthuah a, a tihngaihna ka hre miah lo a, ka ngawi ta hle hle a. Khatiang khan brigade ram chhungah phei saw chuan kan hotuten tihfel tumin theihtawp an chhuah reng laiin harsatna ala awm zel a. Chutiang bawkin private eng emaw zat te pawh hian an ram hi an nei thuah hlawm mek a, chutiang department enkawltu kan Minister zahawm tak Pu R.Romawia hi eng emaw chenah chuan a khawngaih thlak hlein ka hria a, a rilru pawh a hah hlein ka hria a, a tihfelna tur leh a solution hi avang viau a, a awm thei ni awma ka ngaih dan chu tiang hi a ni. He department leh Zoram in kan mamawh ber dikna, huaisenna, taimakna nen hian kan hna theuh hi thawk ila, vawiina compensation kan buaipui luai luai te pawh hi tiang em em hian kan buaipui lo ang a, development work te pawh hi hei ai hian a kal tha zawk mai awm mang e tih ka ngaihtuahna hi, ka'n dinchhuahpui ve duh bawk a ni.

Tichuan Transport lam te kha chu ka'n ngaihtuah vang vang a, kan Minister zahawm tak hian a enkawl hneh hlein ka hria a, sawi ka tum lo ang a. Buhfai supply te kha chu kan hotuten an sawi nasa tawh bawk a, kan Minister zahawm tak hian chanchin ngaihnaawm tak a wind-up-naah min la hriih dawnin ka hria a, chu chu lo ngaihthla thap mai ila, a tha awmin ka hria. Pu Deputy Speaker, hun min pek belh a ka lawm khawp a, chu zawng chu ka sawi duh ni se, kan Minister zahawm tak pahnih Demand hi pass atan ka support a ni. Ka lawm e.

DEPUTY SPEAKER : A lawmawm e, kan chawhma lam hun chu a zo a, kan chawl rih anga, dar 2:00 PM ah kan thu khawm leh dawn nia.

2 : 00 P.M

DEPUTY SPEAKER : Kan sawihona kan tan leh tawh anga, chawhma lam khan 7-in kan sawi tawh a, tunge sawi duh le, sawi duh kan awm tawh lo a niang. Tunah dar 2 a nia pasarih laiin an sawi tawh a. Tunah Pu R.Romawia Minister-in rawn wind-up se pass rawn dil nghal mai rawh se, i lo sawm ang.

Pu R. ROMAWIA, MINISTER : Pu Deputy Speaker, ka lawm e. Ka Demand member zahawm tak tak pasarih laiin an sawi a, PAD an sawi lo va, amaherawhchu PAD hian sawi hlawh lo mahsela House leh mipuiten kan hriat ve tul a awm a. India Constitution-ah kan hriat angin Legislature dan siam pawl an awm a, Executive an awm a, hemi executive inkara leihlawn a ni ve a, MLA te pawhin House-a kan zavaia huap ang kan tih turah chuan han pulut vetu Department a ni a, kan dan chaitute pawh PAD kal tlang tur a ni a, democracy tan lungphum pawimawh ve tak a ni a.

Kan member-ten Department hrang hrang an han sawi thliah thliah a, an sawi zingah hian han react tur nasa chi pawh a awm lova. A tlangpui thuin ka Department chanah lawmthusawina te kan dawng nasa a. Art & Culture bikah pheih chuan a Minister lo ni tawh khan thahnem min ngaihpuh hle a, kan sum neih a beitham thute leh hmabak kan neih tam si zia te kha min rawn highlight that sak em em a. Art & Culture-a kan lam thiamnate kha Chalfilh Bialtu pheih kha chuan a

rawn tithiam khawp mai a, kan lam thiamnate hi Chanchin tha hrilh nan thil tangkai tak a nih ziate a sawi lan kha Art & Culture Department hlutna min hmuh belh tir zual a. Pi leh pu atanga kan hnam dan te, zia rang te kan han pho chhuah te zingah pawh Chanchin tha hrilhna atan pawh hmanrua a lo nih theih dan te kha he House hian kan hriat belh a.

Kan puan zeh mawi tak tak te India pawn atang thleng pawh hian Art & Culture hi kan hnam costume te pawh min rawn dil ve thin a, pek kan chak thin. Amaherawhchu, sum lam te kan neih that loh avang hian kan ti hlei thei lo va, khawvel hmun hrang hranga Mizo fa awmte hian hnamzia tarlan an duh hunah hian kan thum te hi an mamawh em em thin a, chuvangin hotute pawhin min hriatpuiin heng lamah te pawh kan mamawh zualpui ti thei turah ngai ila. Chutiang chuan Art & Culture hi hnam inpumkhatna atana thawktu an ni a.

Lehkhabu tha vawrh darh tur hian an tangkai em em a, hnam inpumkhatna siam turin. Tin, kan tawngte zirna sang zawka kan chhoh ve zelna tura Mizo tawngte kan hman theihna tur leh Eight Schedule thleng pawha kan luh theihna leh keini tan pawh inchhawp chhuah zelna tura publication atan pawh an pawimawh em em a, sum han vawm a lehkhabu tam tak an tihchhuah te pawh a tul em em a. Lemziakah te pawh hian hmabak tam tak kan la nei a ni. Dramatic art lampangah hi chuan kan che tha tawh hle a, amaherawhchu fine arts lamah hi chuan kan hnam zia tarlang tur pawhin kan la hnufum hle a, hmabak tam tak kan la nei a ni. Chuti chungin Art & Culture Department te tak, lian taka kan lan ve theihna chhan Rajaram Mohanroy Library, Library foundation lam atanga pawisa eng eng emaw kan hmuh khan lehkhabute kan lei ve chhun atang chuan thingtlang khaw hrang hrangah kan YMA library-ah te kan pechhawng ve leh a, annin tangkai takin an lo hmang a.

Nichhin a member zahawm tak Chalhfilh bialtuin a rawn sawi te kha a lawmawm hlein ka hria. Lehkhabu tha tak tak siam leh zel te pawh kan beisei a ni. Tin, lehkhabu siam tha tak takte han subsidies pawh hi kan duh hle thin a, chungah chuan hmasawna kan nei zel turah ngai ila. Kan pi pu sulhnu hluite kan

enkawl that a tourist attraction atan te thangthar zel pawhin pi leh pu lo khawsakzia mit ngeia an hmuh theihna tur kawngah pawh hian hmalakna kan la nei a, chungah te pawh chuan sum kan neih tawk loh avangin tum angin hma kan la thei lova, hmabak tam tak a la awm. Tourist lam nen hian tangkawp ila, anni hi chuan eng eng emaw kut phuahchhawpa hman tur te sum an nei si a, keinin kan festival-a hman tur pawh sum kan nei si lo va tih te Art & Culture atanga thlirna pawh a awm fo thin a ni. Mahse Tourism pawhin an tih dawn tak tak chuan kan lam thiamte tel lo chuan an hlim thei tak tak chuang lo a ni te kan ti ve thin a. Engpawhnise, inhrethiama rulh leh loh tura puk dan te pawh hi zawng ila a tha lawm ni. Tin, kan ramin kan awh em em kan la tih hleih theih loh Public Library neih te pawh kan chak em em a, mahse sum avanga dan te pawh hman theih turin kan han ti a, sum dinhmun a that hunah chuan Public Library te neih kan chak a ni.

Tin, kan Museum -te pawh hi a te a, a la beitham hle chungin tlawhtute kan nei tha a. Min hlutsaktu tam tak kan nei thin te hi a lawmawm kan ti a. Hengah te pawh hian hmabak tam tak kan la nei a. Kan hnam nun chi hrang hrang te, kan rama kan incheina-te leh kan ze hrang hrangte pawh a sculpture ang deuha a lemte nena han lantirte pawh hian kan Museum tichangtlung hle turah kan ngai a. Chungah te pawh chuan hmabak tam tak tih tur a la awm a, kan la ti zel turah ngai ila. Chutichuan, Art & Culture hian lehkhabu lam kan buaipui a. Tin, lem, lim tih lampangte bakah pawh kan pi leh pu hmun hluite kan buaipui a, chung mai piah lamah Museum lam te a lo ni a. Tin, Archivist kan ti a, thil hlui vawn thatna lamah hian tunhma-a ziak hlui tak tak, hmanni lawkah pawh khan kan Archive ka va tlawh-ah chuan lehkhabu pakhat min lo pe a. Chu chu 1906-a Moirang-a Harhna zuk chhim zing ami, a hnu-a Rev. Zathanga hand writing ngeia khatih laia an rawn hawn kawnga Chaltlang, Bethel bul vel leh Aizawl-a Mission Veng Biak Inpui atanga inthen hleithe lova an hlim zia a ziahna te pawh kha, ama hand writing ngei chhiar tur kan Archive-ah te pawh khian kan la vawng tha a ni. Chutiang lo thil hlui tam takte pawh vawn that kan nei a. Chungte pawh chu kan Member zahawm tak tak te pawh hian tun hmalama thil engemaw in hriat duh ang engemaw zat tam tak te kha lo va en ve ula, lung an tilengin rilru pawh a khawih viau a ni. Chutiang chuan Art & Culture hnuaiyah hian peng hrang hrang a awm a. Dramatic Art te leh Literature Arts te, Fine Arts

te mai piah lamah, Library lam te, Museum te, Archives te khatiang khan kan peng ve tiai a. Mi tam tak chuan kan lam thet thet chauh hi Art & Culture emaw min lo ti mai thei a. Kha kha a ni lo va, peng hrang hrangah khan kan awm a. Nakinah pheih chuan Directorate hrangte pawh la hring chhuak thei tur Department kha a ni a. A sawitu tam ber kha chuan thahnem min ngaihpuina lam te leh a pawimawhna min hriatpuizia in rawn tihlan avang khan a lawmawm hlein ka hria a.

Tin, Higher & Technical Education pawh hi kan Member-te khan in sawi deuh thliah thliah a. Member zahawm tak Pu Lalthanliana khan khatia Fund lo pung chungchangah khan GIA khatiliah khan RUSA hi engnge ni a ti a. India central sorkar lamin Education tihchhoh zel nan khan SSA te, RMSA te a han tih ang hian College level bikah khan RUSA kan tih Rashtrya Uchcharat Siksha Abhyan hi an introduce a. Tichuan nikum 2013 lamah khan a intan a. Khatia boruak a inmun chhoh mek lai khan keini zirna lama sum indaihlo takin zirna sang zawka beiseina sang tak kan neih lai kha a ni a. Chutah kan Minister-te, kan Chief Minister te pawh an phur em em a, hma an han la chho a. Mahse, MLA inthlan ten a rawn nang a, tum angin kan um chak thei lo va. Chutah central lamah MP inthlan te a lo ni leh a. Chutiang chuan kan beisei leh tum angin hma kan la chak thei lo va. Inthlang ve lo state te chuan an chhawr tangkai viau tawh a. Keini inthlang kha chuan kan la chhawr tangkai vak thei lova. Engpawhnise, a bul tanna angin `7065 lakh kha a seed money kan ti mai ang chu min rawn pe ve a. Tunah chuan a sum tak chu la ni lovin, a earmark a rawn awm chhin kha a ni a. Chutah chuan, hemi a kan intihchangtlunna tur atan hian zirtirtu indaihlo nasa tak atan leh kan College building thawm that ngai tam tak te, Hostel nei lo tam tak te tan hian hman tangkai theih kan inbeisei a.

Tin, chu ai in a pui ber pheih chu State University lam aim deuh a Higher Education City siam te pawh kha an rawn ruahman zawk a ni a. Khawi maw lai hmun zau tawkah khan College hrang hrang, faculty hrang hrangte awm khawm a, chutah chuan University thleng anga awm tur a, Master degree thlenga awm chho tura duanna te pawh a awm a. Amaherawhchu, chu chu tunah mai chuan kan la thleng lo mai thei a. Thleng lo mah ila kan hmabak la inchhawp zel tur a ni a. Tunah chuan kan nghahhlelhna zualpui ber chu kan College hote kan changtlung lo em em a, teaching staff te an changtlung lo

va, building lamah te an changlung lo va. Chungah te chuan engemaw chenah RMSA, SSA ten kan Middle School te, kan Primary School te an thuam that ang deuha thuam that theih beiseina kan nei a. Chu chu a hmin hnai tawh turah kan beisei a. Tuna central sorkar lo inthlak danglam ta pawh khu zirna lam ngaisang tak taktu vek an nih tho avangin harsatna an siam phallo turah kan ngai a. Mahse, kan tum aiin a Detail Project Report te kan zuk vawm thlak tawh hnu-ah pawh hian meeting an ko mai dawn emaw kan tih lai hian an ko lo leh tlat mai thin hi tlem chuan UPA sorkar ang kha chuan min hmanhmawhpui lo deuh dawn emaw ni aw tih ngaih dan te kan nei a. Mahse, chutiang ni lo turah chuan ngai ila a thain ka hria.

Tin, zawhna hrang hrangah te khan kan Member zahawm tak te khan inrawn zawt a, kan chhang hman lova. Kan College-ah hian Librarian nei lo 11 lai kan la nei a. Amaherawhchu, University affiliation atan hi chuan Librarian neih ngei an phut hran lova. Lehkhabu tam tawk an nei tur a ni tiin bituk chin an nei a ni mai a. qualified Librarian an nei ngei tur a ni tih a ni lo va. Chutiang chuan affiliation-ah chuan engmah harsatna a awm lova. Tin, NAAC (National Assessment & Accreditation Council) ah khan, Council lam khan Librarian neih ngei tur tih lam kha engmah sawilan a awm lo hrim hrim a ni. Keimahni'n kan mamawh em em zawk si avang leh, kan mamawhna laiah khan, lehkha han zir hian tunlaiah chuan thil engkimah khawl changkang tak tak hmang vek tawh an ni a. Lehkhabu chhah pui pui naupangin an pawm an pawm peih tawh lo va, pawm pawh a tul lo va, a pawimawh lai kha hetilaia download mai a, xerox pun leh mai a. Khatianga a pawimawh han tih mai theih tur khan Library-ah khami lam thiam M Lib. emaw te kha kan mamawh em emin kan hria a. M Lib. chuang khatianga lam tunlai thiamna engkimah computer hmang thiam em em si te khan han ti ta sela, kan zirlaiten awlsamna nasa tak an nei ang a. Khawvela lehkhabu tha, khang related ho chi pawh kha an avail theih beiseina kan nei a. Qualified Librarian neih lohna College 11 lai a la ni te hi kan han nawr tang tang thin a. Amaherawhchu, kan sum dinhmun a harsat avang hian ti hian kan khawk leh thin a, chutiang chu tuna kan dinhmun a ni a.

Tin, a teaching staff hrim hrimah pawh hian kan indaihlo a, Class Room pawh kan indaihlo a. Nichina kan sawi ang khan RUSA-ah kan innghat tawp lo thei lo a

ni kan ti a. Keimahni-a Annual Plan leh hemi-ah hian kan innghat hlei thei rih si lo va, tikhan, entirnan, Pu Deputy Speaker, kumin-ah khan Pawl 12 result kha a lo tha em em mai a. Tichuan, kan naute ho hian Aizawl-a zir deuh vek hi an lo duh ta mai si a. Chutih laiah chuan kan hotute, kan Principal zawng zawngte kan han inkohkhawm khan naupang hi admit theih hram hram tum ila, naupang drop out an tam hian kan ramah law & order problem a awm si thin a, tikhan inpawhfan theih tawpin Aizawl-a College 8 awmte kha an han inpawtfaan a. Chutichung chuan zirtirtu lam kha kan intitam leh thei bawk si lo va. Chutiang chuan kan inekbeng a, hma lam pan tha kan ti si a, mahse, naupang zir duh ngawih ngawih zir thei lo va han dah ringawt te pawh kha thiingin kan hre bawk si lova.

Tin, khawpui lam pang hi kan bawh deuh vek si a. Zawlnuamah te kha chuan admission ti kha an la tlem viau a, Saitual lamah te pawh an la tlem viau va, chuti lamah chuan kal ta che u kan han tih khan an sak tun bawk si a. Aizawlah deuh vek an duh thin si a, khatiang reng reng khan kan buai a. Mahse, hengte pawh hi hun lo kal zel turah pawh mipui lam te nen pawh inhrethiam tawna thil tih dan te kan zawn a ngai a. Tunah pheichuan kan Department hotuten evening shift te, morning shift te hi kan siam mai dawn em maw ni tih te an ngaihtuah. Chung chu siam ta ila khawia sumin nge kan siam ang kan ti leh a, khatiang reng reng khan kan la kual kan la kual deuh a. Kawng kha chu kan la dap zel a ni.

Tin, Pu Deputy Speaker, Higher & Technical hi a technical bikah Joint Director hovin Chaltlangah hian kan han awm ve a, mahse hemi-a kan hnathawh tlangpui hi member-te pawhin min hriatpui lo mai thei a. In lo ngaihtuah dan maiah chuan technical zir tur lo screening, lo thlan, polytechnic zir tur exam lo buaipui, Lunglei lama zir tur leh Women Polytechnic, Durtlang ami lo buaipui mai emaw in tih ka hlau va, chu chu a ni lo va, an tul ve em em a. Kan ramah hian hnam kal zelin kan mamawh chhanna ang khan mi hrang hrang thahnemngaiten computer zirna (institution) an siam thliah thliah a ni. Mahsela, kan hotuten an han ngaihtuah an han ngaihtuahin, hei hi awmze neia kalpui a tha a ni an ti ta a. Tichuan Higher & Technical-ah affiliation te rawn pe sela, an exam te

pawh hi conduct ila, chutah chuan Certificate te pawh pe ila tih ngaihtuahna a lo chhuak ta a. Chuvangin, tunah hian Computer zirna 27 lai kha affiliation kan pe tawh a. Khata an zir laite, exam zawng zawngte pawh kha Higher & Technical-in kan conduct a, khami standard maintain kha ngai kan ti ve a.

Tin, chu mai piah lamah ram lo thang zelah khan Para Medical ang lam ti mai ila, hmanni lawkah pawh khan Pharmacy zirna kha kan House Leader zahawm tak khan a va hawng a, sorkarah zirnain a daih tawh loh avangin Lianthangpuia Pharmacist zirna tih niin ka hria. Khang te pawh kha keimahni Higher & Technical exam leh engkim an standard kan buaipui tur kha a ni a. Tin, thisen enna lampang Radio image technology zirna lamah te, thisen la pawl kan tih te pawh kha exam conduct tur khan keimahnia in affiliate kha an lo awm a ni a. A hming takah pheichuan Mizoram Technical Education Council, chumite hnuai ami chu a lo ni a. Tin, X-Ray zirna pawh pakhat tunah hian kan ti mek a. Hengte pawh hi la awm belh zel turah kan ngai a. Kan nau thangthar zel te mamawh hi a lo pung a, eizawna tinzawn hi an duh tawh a. Chuvangin, khawimaw lai Damdawi dawr nghah paha an lo inhlawh ve theihna tur te pawh kan ngaihtuahin keini technical lam pawh hian kan phurpui em em bawk a.

Tin, chu mai piah lamah chuan kan han ngaihtuah vang vang thin a, zirna tluangah hi chuan B.A., M.A. lai pawh ni se ei tur a awm meuh tawh lo a nih hi a, sorkar hnain min daih tawh si lo va. Chuvangchuan, kan ram mamawhah hi chuan Technical & Skill Department hi siam a ngai tawh a nih hi tih te pawh kan ngaihtuahnaah a awm lian em em mai a. Chuvangin, Technical & Skill Development Department te pawh hi awm ta sela tuna kan technical wing-ten an thawh mai piah lamah hian kan Youth Commission lam te pawhin kan nula tlangvalte tan hna an zawn sak ang chi te pawh kha in combine-a thil tih hi chu a hun tawh mang e, chumi han buaipui tur chuan Technical & Skill Development Department hi siam a van tul tawh em tiin tunah pawh hian kan ngaihtuahnaate pawh kan hmang mek a. Kan Leader te pawh hian kan department hi a pawimawh em avangin Stamp & Registration te pawh department min siam sak ang mai khan

Technical leh Skill Development department pawh hi min la siam sak ang tih beiseina sang tak tak kan nei a.

Tin, Pu Deputy Speaker, Polytechnic lamah pawh hian khatianga central lamin thil phal taka infrastructure lam te min rawn phal sak angin nuai 800 thliah thliah te min rawn pekah khan 'district tinah awm se' in rawn tih pawh kha kan sawi ang khan Lungleiah Polytechnic a lo awm tawh a. Tin, Durtlang-ah Women Polytechnic a lo awm tawh bawk a. Kan District Headquarter-ah te hian awm thliah thliah tawh sela, thiamna rau rauah chaw bawm a hrut deuh a ni lawm ni tih hi kan hotute ngaihtuahnaah a awm a. Chutiang chuan Kolasib-ah Polytechnic kan lo din a nih pawhin vehicle te a pung tawlh tawlh a, hetiang lam MVI lam zirna ang chi te leh a zirna tluang pangngai ang chi te pawh kan ti thei a nih chuan, Champhai lamah te pawh kan ti thei a nih chuan Food processing tih te, refrigeration tih te pawh kha han zir sela kan rama kan thlai thar tam tak te pawh hi a processing te an lo thiam ang a, chutianga thiamna te a lo awm kha chuan anmahni seed money, sorkarin a ngaihtuahpui emaw Bank through a pek an lo nih pawhin seed money an lo neih chuan anmahni enzawna bul tanna kha a lo awm thei mai ang a. Hetiang chi hi kan ramin a mamawh tawh a ni.

Hmun hrang hrangah subject hrang hrang, Kolasib lamah Automobile Engineering te lo dah ta ila, khatiang khan hmun hrang hrangah kan han inchhawp chho a ni a. Tin, Kolasib ami pheih chu hawn theih tep a ni tawh a. Champhai lam ami Food Processing te pawh hawn theih tep dinhmunah te pawh kan ding tawh a ni a. Kan hotute pawhin thahnem min lo ngaihpui a, sum te pawh kan nei lo va, sum nei lo chung chung hian a pawimawh em avangin tih theih dan hi kan zawng hram hram turah kan han ngai a. Kolasib lam leh Champhai lam te chu hawn theih thui te pawh kan inbeisei a. Chhiahtlang leh Serchhip lam kha chu a hmun thu a fel har deuh a, hna kan tan vat thei lo va. Tin, Saiha lam pawh a hmun turah harsatna a awm deuh avang khan hna kan tan lawk thei lo va, heng Mamit-ah te, Lawngtlai-ah te chuan hma thui taka lak tawh a ni a.

Tin, chutih laiin heta hming tawpa nihna sang pui pui bawk thlek thluk awm lo, mahse eizawna tinzawn, a chaw bawm hrut zawng education kha a nih chuan kan ram mamawhna chhanna tha tak a ni turah ka'n ngai a. Kan naute hi thawh tur an neih loh chuan thatchhe awmkhawm angin kan ngai thei a, mahse thawh tur an neih chuan mitaima tak, an thawk hlum mai ang tih hlauhawm khawpa taima tur an ni ang tih kan hria a, chung indawmkan lamah te chuan heng kan Polytechnic te hi hman tangkai kan duh em em a. Tin, khimi Durtlang-a tuna Women Polytechnic kan neih mek designing etc. leh thil hrang hrangte piah lamah pawh mipa leh hmeichhia zir khawm hi Mizo danah chuan nuam kan ti zawk a, Zirtiri Women College te pawh tunah chuan Co-education in kan siam a, kan naute a mipa, a hmeichhiain an hlim tlang zawkin kan hria a, chutiingin Women Polytechnic te pawh khi khatianga Co-education ang lama kalpui khan zirlaite pawh an hlim tlangin an phur tlang thei ang a, chung subject offer tur te pawh chu a tul anga la siam belh ni se tih te pawh ngaihtuahna a awm mek a.

Tin, scholarship chungchang kan ba ami tho kha in rawn sawi ri lo va. Scholarship chi hrang hrang tam tak awmah hian keimahni Plan Fund atanga kan lo dolet ngai ve chi hi a awm tlat mai a. Chu chu sawi leh sawi hnu a ni a, sum kan harsat avangin nikuma kan theih ang kha kan thei mai dawnin a lang lo tlat mai a, chu chu kan buai em emna a ni a. A dang kan lo dolet tur a pawh lo ti tawng tawng thei pawh ni ila keimahni Plan lam atang khan harsatnate kan tawk deuh a. Chubakah chuan a awm chhun ang ang, a theih ang chin chin tur pawh Budget allocation kan hmuh tlai avangin tunah chauh Budget Session kan la neih theih tak avang khan a hmaa lo tih lawk vak hleih theih loh a awm avangin kan naute zawng zawng pawhin min lo hrethiam se ka duh chu, Christmas hmaa sem hi an duh thin a, mahse Christmas hma hian kan sem hman dawn lo awm mang e aw! kan ti a, theitawp chu kan han chhuah zel ang a, mahse kan sem hman lo mai thei a ni. Chung chu Scholarship chungchanga kan dinhmun a ni.

Tichuan Education lam chuan opposition lamin thahnem min ngaihpuia zia te kan hria a, zirtirtu kan indaih loh te, zirlai an tam zel si zia te,

kan class room te pawh a zau tawk loh zia te kan inekbeng ringawt a ni tih min hmuhpuitu kan member zahawm tak takte in ni a. Tin, ram inthlengpui theih te kha Department indawr anga thil tihfel theih te a awm a nih chuan kan member zahawm tak Pu Vena pawh khan hma min lo lakpui zel la, hmun zau zawk te chu keini te chuan kan duh em em alawm. T.Romana College-in Republic Veng a thlawh chhuahsan i hlau deuh a nih hmel si a. Chuvangin Republic Vengah rau rau pawh a hmun inthleng tur te a awm a nih chuan Department hmun inthleng ang te chu Vety Minister zahawm tak te nen pawh kan lo sawi dun ang a, kan official te pawhin an sawi dun ang a, inthlenga kan ram tana tha zawk tur, hlawkpui tur a awm a nih chuan ngaihtuahna hman zel tur chiah ka ngai a ni.

Pu Depuy Speaker, Land Revenue & Settlement chungchang hi thil sawi hrehawm tak sawi ngei chi si a ni a. Kan hriat angin ro chi hnih a awm a, tangka ro sum, lak sawn theih chi a awm a, laksawn theih loh ro, leilung nena inzawm ro a awm a, chu chu ram te, leilet tha, kawngpui tha, thlawhna tumhmun tha, tuikhuah tha, dil tha te a niang chu, chutah chuan lak sawn theih loh ro hi a rotling zawk a, tangka chu meiin a kang a tuiin a tichhe thei a. Amaherawhchu, lak sawn theih loh ro hi rotling zawk a ni a, chuvang chuan rotling zawk lamah hian Mizo fate kan rilru a kal na sawt ta hle a.

Tunhma thingtlanga lo neih a, tlak lama neih ho dial dial a, chhuah lama neih ho leh dial dial a, chhim lama neih ho leh dial dial, hmar lama neih ho leh dial dial ang nilo khan, kan sorkarin New Land Use Policy ti lo mahse an ram chungah ram nghet, chhungkuain ram tha neih ve duhna hi chu kan rilruah hian a piang ve tawh hrim hrim a ni, a hlutna kan hre ve tan tawh a. Khatilaia an hminga ram nghet an lo neih ve tawh tlat kha chuan a lehlam vantlang ramah khan jhuming-ah an la tel theih tho kha chuan khatia chang hnih kawp duh kha an tam em em a ni. A ram thehah khan bang duh chuang bawk si lo a, lehlamah khan ram nghet neih duh bawk si khatiang kha kan duh a. Chuvangin, ro lak sawn theih loh lamah kan ram, kan hnam kan thang nasa em em a. Chungte avang chuan khatilaia mihring dinhmun a lo harsat chuan ram te kha suma chantir theih pawh a lo ni ve reng bawk si a, rama thahnemngaihna a lo lian ta em em a. Chu chu

a nih avangin Revenue Department-in a chan hi hna hahthlak tak, hna hrehawm tak, mahse kan ramin a mamawh em em si a ni a. Tiang chuan tunhma atangin 1972 atanga Revenue Department anga a lo awm takah khan District Council laia ram a lo pek tawh te leh District Council-in Kumpinu huna Superintendent-ten ram an lo pek tawh te chhawm chho zelin, nuai bo buaih buaih lo vin kum 1972 atang khan Revenue Department te lo awm khan chung chuan Land Settlement te pawh a tihsak a, a neitu nghet nihna te pawh kha a tihnghet sak a ni a.

Tichuan kum 2014-2015 chung ringawt pawh khan mi kan lo dah hnem viau mai a. Residential Land Settlement Certificate kan ti a hemi hi a nghet hralh leh chhawn theih, thil eng atan pawha mortgage theih kan pekchhuah zat hi 2018 kum 1 chung ringawt pawhin a ni. Tin, Agriculture land Certificate kan ti a khatiang atan 60 kan pechhuak a. Tin, House pass, inhmun la nei lo ten in an sak ve theihna tur kha 338 a ni a. Chutiang chuan Land Lease-ah hian (Land Lease hi Department Land Lease te leh heng NGO kan tih hrang hrang Kohhran te pawh a huam) 71 a ni a, a zavaiin 2502 lai kan han pe ve a ni a. Chutiang chuan hetilaia a piah maiah khan kha kha pek thar a ni a, pek thar lohah pawh hian kan buai map map hle a. LSC hming thlak hi a tul ve reng bawk a, tute emaw an lo inleisaka, sum tam tak senna, ram himdam a lo nih bawk si kha chuan hming thlak loh theih loh te kha a awm a. A then chu an paten an lo boral san a an fate hnenah an lo thurochhiah a, khatiang khan mitthi tawh hminga LSC awm reng chu a lo rem lova, khatianga hming thlak tam tak te pawh a lo awm a. Hming thlak pawh kha 1320 an ni a. Tin, LSC then darh, unaute pawh an lo indang darh a, chungah chuan 350. Tin, LSC thenkhat chu a teh lai aiin an lo zau lutuk a, a tehna khawl kha an lo nei tha tawh a, an teh tha a, a lo chuang leh deuh a, khang han extend sak leh te pawh kha an lo awm a. Tin, periodic pata te pawh an chei na na chuan delay te pawh kha a ngai ve a.

Tin, rambuai chinfel ngai te a lo awm ve a, han chinfel te nen, chung ho zawng zawng ringawt pawh chu 2,696 a ni a. Tin, chinfel hleihtheih loh thubuai awm lai, hei hi kan hotute ngaihtuahna tiluhaitu pawh niin ka hria. High Court case awm lai hi 23, court danga case awm zat 47. Chumi bakah kan Director-te hnenah ram buai rawn sawi,

annin theihtawpa Department level a lo chinfel tuma an va teh leh thin a, an pawh leh thin a, kan surveyor te an tirh leh thina an tih an tih ang thin kha ram buai case court a la lut lo 350. Chutianga buai ringawt hi 410 ang a lo ni ta a. Chutiang vel chu kan dinhmun a ni a.

Tin, hmannah khan member zahawm takin a rawn zawt a, kan chhang hman ta lova, National Land Record Modernisation Programme kha, ani kha chuan New Land Use lam kha a lo tuipui deuh niin ka hria a, New Land lam khan a rawn ti a. National Land Record tih zawk a nia, National Land Record Modernisation Programme, hei hi Central lam atanga ram chhinchhiah felna tura hmalakna a ni a. Hetah hian 11th leh 12th Five Year Plan chhunga zawh turin fund siam a ni a, North East states-ah hian 90.10 kha, 10 kha kan do letna tura tih a ni a. Hetilalah hian hma an la a, Lunglei District leh Serchhip District leh Champhai District, hei hi chu cadastral survey leh khanga engkim pawimawh ang ti khan kan han teh fel thawkhatin kan hria a. Kuminah hian Aizawl District lamah hian luh kan tum a, engemaw chen chu Aizawl District-ah pawh kan ti a. Tah khan khawl tha tak tak te kan nei ve tawh a, Global Positioning System an ti a, chu chu Global Positioning System khan khimi satellite hmanga image a tih kha, chuvangin accuracy pawh kha millimetre, cm pawh tling lo, tin hmawr bawp pawh tling lo, a sual a nih pawhin chung vela sual palh theih chauh anga accurate khan kan ram Mizoram hi square km 21,081 chutianga teh fel vek hi kan tum a ni a.

Hetah hian plot kan han survey ah hian a tlangpui thuin neitu chianguang lo awm te kha, map-ah kan han notice ta zel a, a hauhtu chianguang awm kha. Chuti lo chu keini chuan unmanned khan, free land khan kan record phawt lo thei lo a. Chutiang chuan Lunglei District-ah kan va survey khan 3,524 an awm a, Kolasib-ah 1,524, Champhai District ah 3,225. Heng kan plot fel te hi chu buai miah tawh lo tura kan ngaih a ni. Thubuai court-ah tih uaih uaih ngai miah tawh lo tura kan ngaih a ni.

Hetilai satellite imaging a kan khawih chhuah sak a, a location nen engkim buai miah lo tura him dama kan ngaih kha a ni a. Mahse, han thlir mah ula, khatatang pawh khan thlir ula kan la tihlem zia kha, buai thei a la tam zia kha in hre em em dawn a ni. Chutiang chuan hma kan la zel a, hma lak zel pawh kan tum a. Chutiang hunah chuan tuna kan thubuai tam tak hi a fel theih te kan beisei a. Tin, kan programme dan chuan 2015 atanga 2017 ah khian Mamit leh Kolasib kan cover leh thei ang a. Tin, 2017 atanga

2020 ah chuan Autonomous District pathumte pawh kan cover ve thei ang kan ti a. Chutiang chu tuna kan inbuatsaih dan a ni.

Chulovah chuan kan Department hmasawna tur leh tangkai em em nichina ka han sawi ang khan kan House Leader-in ministry hmasaah khan Registration and Stamp Department min hawn sak kha a tangkai em em mai a. Ram nei te leh hetiang ang reng reng kha Stamp leh Registration-ah khan kan han tih sak a, fee chu chawi belh chu a awm, mahse eng court-ah pawh khan khang kha himdam tura kan ngaih a ni. Mahse, thawktu kan indaih lo em em mai a, kan Revenue Department indaih lo sa atangin kan han inpawt peng a, a nih dan tak chuan Directorate hrana awma chhiah lakna tha tak tur a ni a. Tin, inhmun lo ram mai ni lo thil dang tam takah pawh khami Registration leh Stamp te ti a sum hnar tak tak tur kha a ni a. Chutah chuan mi kha kan la indaih lova, kan la indaih zel turah ngai ila, post hrang hrang 97 kan dil a, 37 kha min rawn siam tawh chauh a, 60 kha tun thleng pawhin min la siam thei lova. Chuvangin, Aizawl te, Lunglei te, hmuntinah kan la che mai thei lo a ni. Chutiang chuan Registration fee te, stamp duty te, atangin sum tam tak kan la ve tawh a. Chunga kan lak zawng zawng pawh ` 1,73,30,798 lai Registration and Stamp-ah ringawt hian a tling ve tawh a ni. Kan lakluh sakte himna, (security) kha hengah hian a tel a ni. Chutiang chu a ni a, nuai 173 lai te a ni a.

Tin, ram chhiah khawn leh pek awlsam zawk dan hi Revenue Department-in ngaihtuah mekah kan nei a. Hmanni lawk khan kan VC te dan siamthatna kan pass a, kan VC te hi thingtlang chengker tak tak kan tihah pawh hian khawtinah hian mi thiam, matric pass hi kan lo nei tawh a, kohhran te pawhin an sum reng reng a bo a bang awm lovin an vawng tha thlip thlep thei a; chuvangin, sorkar sum a nih pawhin an vawng tha khip khip thei ang tih rinna kan nei a. Chuvangin, heng ram chhiah leh i reng reng te hi VC te kutah dah ta ila, annin an kut hah man engemaw zat kha lo chang ve se, keini Revenue Department kha khati lam han ti tur khan kan indaih si lova tih te pawh ngaihtuahna a awm a ni. Chutiang chuan chhiah te pawh kan hmu tha zawk ang a, a petute tan pawh an khawtuala va pek kha chu a awlsam dawn te khan kan hria a ni.

Tin, zawhnaah khan SAAB Aizawla siam leh siam loh kha member zahawm tak khan a rawn zawt kha a ni a. Aizawlah hian Site Allotment Advisory Board hi kan siam lo a ni. Thingtlang hmun hrang hrangah erawh chuan dan ang takin kan siam a, khang Site Allotment Advisory Board-in an han ngaihtuah a, heng mite hi pek tlak an ni e an tih te kha chu kan Settlement Officer te pawhin an rawn recommend a, kan tehfeltute pawhin an han teh fel a, khangah kha chuan harsatna kan tawk lova. Aizawl khawpui erawh chu khatianga han tih mai kha harsatna awmin kan hria a. Tuna kan ngaihtuahnaa awm mekah chuan hetia huam zaupuia ti lo hian, a Local Council thliah thliah hian ti ta ila. Amaherawhchu, a Local Council thliah thliah kha hmanruaah pawh va hmang dawn ila an tul hlei awm mang e, tih te chu ngaihtuahnaah te chuan a awm a ni. Site Allotment Advisory Board hi siam dawn ila Sakawrtuichhun, Tanhril Local Council te kha chu an tul hle dawn a, Zarkawt, Dawrpui Local Council te hi chu an tul nep deuh awm mang e, tih ngaihtuahna kha a awm a. Chutiang chuan tunah hian Revenue lampanga thubuai tam tak lo pianchhuahna fo thin ang te nuai rehna a nih bakah a khaw chungang ram nei lo neuh neuh khatilai khua leh tui te tana ram lo kawhmuhtu ang body siam kha tul kan ti hle a. Thingtlang hmun tam takah chuan kan siam a, Aizawl khawpui erawh chu kan la nei thei rih lova, a tih dan tur kan ngaihtuah mek a ni.

Tin, chu lovah chuan, chhiah khawn hrim hrim kha Pu Deputy Speaker, chhiah khawn hrim hrimah khan, keimahni Revenue kan indaihlo piah lamah khan, heti lai Village Council te pawh hmanruaah te pawh lo hmang duh dawn pawh lo ni ila, khatilalah khan kan Deputy Commissioner te hi District Collector an nih nain, anni telloin kan thawh vek theih loh chin a awm tlat mai a ni. Anni kha magisterial power nei an ni tel baw si a, churang chuan anni hian min puih kan ngai hle a. Churangin henga chhiah kan khawna leh chhiah kan lak khawma leh kan operation-ah hian kan Deputy Commissioner-ten thahnem min ngaihpuia min tui tulin kan hria a. Chu chu keini Revenue Department- in han koh mai pawh harsatna a awm avangin GAD lamte pawh ‘meeting min koh sak teh u’, kan ti a. Tunah chuan Saiha leh Lawgtlai lam te kan la ko thleng lo a nih pawhin Lunglei lam leh henglam hote chu koh thlen a khatia chhiah kan lak tur chungang pawh min puih theih dan tur, kan thawho theih dan tur te pawh sawiho kan duh hle a ni. Chutiang chu kan dinhmun mek a ni a.

Tin, mi tam takin ram lei chungchanga compensation chungchang hi Revenue Department hi min rawn zawt thin a. Keini Revenue Department hi chu kan bangbo angreng khawp a, a vang chu sorkarin ram lei tul a ti a nih pawhin khatia a lei tak tak a han tih tak taka kha chu District Collector kut alo ni tawh a. Keini Revenue Director lam kha chuan sorkarin eng department pawhin ‘chumi khami laiah chuan ram kan mamawh e, min lo teh fel sak teh u, an tih khan, keini Revenue-a kan surveyor-te khan an zuk teh mai a, ‘bigga chuti zat, acre chuti zat kha an mamawh’, an tih chuan an duhna lai kha an zuk teh a. Tikhan a map nen engkim suallo turin an ti vek a, chutianga an tihah chuan department-ah an theh lut ta a. A mamawhtu department khan District Collector hnenah a theh lut veleh a. District Collector khan dan ang tak khan ram mamawh acquisition ram lak tur a ni emawah khan notice a chhuah ta a, kha kha interest neiin an va chhang ta a, chutianga thil kal chu a ni a. Keini Revenue Department hi khang thleng khan kan chan emaw tia min rawn zawt hi an awm leh thin a, a ni tawh lova, khati laia thil kalah kha chuan D.C lam kutah khan a kal tawh a ni. A pawisa lam leh khatilai thil kha engmah va hriatpui kan nei tawh lova ni tih te pawh kha House-a ka din takah chuan min hriatpui ka’n duh a.

Tin, ram chhiah chungchang ngaituahna hi a nasa khawp a, Session hmasa khan chhiah punna a awm em tih zawhna kha member-ten an rawn zawh khan kei khan ‘a awm rih lo, ngaituah mek a ni’ ti khan ka chhangin ka hria a. Kha kha April thla-ah khan chhiah thar lakna tur Notice kha chu an chhuah ngei a ni. Amaherawhchu, ennawn leh a ngai a, a bik takin sorkar department land lease ho ah khan. Entirnan, Supply Department te chuan khawimaw laiah zau deuh deuh an lo nei ta a ni. Kan land lease dan tharah khan an chawi tam dawn khawp mai a ni. Chu chu department lam khan sorkar department leh sorkar department inchawitir tawh mai chu mahni pual tan pawh nilo, ram tan theuh theuh tih te. Tin, kan Governor compound khi, khitiang renguang khi a ni a, kan land lease dana han tih chuan a awmna a laili ropui si a, grade a sang ropui si a, kan Governor compound te khi Land lease engzatnge maw kan tuk dawn le tih te, tikhan ngaituah tur kha a lo tam em em mai kha a lo ni a. Kan Speaker Bungalow area te pawh a niang chu Pu Deputy Speaker, khitiang khan a lease rate chungchangah khan sawi nawn leh ngai kha a lo tam khawp mai a. A mimal leh hetilaia mimal ram kan va pek leh khang ai mah khan, chutiang chu an han thlir nawn an han thlir nawn khan tihdanglam

ngai awmlo khan, a Notification pawh a thara ti leh lo khan khatiang lai mipui concern lo lai tlemte han siam that khan tunah chutiang chuan hman chhoh a ni a.

Amaherawhchu, Department-in ngaihtuahna kan han hman telah chuan hemi land evaluation ang hrim hrim hi a ngaihtuahtu tur department maiin emaw ti lova Advisory Board ang chu a va ngai em ve aw kan ti a. Entirnan, keini chuan kan han then phawk phawk a, Aizawlah Zarkawt leh Dawrpui area kha hei hi pakhat ni rawh se, Square metre khatah chuti zat ni rawh se kan han ti a. Hetilaiah Vaivakawn lam chu hei chu 3 ni rawh se, Bethlehem Vengthlang lam chu hei chu 4 ni rawh se, khangah khan kawngkamah dawr kha chu an siam ve vek tho a, chutiang chu keini chuan grade kha kan han siam pawp pawp hleithei lova. Chumiah chuan a Stall man emaw, a dawr man emaw kha kan han tisang hlei thliah thliah lo thei lova. Mahse, hengte pawh hi a dik tak chuan keimahni department-in ngun taka kan han ngaihtuah ve a, an ram inhralh dan Dawrpui area-ah chuan per square feet 1 pawh hi ` 500 ai chuan a hniam lo ang a, Thakthingah chuan

` 400 vel a ni mai ang a, Vaivakawnah chuan ` 300 aiin a sang lovang a, khatiang Market rate khan kan han chhut ve a. Sobji Bazar velah chuan ram han hralh dawn ta se per square feet khatah chuan cheng chuti zat chu a ni ang a, ti ang te a kan han ngaihtuah vang vang a, Market rate awm atanga kan han chhut let a, chutiang khatiang chu a nih chuan, chutiang khatiangin grade I-ah awm sela, chumi chu grade 2-ah, chumi chu grade 3-ah, grade 4-ah, grade 5-ah, grade 6 thlengin te kan han ti ve zawi zawi a. Chutah chuan grade 1 chuan chuti zatin kumtin chhiah pe ve sela, grade 1 A chuan, grade 1B chuan chuti zat te kan han ti ve thlap thlap a. Mahse kha kan tih dan kha complaint awm thei a nihna laite pawh a awm a, chuvangchuan, department hian uluk taka kan chhut ni tho mahsela, khatiang min thlirpuitu Evaluation Council kan ti dawn nge, Committee kan ti dawn, Board angte hi chu a va tul em.

Tunah kan member zahawm tak pawh khan a rawn sawi kha, thingtlangah chuan a sang lutuk a ni a rawn ti mai a ni. Aizawlah chuan a zia viau pawh a ni thei e, mahse thingtlangah in tisang lutuk tih te, khatiang Zoram pum thlir kha a tul viau a. Amaherawhchu, a lehlamah hian land evaluation hi kan tisang lo thei lova. Sorkarin a lo mamawh a, Company-in a lo mamawh a, Department-in a lo mamawh a, mimal pawhin

kan lo mamawh a, ram kan han inlei meuh hi chuan thang hmun mai mai, engmahloa kan ngaih mai mai pawh hi nuai 20 te a lo nih tak mai thin si avang khan, heti laiah hian, ‘chhiah lak hi chu a lo awm ve e, chhiah tihpun te pawh hi a ngam awm ve alawm’, tiin inthlahrunglo tak khan kan han ti a. Gazette-ah te kan han chhuah a, khati zawng khan kan han la a. Thenkhat chu a ram valuation kan han tihpun takah hian an lawm ve em em thung mai a. Chutiang chuan ram valuation khan a rawn keng tel tawh a. Sorkar in ram an la dawn, a to thei ropui si a, chutih laiah khan an in zawrh huai huai a.

Tin, Pu Deputy Speaker, chumi rual chuan ram acquisition chungchangah hian pen hleih theih lohna lai kan nei a, chu chu kan India sorkar laipuiin ram inlei dan thar a rawn siam a, keini chuan kha dan thar kha a nih ang anga hmang mai thei niin kan inhre lo a. Mahse, kha khan kan dan lo hman thin 1894 dan kha a rawn tihawp vek baw si-ah khan, 371 G-ah ownership and transfer of land-ah chuan Parliament-in dan pawh siam mahse Mizoram a huap ve lo vang tih a awm ve kha maw. Hemi tlawh chhan hian kan ram lam an lakna chungchangah te chuan dan thar kan siam ve thei ang a kan ti a, chutiang chuan khami han duang tur Committee te pawh kan han siam a.

Chutianga land acquisition dan Mizoram State Land Acquisition Act emaw a hrana han neih te kha a tul dawnin kan hre ta a, chutiang chu kan han buatsaih a. Mahse khami karah khan gap a lo awm ta a, 1894 dan kha hnawl a lo ni tawh si a, keimahni state-a hman tur dan thar kan la siam baw si lova. Chuvang chuan kan hotute an inngaihtuah vang vang a, ‘Land Acquisition lam hi chu a bu hi khup thap mai ila, acquisition dan bung chuti khati kha khup hmiah mai ila, mimal inleiin sorkar department-te pawn ram an lo mamawh a nih chuan Lala kha lo va dawr ta mai se, Lala ram kha lo va lei ve tawp ta mai se, keini chuan hriatpui a tul hle a nih hun hma chuan hriatpui lo mai ila, chutiang chuan purchase system khan lo kal phawt mai se, acquisition system ni lo khan, a phalna pawh pe hran lem lo ila, lo ti rawh u pawh ti hran lem lo khan, a nachang kha lo hre ta hlawm mai sela’, tih te kha kan ngaihtuahnaah khan a la awm ta mai mai a.

Dan thar an siam kha a tha leh lutuk a Right to Fair Compensation, ‘Fair’ tak a compensation pekna chanvo “Right to fair compensation, Settlement,

Rehabilitation and Acquisition Act 2013” an ti a nih chu. Tichuan Right to fair compensation to land, ram a lak sak tana fair taka compensation pekna dan a nih chu. Keiniah chuan ‘ram lei duh an awm em’? kan ti a, kan zawrh huai huai mai a, sorkar department chu lei to tir kan tum a ni a, kan fair lo hle zawk a ni. Khuta kan hotuten an duh dan chuan fair compensation an duh a ni, fair taka Right to Fair Compensation a ni tlat mai a ni. An pi leh pute hun atanga an ram, a bak ram an nei lo, tu emawin a ram an han chhuhsak chuan an tap ngawih ngawih mai a ni. Chungte dinhmun atan chuan UPA sorkar khan, ‘ram lak sak an nih pawhin an ram hlutna an pe ang. A bakah resettlement an pe ang, an rehabilitate bawk ang’, a ti a ni. An awmna tur te pawh an sak sak ang a, eng emaw hunah an baihvai chuan an rehabilitate bawk ang, an ram man an pek bakah a lo ti kha a ni a. Keini ramah chuan kha dan kha han hman mai hleih theih loh la ni rih khan kan hre si a, chu chu kan dinhmun a ni.

Pu Deputy Speaker, Revenue sawi zauna kan nei a, ka sawi rei hle a, min lo ngaihthlak that sak avangin ka sawi lai mekin member-te khan ‘khami kha’ min lo ti lova, a lawmawm ka ti khawp mai. Pu Deputy Speaker, ka Demand No. 6-na Land Revenue & Settlement `1999.25 lakh, Demand No. 12-Parliamentary Affairs Department ` 53.43 lakh, Demand No. 21-Higher & Technical Education ` 17542.65 lakh, Demand No. 23-Art & Culture ` 1606.50 lakh, a vaiin ` 21201.83 lakh, hi House-in min pawmpui ngei turin ka rawn thlen a ni e. Ka lawm e.

DEPUTY SPEAKER : Minister-in a rawn sawi fiah a, pass a rawn dil bawk a, kan buk anga. Pu R. Romawia, Minister zahawm tak Demand No. 6-na Land Revenue & Settlement cheng nuai 1999.25, Demand No. 12 Parliamentary Affairs Department cheng nuai 53.43, Demand No. 21 Higher & Technical Education cheng nuai 17542.65, Demand No. 23 Art & Culture cheng nuai 1606.50, a vaiin cheng nuai 21201.83 te pass remti a piangin ‘Remti’ ti rawh u le, remti lo kan awm chuan ‘remti lo’ ti rawh u le, remti lo kana wm lo. Pu R. Romawia Minister zahawm tak Demand No. 6-na Land Revenue & Settlement cheng nuai 1999.25, Demand No. 12 Parliamentary Affairs Department cheng nuai 53.43, Demand No. 21 Higher & Technical Education cheng

nuai 17542.65, Demand No. 23 Art & Culture cheng nuai 1606.50, a vaiin cheng nuai 21201.83 hi House-in lungrual takin a pass ta a ni.

Pu R. ROMAWIA, MINISTER : Pu Deputy Speaker, ka lawm e.

DEPUTY SPEAKER : Tunah chuan Pu John Rotluangliana, Minister zahawm takin rawn wind up ve leh sela, pass pawh rawn dil nghal ve mai sela a tha a nge .

Pu JOHN ROTLUANGLIANA, MINISTER : Pu Deputy Speaker ka lawm e. Ka Demand hi member 7 in an sawi a, a bik takin supply chungchang phei chu an sawi vek a, a tam zawkin lawmthute an sawi avangin an chungah lawmthu ka sawi duh a. Tin, a sawitu hmasa ber kan member zahawm tak Pu Lalthanliana khan ti laia a han zawh major works atan nuai 1500 awm hi eng atan nge a tih kha hei hi NABARD loan kan lak a ni a, godown sakna tur atana tih a ni. Tin other charges a nuai 2000 awm kha district carrying route a carrying bill pek tur atan dah a ni tih kha ka'n chhang hmasa a. Tin, Pu John Siamkunga rawn sawi Tarpho lama godown tihtawp tumna a awm em tih kha, tunah rih chuan a awm kan hre rih lo va. Amaherawhchu Pu Deputy, Speaker kudam hi hmun thekhatah chuan khaw dang chawm miah lovin khaw pakhat kudam pakhat awm ngawtna te a awm avangin chu te chu en nawn leh ni se kan ti a. Tin, ka bial Hmunpuiah phei chuan kudam a awm a, Hmunpui khua chauh a chawm avangin kan titawp tawh nghe nghe a ni. Chutiang chi te a la awm a nih chuan kan la ennawn leh turah ngai ila a tha awm e.

Tichuan, ka Demand Food & Civil Supplies bikah khan han lut ta ila. Pu Deputy Speaker, in hriat angin Supply Department hna chu mipui hnena buhfai sem a ni a. Buhfai-ah hian normal allotment kan hmuh hi thla khatah quintal 52210 a ni a, mahse hei hi kan khawp kham loh avangin additional allotment-ah hian quintal 80000 kan mamawh thin a ni, chumi quintal 80000 chu FCI atangin economic cost an ti a, kg-ah ` 29.81 in kan lei thin a. Mahse tun hnaiah khan local purchase-in local supplier tender kan chhuah a, chuta a chhang hniam ber chuan kg-ah ` 25.75 in min supply thei a, tun thla kalta khan quintal 30000 min supply thei a. Hei hi tunah hian sorkarah kan dil mek a, thlatin quintal 80000 hi

FCI atanga la lovin local purchase hi a tlawm zawk si a, local purchase-a lei min phalsak zawk turin kan dil a, min phalsak a nih chuan heta tang ringawt pawh hian sorkarin cheng vaibelchhe 3,24,80,000 lai a safe thei dawn a ni. Chutiang chuan theihtawpin buhfai-ah sorkar-in tan a la a, harsatna em em kan tawh rih lova.

Tin, Food Security chungchangte pawh kan sawi thin a, hmannah pawh khan ka sawi a, tunah hian central sorkar pawhin thlaruk chhungin Food Security Act hi hmang turin min ti a, heta tan hian Department pawh a inpuahchah a, draft rule pawh a siam zo vek tawh a, sorkar-ah a thehlut a, approve mai tur a ni. Amaherawhchu, hei hi kan sawi thin ang khan Pu Deputy Speaker, Food Security Act hi Mizorama kan hman ve chuan central sorkar-in min phalsak chu mi 701000 tan chauh min phalsak a, chu chu mi pakhat quota-ah kg. 5 a ni a, ` 3/- a lei a, ` 3/- a hralh tur a ni. Chumi a nih chuan a bak zawng kha sorkarin min pek belh dawn tawh loh avangin kan ram atan chuan he Food Security hi a nghahhlelhawm em em lem lo a ni.

Pu Deputy Speaker, buhfai chungchangah khan kan sawi thin a, khawmpui nikhua leh Christmas nikhua hian sorkar hi min pur lo hram hram ula kan ti a. A chhan chu quota nei sa veka lei kan nih avang khan kan quota tur advance-in kan ei tihna a ni a, chumi chu sorkarin a hranpaa kan lei leh khan nasa takin sorkarin sum kan seng a ni. Khawmpui-te pawh hi khuain kan thlen dawnin kan hre lawk a, tlema awm thei deuh chuan Vawk-te an lo vulh lawk a, a thenin Ar-te an lo vulh a. Amaherawhchu, a man tlawm ber leh a daihzai ber buhfai lak khawm kan tum tlat lo va, sorkar-ah bawh kan dil leh thin hi chu kan mind set hrim hrim hi Mizo mipuite hian kan thlak ve tawh a hun lawm maw ni le kan ti a ni. Amaherawhchu, a awm miau lo a nih chuan ei tur ngaihtuhtute kan nih angin kan ngaihtuah tur a ni kan ti tho a. Mahse tun ang renga kan kal hi chuan MEGA Block te kan hmachhawn a, tunah khua te a thal a fur pui ten min la tlakbuak lova, kawng ten harsatna min la thlen loh avangin buhfai leh ei chawp thilah te pawh harsatna kan la tawh em em lo zawk a ni.

Tunah hian LPG ah te, Petrol leh Diesel chungchangah pawh harsatna kan la tawk em em lo a, ka sawi angkhan kawng tha lutuk lo mahsela a lo kal ve thei reng a, harsatna tawk lovin kan kal a. Buhfai-ah pawh kan dinhmun a tha a, mipuite tan pawh thlaphanna tur a awm lemlo a ni.

Tin, thil thar han sawilan ka duh chu direct benefit transfer scheme tih hi IOC Ltd. in an rawn tih a ni a, kan Gas lak hi chhungtin hian kum khatah bur 12 chauh hi subsidy a kan lak theih a ni, chumi pawh chu a man tlawmin ` 400 leh tlemin a distributor-te hnenah kan lei mai a, chu chu nakum April atang hi chuan a tih theih dawn tawh lo va. Consumer ten Bank-ah Account kan hawng ang a, tichuan kan Account No. te, kan contact No. te leh kan thlalakte nen kan distributor-te hnenah kan thehlut vek ang a; tichuan a rate pangngaiin kan lei ang a, min subsidy-na chu nakinah kan account-ah khan a lo let leh dawn a ni. Chutiang chu tun kumtharah hian kan hman turin ruahmanna an rawn chhawp a ni. Kan sawi tak angkhan MEGA Block kan buaipui em em a, mahse harsatna em em kan la tawk lova, chutih lai karah chuan eichawp zuarten MEGA Block chhuanlam hian thil man an tito thut thut ang tih kan hlau a, chumi veng tur chuan flying squad te siamin NGO hrang hrangte nen kan thawk ho a. Dan kengkawhtute nen ruahmanna fel tak siam a ni a, eichawp thil man sang tur veng turin District tinah price monitoring cell din a ni bawk a ni.

Tichuan, Kudam-te pawh hi kan indaihlo em em a, Mizoram pumpuia kan go-down neih hi dah khat vek ila thla thum ei awrh kan stock thei tawk a ni. Tunah hian PWD kaltlangin Kudam 17 sak zawh a ni tawh a, mahse hei hi kan department-ah min la hand over chiah lova. Tichuan, NABARD loan hmangin Kudam 27 leh quarter sakna turin tunah hian loan ` 32,68,20,300 kan dil a, tunah hian 1st Instalment engemaw chen min pe tawh bawk a ni. Tin, Supply Department hian computerization kan ti a, hei hi kan Ration Card te kan computerize a. Hei hi ration card lem venna tur atana tih a ni a, a phase khatna kan zo lek lek tawh a, 89% lai kan zo tawh a ni. Tanhril bula FCI go-down vawiina a veng neitute leh University lamin hnawk an tih em em khu keini pawhin dah sawn kan duh a, amaherawhchu FCI go-down a ni miau a. Hmanniah khan kan hotuten High Level Committee lo kalte kha a lo ngen tawh a, anni pawhin theihtawp

chhuaha min dah sawn sak an tum a. Sihhmui-ah khuan ram bigha 28.68 identified tawh niin FCI-te hnenah pawh hriattir an ni tawh a, anmahnin hma rawn la chhonzawm tura tih an ni a. Tin, LPG leh POL storage depot te hi siamna turin ram ruahman a ni tawh a. Vairengte-a Satellite Storage Depot-te pawh hian Indian Explosive Act Safety Standard Norms a phak tawh loh avangin khutilaiah khuan POL kan dahkhawm thei tawh lo va. Tunah hian POL kan stock ve theihna ber chu kan retailer-ten an dah khawl ang ang hi a ni mai a. Chu chu an dah khah vek pawhin ni 3/4 bak hi kan stock thei lo a ni.

Tin, LPG Bottling Plant dahna tur atan hian Sairang Dinthar-ah khuan department-in ram kan offer a, bigha 8.2 a ni a. Pu Deputy Speaker, kan Deputy Commissioner lam ten he LPG, POL dahna turin ram tunah hian ruahmanin Sairang Lengte Road-ah Acre 30 lai enfiah tawh a ni a, hei hi IOC Limited-ah offered a ni a. Vawiinah a chhanna kan la hmu lo deuh a ni.

Tin, Mizoramah hian FCI Regional Office kan nei ve lo va, Regional Office hi min dah ve turin kan dil ve a, a nih loh chuan kan Hills State Transport Subsidy te hi kan la ve lawk thei lo va, a sawina tur a hla a, Mizoram-ah Office min siamsak ve rawh u kan ti a. Hmannia High Level Committee-ah pawh khan kan lo thlen bawka. Hengte pawh hi anni pawhin min rawn pek theihna turin hma min laksak dawn a, an chungah pawh lawmthu kan sawi a ni. Tunah hian kan buhfai lak thin economic cost-a kan lei thin kha nichina ka sawi kha quintal 80000 hi local-a kan lei chuan thlatin a kan tlakhniamna tur kha veibelchhe thum tel a ni a. Kum khatah phei chuan veibelchhe tam tak kan safe dawn a ni. Tunah hian VIP quota kan tih pawh hi Pu Deputy Speaker, a vai hian sitting MP te, sitting MLA te leh MDC te hian thlatin buhfai kan la a, quintal 332 kan la a, Ex-MP, Ex-MLA, Ex-MDC te hian an la theuh bawka, a vaia VIP quota la chin ho buhfai belhkhawm hi quintal 670 a ni. Tunah hian kan VIP quota la thin zawng zawngte hi kan sorkar thu tlukna angin tun thla December bak hi lak tawh loh ni se kan ti a. Kum thar January thla atang chuan he VIP quota hi a tawp tawh dawn a ni. A lehlamah chuan a uiawm zawnga ngaihtuah chuan a uiawma, keini pawh hi a hmang tangkai leh a chhawr tangkai ber te zinga mi kan ni. Amaherawhchu, kan

thinlungah awm se ka duh chu, kan hlain a tih angin hmangaihten malsawmna an chan theih nan, hmangaih tun a tuar a tul si thin tih te pawh a awm kha mawle. Chuvangin kan inpekna te pawh ni ve sela.

Hemi VIP quota kan tihtawp rual hian he House zahawm tak kaltlanga ka han sawm duh leh ka han ngen duh chu, kan sorkar officer lian zawng zawngte leh kan sumdawng hausa te, contractor lian te hian an Ration Card te pawh hi rawn submit ve sela, rawn surrender ve sela. Amaherawhchu, an Ration Card te hi identification a hman a nih avangin chung Ration Card rawn surrender reng rengte hnenah chuan Ration lak lohna Identification atan chauha hman turin Ration Card a hran kan lo siam sak dawn a ni.

Chutianga VIP te leh kan officer-te leh sumdawng hausaten Ration Card an rawn surrender vek chuan miharsa zawk, zokhaw lamah buhfai mipakhat thlakhat-ah buhfai 8 Kg kan pek te, an khamlo a, chungte pawh chu Ration Card rawn surrender an tam dan azirin buhfai kan pek belh thei dawn a ni. Tin, buhfai man hi ` 9.50 in kan hralh a, FCI-a kan leina kha economic cost khan ` 29.81 a ni a. Khatia kan lei khan kan hralh lehna chu ` 9.50 a ni a. Tin, local purchase-a kan lei chuan ` 25.75-a kan lei pawh hi ` 9.50 thoin kan hralh a, sorkarin nasa takin Supply-ah hian sum a paih ral a. Chuvangin kan buhfai mante pawh hi a lo tlem ta lutuk a, kan lo ring rei ta lutuk a. Tin, chumi rualin thil man tam tak, engkim a pung tawh a, tuna kan buhfai man hian kuhvakhawr fun khat pawh a lei zo tawh lo a ni. Chuvang chuan kan sorkarin nguntaka a ngaihtuahin buhfai man pawh hi kum thar January ni khat atang chuan Kg-ah ` 15 a ni tawh dawn a ni.

Hetia buhfai man tihsan a nih chuan sorkarin a senso hi thlatin vaibelchhe 4 leh nuai 56 in a tlahniam tawh dawn bawk a ni. Economic cost-a kan lei loh a, local purchase-a kan lei khan thlatin vaibelchhe thum leh nuai sawmnga leh paruk velin kan senso a tlahniam ang a. Buhfai rate ` 9.50 atanga ` 15-a kan tihsan hret pawhin cheng vaibelchhe 4.56 in a tlahniam dawn bawk a, a chhe berah

thlakhatah Buhfai man hi vaibelchhe sarih velin Pu Deputy Speaker, a tlahniam ang a, sorkar pawisa kan safe thei dawn a ni.

Buhfai hi sorkar kan rin lutuk avangte pawh hian a niin ka hria bazar-ah te hian lei tur a vang em em a, Zokhaw lamah te pawh sumdawngte pawh hian an zuar tlem em em a, Buhfai hi mithenkhaten zawrh dawnin permit ngai tlatin an ngai a, permit min rawn dil te pawh an awm a ni. Buhfai zawrh nan hian permit a ngai lo, a kuhvakhawr zawrh tawp theih tih kha kan hriat a pawimawhin ka hria. Amaherawhchu, Supply buhfai te, FCI buhfai te hi chu a zawrh theih loh. Guwahati-ah te, Silchar-ah te, Kolkata-a lak te hetia rawn zawrh ang hian a zawrh mai theih a, special permit a ngai chuang lo a ni tih kha Zoram mipui hriatah ka sawi duh a. Kan sumdawng thil ngaihtuah te phei chuan buhfai zawrh dan te pawh hi Zokhaw lamah leh Aizawl khawpuiah te hian tam zawkin zuar sela chuan hei ai hian Supply Department pawh hi kan zangkhai ngei ka ring bawk.

Tichuan Pu Deputy Speaker, ka Demand No. 36-na Transport. Transport hi kan hriat theuh angin Mizoram-ah chuan Department Senior berte zinga mi a ni tawh a, revenue te pawh hi an lo lalut hnem angreng tawh a. Keipawh ka luh hma chuan Transport Department hi Bus sawprawp deuh deuh an enkawl deuh maiah khan ka lo ngai a. Amaherawhchu, chutiang a lo nilo a. Mizoram sorkar tan hian chhiah tam tak an lo lalut a, kum 2013-2014 chhung hian ` 23,55,23,00 lakh (vaibelchhe sawmhnih pathum nuai sawmnga panga sing hnih leh sangthum) lai an lo lalut a ni. Tunhma chuan Transport Department hian zin vei vak te, khualzin zawng zawng an phur a ni ber a, amaherawhchu, tun hnuah Maxi Cab te a lo awm takah hian, hengho private ho tan hian sumdawna an lo kian zawk a lo ni a. Tunah chuan a hlawk lo lai leh a kawng chhe laiah private operator-te kal duh lohna laiah an lo service chauh tawh a ni a.

Transport Department-ah hian a pawimawh deuh deuh wing pahnihah an lo then a, chungte chu MST Wing kan tih leh MVI Wing kan tih te hi a ni a. Tunah hian MST hian Mizoram chhungah leh pawnah Bus an tlantir a.

Amaherawhchu, Maxi-Cab te hi an lo tlan tam ve tak avangin kawng tam zawkah Bus hi an lo tlan lo a. Mahse, tun dinhmunah hian Maxi-Cab chuan man te a lo to tak avang hian Bus thar tlan tir turin khaw tam takin min dil a. Tuna a hminga Minister ka nih hnuah chuan Teikhang-ah kan tlan tir a, Tuipuibari-ah kan tlan tir bawk a. Hmanni khan ka sawi sual a, Pu Rinmawia te bial Serhmun-ah khan December ni 3 atangin kan tlan tir dawn bawk a ni. Chutiang chuan khaw hrang hrangah kan thianten Krismas dawna tlan tir tura min rawn dil te pawh kha kan hotu, kan officer-ten an lo hria a, khangte pawh kha tun krismas hma ngei hian tlan tir turin ruahmanna an rawn siam bawk a ni.

Tunah hian Bus hi 47 kan nei a, Ambulance 1 kan nei a, Recovery Van 2 kan nei a, Crane hi 4 a te chi kan nei a, a lian 1 kan nei bawk a. Tunah hian kan rilrua awm leh kan ruahmanna chu kum thar atang chuan Bus hi District tinah dah ila kan ti a. Aizawl ringawt tinzawn lo hian District Headquarter tinzawn hian Bus te pawh hi service ve sela kan ti a. Entirnan, Champhai-ah te kan dah chuan Champhai atangin Farkawn lamah te, Hnahlan lamah te a service ve ang a. Chutiang chuan District khawpui lam tinzawnin, tunah hian Kolasib-ah te Serchhip-ah te leh Lunglei, Saiha leh Lawngtlai lamah te Bus kan dah a. Tichuan Mamit leh Champhai lamah te kan dah chuan Mamit pawhin Kawrthah lamah te, Kanhmun lamah te an service ang a, a changin Phaileng lamah te. Tichuan, District Headquarter lam hawi zawng hian Bus service ve sela, District Headquarter tinah hian Bus dah ni sela, tiin ruahmanna kan siam a. Chu chu kumthar January thla-ah tan hman kan tum a ni.

Hmannia zawhna ka chhannaah khan ka rawn sawi lang tawh a, Silchar-ah hian hun rei tak a lo service tawh lo va, tunah hian service thar tir leh a ni a, Bus te chi, Air condition Bus mi 12 thut theihna, chuan theihna chauh a ni a. Chung chu tunah hian kan lei thar a, Bus kan service tir a, nitin Aizawl atangin dar 3:00 ah a chhuk thla a, khuti lam atangin dar 3:00 ah a lo chho bawk a ni. Chutiang chuan Bus te pawh tihthar chhoh zel kan tum a ni.

Tichuan, MVI Wing kan tihah hian anni hianin motor registration leh license pek te, tax leh fees vel pekte hi an khawih nasa a, anni hi tax laluttu ber an ni a. Kum 2013-14 inkar khan Road Tax atangin vaibelchhe 9,00,5,89,000 an lalut a, Passenger and Goods Tax atangin nuai 261 leh 13,000 an la lut bawk a ni. Tunah hian DTO Office tinah computerization kalpui a ni a, Smart Card kan tih pawh hi District tinah kalpui tum a ni a. Tunah hian Aizawl leh Kolasib-ah kan hawng tawh a, tun kan Session zawh maiah hian Lunglei-ah hawn leh kan tum bawk a ni.

Tin, Transport Department hnuai hian Railway Out Agency an ti a, hei hi Rail Ticket book theihna a ni a, tah hian 2% kan lo ei ve a, nikum financial year pawh khan nuai 19 lai kan hlawh ve a ni. Tunhma chuan Kolkatta thlang lampang kal dawn chuan Rail ticket hi Kolkata-ah te book a ngai thin a. Tunah chuan Aizawl atang hian India ram hmun hrang hrangah pawh kal dawn ila a book theih vek tawh tih kha ka'n sawi duh a ni.

Tichuan, tunah hian central sorkarin Ministry of Roads Transport and Highway-in min rawn offer angin Institute of Driving Training & Research at Hlimen, tuna kan Driving School, Hlimen ami saw, min tihchangtlun sak an tum a. Tunah hian 'project rawn siam ula, DPR rawn thehlut rawh u,' an ti a, vaibelchhe 17 man project kan siam a. Chu chu tunah hian kan thehlut tawh a, hei hi (zaah za) 100% grant tur a ni a, min approve kan nghak a. Hei hi driving zirna changkang tak a nih rual rualin private-a Driving School hawng zawng zawngte pawh hei hian a khai khawm vek dawn a ni. Chutiang chuan ruahmanna siam a ni a. Tin, hei lo pawh hi Inspection and Certification Centre at Aizawl an ti a. Hei pawh hi Ministry of Road Transport and Highway thovin ti tura min rawn tih a ni a. Motor an endik velna tur kawngpui bulah heta tan hian crore 7.75 hei pawh hi 100% grant turin DPR siam a ni tawh a, DPR pawh thehluh fel a ni tawh.

Tin, tunlaiin, Diesel te, Petrol te a to em em a, chumi avang chuan Electric Vehicle an ti a. Chutiang chu electric leh electric-a charge theih leh Nizung hmanga kal thei turin, solar hmanga kal thei turin motor kha introduce ni se an ti a. Hei hi Ministry

of Heavy Industry ten dil ve tura min tih angin tunah hian Car 2 leh Mini Bus 2 kan dil a, chumi dilna chu kan thehlut ve mek a ni.

Tin, nichin khan ka sawi hmaih loh tur pakhat a awm a, chu chu Supply Department-in kan enkawl tho Legal Metrology hi sorkar laipui hian a ngaipawimawh a, anni hi petrol, khawnvartui leh diesel pawlh dal tih velah hian an tangkai em em a, tunah pheih chuan hetiang petrol, diesel pawlh dal tih vel te hi khawlaiahte pawh hian sawi hi a awm tawh lo deuhin ka hria. Chutiang chuan theihtawpin Legal Metrology te hian tan an la a. Tin, tun thla li/nga kalta vel te pheih kha chuan gas chungchangah a buk a tling lo tih te kha a tam em em a. Hma an han la a, a then an man a, chutiang chuan Gas lo thleng apiang hi an lo check thin a, tunah chuan gas bur a tling lo tih pawh hi a thawm a reh ta a.

Tin, cement a dik lo, a buk a dik lo tih leh khal thei miah lo cement te pawh kha a lo awm a, chungte pawh chu Legal Metrology te hian theihtawp chhuahin hma an la a, chutiang chuan tunah hian Working Standard Laboratory siam nan Serchhip te, Mamit te, Champhai, Kolasib leh Lunglei te tan cheng nuai 25 theuh minrawn pe a, Lunglei, Champhai leh Kolasib-ah te tihfel a ni tawh a, Mamit leh Serchhipah hmalak mek a ni a. Tin, tunhnaiah khan Lawngtlai leh Saiha tan nuai 50 ve minrawn pe leh bawk a. Tin, Aizawl-ah Controller of Legal Metrology Headquarter sak nan cheng nuai 100 minrawn pe bawk a. Heng hi tunah hian hmalak mek a ni bawk a ni.

Tichuan, Pu Deputy Speaker, ka Demand No. 43-na Tourism-ah khan han lut leh ta ila. Kan hriat angin Tourism Department-in a tum ber chu khualzin tam thei ang ber Mizorama hip luh a chung khualzinte chuan sum tam tak Mizoramah thlauh sela, chungte chu Mizoram hmasawnnan a pawimawh a ni kan ti a, chutiang chuan Tourism Department hian theihtawpin hma ala a. Nichinah khan member zahawm tak Pu Ngurdingliana khan Chalfilh tlangah te Trekking Route min siam sak dawn a, a lawmawm khawp mai a tih te, hetilaiah pawh hian tawitein ka'n belh hlek ang a. Tunah hian kan thalaiten an hman tangkai theih turin khualzinte hip nan Aizawla kan neih sa Reiek, Ailawng Trekking route kha a lun em em mai a. Hmun dang atanga trekking tura an lo kal hian a ngaiah bawk an kal tlut tlut mai a, chuvangin a thar siam a ngai a nih hi

kan ti a. Tichuan tunah hian Tuirini, Chalfilh, Tamdil Trekking route leh Vawmbuk, Phawngpui, Sangau, Phawngpui trekking route-te siam turin ruahmanna peih fel vek a ni tawh a, reiloteah hna chhonzawm theih a nih kan beisei a. Riahbuk tur te, a camp site tur te ruahman vek a ni a. Tin, hemi atan hian pawisa sanction 1st installment kan hmu tawh a, hna kan tan mai dawn a ni. Chutiang chuan Tourism Department hian hma kan la a.

Tin, Aero-sport chi hrang hrang Hot-Air Balloon tih te, Power Hang Glider tih te, Para-gliding tih te hi khualzin hip nan leh thalaite tan sorkar chuan a ruahman a. Tunah hian project kalpui mek a ni a, Mizo thalai 9 Para-Gliding basic, intermediate leh Advance course-ah te midang zirtir chhawng thei khawpin an training zo tawh a, an thiam tawh a ni.

Tin, Tourist Lodge chungchang kha chu tam tak ka sawi lo vang a, hmun hrang hrangah kan nei a. Kan sawi tak ang khan privatization ti turin hma kan la a, 1st phase atan 15 kan thlang chhuak a. Tichuan heng hi kan hlawhtlin dan azirin a dangah pawh tih zel kan tum a ni. Tin, a theih pheih chuan Lai, Mara, Chakma District-ah te pheih saw chuan kan District Council te sawn min lo enkawl chhawk thei lawm ni tiin anni te pawh bia ila kan ti hial a ni.

Tin, tunah hian State Institute of Hotel Management an ti a, Bung Bangla hmunah sak a ni a. Hemi atan hian Ministry of Tourism, Govt. of India chuan vaibelchhe 10 a sanction a. Tunah hian Administrative Block te, Boys Hostel leh Girls Hostel leh building dangte vaibelchhe 8 senga sak zawh a ni tawh a. A bul tan nana thawk tur faculty leh staff te hi state sorkarah ngaihtuah tur a ni a. Tunah hian kan dil a, amaherawhchu kumin chhung hi chuan min pe thei dawn lo va. Kum thar lamah chuan min pek theih kan beisei a. Heng post te hi create an nih chuan, central sorkar lam pawhin equipments te leina turin vaibelchhe 2 min release leh dawn bawh a ni. Tin, he Institute-a lut tur hian admission hi National Open Entrance Exam hmanga tih tur a ni a. Heti laia a duh duh Pawl 12 ka pass tawh tih ngawt a kal theih a ni lo va. National Level-ah entrance exam te tih vek tur a ni a, hnam dang zirlai tam tak an rawn tel dawn bawh a ni. Hetiang ang Hotel Management Institution te hi kan lo neih chuan sorkar ang pawh ni

lovin, mimal ang pawhin tuna kan hotel te leh kawngsir lama chaw eina tur hotel kan siam zawng zawngte pawh hi a lo changtlung tawh ang a, kan chet dante pawh a lo thianghlim tawh ang a, mithiam kan ngah hunah chuan. Chutiang te chuan hotel te pawh an lo run tawh ang a, kan ei bangte chhunglut mai mai tawh loin, thianghlim deuh zawkin heng zir lai zir chuakte hian an run thei tawh dawn a, kan sorkar leh mipuite tan an tangkai dawn a ni tih kha ka'n sawitel duh a ni. Tunah hian kan Department kal tlang hian Institute of Hotel Management, Guwahati-ah leh Shillong-ah khuan Food Craft Course, Class 12 pass tan Hotel Management Course hi Mizo naupang Mizoram sorkar sponsor-in Tourism Department hian a thawn thin bawk a ni.

Hei Festival kan ti a, Anthurium Festival te kan ti a. Tun December 10-12 hian Tuirial-ah Pu Deputy Speaker, Tuirial Airfield hlui, i bial chhungah Festival neih ni se kan ti a. Thal Favang Kut cum Youth Festival kan ti a. Amaherawhchu, hei chu kan han tihna chhan hi Thal Favang Kut atan hian Ministry of Tourism-in fund min pe sa thin a. Amaherawhchu, he Festival hi lian tham deuh zawkin nei ang kan tih avang zawkin fund kha dil belh leh kan duh a, NEC lamah khan kan dil belh duh a. NEC lamah kha chuan Youth Festival tiin kan dil a, mahse NEC lampang khan, 'tihhran a ngai chuang hlei nem, Thal Favang Kut ti tho pawhin min dil leh rawh u,' an tih avangin Thal Favang Kut tih thoin kan dil leh ta a. Tichuan, kan dil anga min pek chuan tuna Thal Favang Kut cum Youth Festival tih ngai lo hian Thal Favang Kut lian tak kan nei thei dawn a ni. Hetah hian cultural programme hrang hrang bakah thalaite hip tur adventure sports te, a bikin aero sport te, hot air balloon te, para Gliding leh Power Hang Glider te entir tum a ni a. Tin, motor sport hrang hrang mai bakah rifle shooting te, archery te, aero modelling te, photography leh painting exhibition te neih tur a ni a. Carnival te, BMX stand te leh handloom leh handicraft dawr te siam tum a ni a. Tin, eitur hrang hrang food festival angin Mizo chaw duh zawng te, a then te phei chuan uisa bai te pawh an siam ang, a thenin vaipaden te pawh an siam ang, a thenin hmar bai te. Tin, chumi rualin fried rice nen chi hrang hrang, changtlung thei ang berin tih kan tum a. Hemi ni hian vawiina kan member pui zawng zawngte he Thal Favang Kut December ni 10,11,12 a hman turah hian kan sawm che u a. In nupui fanaute nen theuh lo kal turin kan sawm che u a. Chumi piah lamah Zoram mipui zawng zawngte he Thal Favang Kut min rawn hmanpui tur hian kan sawm bawk che u a ni. Tunah hian kan ramah hian foreigner tourist hi an lo lut ve

renga. Nikum chhung khan tourist ho hi 65,489 an lo lut a, kumin August thleng khan 27,685 an lo lut ve a. Tunah hian Tourism Department hian zawi zawiin hma kan sawn chho ve zel a. Tunhma a Department te tak te ni thin kha tunah chuan khaw tinah Tourist Lodge awm lohna pawh kan nei mumal tawh lo a ni.

Awle, Pu Deputy Speaker, ka Demand No. 17 na Food, Civil Supplies & Consumer Affairs, vaibelchhe 26536.49 leh Demand No. 36 –Transport, vaibelchhe 4475.56, Demand No.43- Tourism, vaibelchhe 1538.54, a vaiin vaibelchhe 32,550.59 te hi he House zahawm takin min pass pui turin ka han dil e.

DEPUTY SPEAKER : Awle, Minister-in a Demand te rawn sawwifiahin pass a rawn dil bawh a, kan buk leh nghal mai ang a. Tunah Pu John Rotluangliana, Minister zahawm tak Demand No. 17 – Food,Civil Supplies & Consumer Affairs, cheng nuai 26,536.49; Demand No. 42 – Transport, cheng nuai 4475.56; Demand No. 43 - Tourism, cheng nuai 1538.54, a vaiin cheng nuai 32,550.59 te hi pass remti apiangin ‘remti’ ti ru le (Members : Remti) Remti lo kan awm em ? Remti lo chuan ‘remti lo’ ti rawh u le. Remti lo kan awm lo va. Awle, Pu John Rotluangliana, Minister zahawm takin a Demand No. 17-na Food,Civil Supplies & Consumer Affairs, cheng nuai 26,536.49; Demand No. 42-na Transport, cheng nuai 4475.56; Demand No.43 – Tourism, cheng nuai 1538.54, a vaiin cheng nuai 32,550.59 te chu House-in lungrual takin a pass ta a ni.

Pu JOHN ROTLUANGLIANA, MINISTER : Ka lawm e, Pu Deputy Speaker.

DEPUTY SPEAKER : Thalfavang kut-ah khan keipawh ka sawm nghal che u a ni, minister kha ka’n pui nghal a ni e. Tikhan vawiina kan business chu kan zo ta a, kan chawl tawh anga, naktuk ni 25.11.2014 Thawhlelni zing lam dar 10 : 30 ah kan thukhawm leh dawn nia.

Sitting is adjourned 3 : 50 PM.